

# ዮሃንሲ ፩ዱ ዲ ሚሺራቸው ቃላ ጌሉዋ

ዮሃንሲ ፩ዱ ዲ ሚሺራቸው፣ ዩሱሲ አሹዋ ማዪዴ አሳ ጊዲዋን ቤቱዳ ዴዑዋ ያሳ ቃላ ጊዲያዋ ቆንጨሴ። ሃ ማፃፋይ ባሬ ሁጹው ቆንጨሴያዋዳን ሃ ሚሺራቸው ቃላይ ፩ፊቱዳዌ፣ አ ናባቢያ አሳይ ዩሱሲ አሳ አሺያ ጳሊያ ጊዲዴ ያናዋ ጌቲቲዳ ያሳ ናዓ ጊዲያዋ አማናና ማላኔ አኒ አማኖ ጋሱዋን ሜዲና ዴዑ ኡንቲንቲሲ ዴዓናዋ ኡንቲንቲ ኤራና ማላ ፩ፊቲዳ (20:31)።

ሚሺራቸው ቃላው ኮይሮ ሻኩ ሜዲና ያሳ ቃላይኔ ዩሱሲኔ ኢቱዋ ጊዲያዋ ኦዲ ሲሚዴ፣ ዩሱሲ አሺያዋ ጊዲዴ ያና ጌቲቲዳ ያሳ ናዓ ጊዲያዋ ቤሲያ ዲማ ዲማ ማላታቱዋ ሺሼ። ሄዋፔ ካሊዴ ቃሲ ሃ ማላታቱዋፔ ቤቲዳ አይፊያ ኦዲያ ታሪካቱ ካሊኖ። ሃ ከፊሊ ኢቲ ኢቲ አሳይ ዩሱሳን አማኒዴ፣ አ ካሊያዋንታ ጊዴዳዋ ኦዴ፤ ሃራቱ ቃሲ አ አያው ኢዳዴንቲኔ አኒ አያው አማኖኮ ጌዴንቶ ኦዲኖ። (ሺምፑዋ 13-17) ዩሱሲ ኦይቄቲዳ ኦማርሲ አው አ ካሊያዋንቲና አይ ኬና ሚኖ ኢቲፔቲላይ ዴዒንቲኔ፣ ቃሲ ኢ ካቄታናው ማቲዳ ዋንቲላ ጋላሲ ኡንቲንቲሲ ጊጌታና ማላኔ ሚናና ማላ ኢ ሃሳዬዳ ቃላ ኦዲኖ። ወርሴላ ሺምፓቱ ዩሱሲ ኦይቄቲዳዋኔ ፒርዳው ሺቄዳዋ፣ አ ካቄዋኔ አ ዴንዲዋ፣ ቃሲካ ዴንዲዋፔ ጉዩያን ባሬና ካሊያዋንቲሲ ኢ ቆንጨዳ ሃኖታ ኦዲኖ።

ዮሃንሲ ጎዳ ዩሱሲ ከሪሰቶሳ ባጋና ቤቲያ ሜዲና ዴዑዋ ቆንጨያን ቤሲያ ሃ አጾ ከካቲላይ ሃዒፔ ዶሚዴ ዩሱሲ ኦጌ፣ ቱማኔ ዴዖ ጊዲያዋ አማኒያዋንቲሳ። ዮሃንሲ ፩ዱ ዲ ሚሺራቸው ቃላ ሃራቱዋፔ ዲማዩያዌ፣ አያና ቱማቲላቲዋ ታማሪሳናው ዴዑዋ ኡባን አሳይ ሜዜቲዳ ቃላቲዋ ጎዒቲያ ዲራሳ። ሄዋንቲካ፣ ሃላ፣ ሶሉዋ፣ ፖዑዋ፣ ሄንላንቻ፣ ዶርሳ፣ ዋዩኒያ ሚላ፣ ዋዩኒያ አይፊያኔ ሄዋንታ ማላቲያዋንታ።

ዋሹማዴ ኦይቄቲዳ ሚሺራቲ ታሪኪያ 7:53-8:11 ጮራ ቢሌላቲኔ ቤኒ ማፃፋቱ ባሬንቲን ጉጂኪኖ፤ ሃራቱ ዮሃንሳ ሚሺራቸውን 21:24 ጉዩያን ጌሊሲኖ፤ ሃራንቲ ቃሲ ሉቃሳ ሚሺራቸው 21:38 ጉዩያን ጌሊሲኖ፤ ኢቲ ቤኒ ፩ፊቲዳ ቢሌላይ ዮሃንሳ ሚሺራቸው 7:36 ጉዩያን ጌሊሴዳ።

**ሺምፓቱዋ ኡባቱዋሲ ኢሜቲዳ ቃንሳ ቆፋቱዋ**

ሃ ማፃፋ ፃፊዳዋ ቆፋ (1:1-18)

ፃማቂያ ዮሀንሳን ዩሱሳ ኮይሮ ካሌዳዋንታ (1:19-51)

ዩሱሳ ኦሱዋ ዶሜላ (2:1-12:50)

ዩሩሳሌሜኒኔ ኢዚ ዩሹዋን ወርሴላ ጋላሳቱዋን ሃኔዳ ዩሱሳ ኦሱዋ (13:1-19:42)

ጎዳ ዩሱሳ ዴንዲዋኔ ቆንጨፍላ (20:1-31)

ወርሴላ ቁቲያ፣ ጋሊላን ዛሪዴ ባሬና ካሊያዋንቱሲ ዩሱሲ ቆንጨፍዳዋ (21:1-25)

**ዴዑዋ ቃላ**

1 ቃላይ ኮይሮ ዴዒ፤ ቃላይካ ያሳና ኢቲፔ ዴዒ፤ ቃላይካ ያሳ።

2 ኢ ኮይሮፔካ ያሳና ዴዒ። 3 ኡባባይ ቃላ ባጋና ሜዴቲዳ። ሜዴቲዳባኒ ኡባባኒ ኢ ባይናን ኢቲባይኔ ሜዴቲቤና። 4 ኢኒ ዴዑ ዴዒ፤ ዴዑ ኣሳው ፖዑዋ። 5 ፖዑ ዲማኒ ፖዒ፤ ዲማይ ፖዑዋ ያኒቤና።

6 ያሳፔ ከቲቲ ዩዳ ኣ ሱንሳይ ዮሀንሳ ጌቲቲያ ኢቲ ቢታኒ ዴዒ።

7 ኣሳይ ኡባይ ኣ ባጋና ኣማናና ማላ፣ ፖዑዋባ ማርካታናው ዩዳ። 8 ፖዑዋባ ማርካታናው ዩዳፔ ኣቲን፣ ኢ ባሬ ሁጳው ፖዑዋ ጊዳና። 9 ኢካ ቱሙ ፖዑዋ ጊዳዳዌ ኣሳው ፖዒሳናው ሃ ሳባ ዪያዋ።

10 ቃላይ ኣላሚያን ዴዒ፤ ያሳይ ቃላን ኣላሚያ ሜዴዳ፤ ሺን ኣላሚ ኣ ኤሪቤና። 11 ኢ ባሬ ባጋቱዋኮ ዩዳ፤ ሺን ኡንቲንቲ ኣ ሺሺ ኣከቤይኪና። 12 ጊዶፔ ኣቲን ኢ ባሬና ሺሺ ኣኩዳ ኡባቶ፣ ባሬ ሱንሳኒ ኣማኔዳዋንቶ፣ ያሳ ናና ጊዳና ማላ፣ ማታ ኢሜዳ።

13 ኡንቲንቲ ያሳፔ ዩሌቲዲኖፔ ኣቲን፣ ኣሳይ ዩሊያ ማራኒ ዋይ ኣሹዋ ሺኒያን ዋይ ኣቱማ ኣሳ ሺኒያ ፃላላን ዩሌቲቤይኪና።

14 ቃላይ ኣሳ ጊዲዳ፣ ኣቶ ከካቴላኒኔ ቱማቴላን ኩሚዴ ኦ ጊዲዋን ዴዒዳ። ኦኒ፣ ኢ ባሬ ኣቦ ኢቲ ናባ ጊዲዳ ኣኩዳ ኣው ዴዒያ ባሬ ኣወዋ ቦንቸዋ ቤዒዳ።

15 ዮሀንሲ ኣባ ባሬ ኮሻ ቶቁ ኦሊዳ፣ «ታኒ፣ ታፔ ካላ ዪያዌ ታፔ ቦላ፤ ኣዪሲ ጎፔ፣ ታ ዩሌታናፔ ካሴና ኢ ዴዒያዋ» ጋዴ ሂንቲንቶ ኦዶዌ ሃዋ» ያጊ ማርካቲዳ።

16 ኦኒ ኡባይ ኣ ኩሚንሳ ኣቶ ከካቴላን ፓላሃዳ ኣንጂዋ ኣኩዳ። 17 ያሳይ ሂጊያ ሙሴ ባጋና ኢሜዳ፤ ሺን ኣቶ ከካቴላይኔ ቱማቴላይ ዩሱሲ ከሪሰቶሳ ባጋና ዩዳ። 18 ያሳ ቤዒዳ ኣሳይ

አኒኔ ባዋ፤ ባሬ አዉዋ ማታን ዴዒያ ባሬ ሁጹው ያሳ ጊዴዳዌ አቲ ናዓ ፃላላይ አባ ማርካቴዳ።

ፃማቂያ ዮሀንሳ ማርካቴሳ  
(ማት 3:1-12፤ ማር 1:1-8፤ ሉቅ 3:1-18)

19 ዬሩሳሌምን ዴዒያ አዲሁዳቱዋ አዲሲያዋንቱ ቄሳቱዋኔ ለዋቱዋ ዮሀንሳሳ፡ «ኔኒ ኦኔ?» ጊዴ አ አቻና ማላ ከቲና፡ ዮሀንሲ ከንቱንቱሲ ማርካቴዳ ማርካቴሳይ ሃዋ።

20 ዮሀንሲ፡ «ታኒ ከሪሰቶሳ ጊዲኬ» ያጊዴ ጌሺ ማርካቴዳዋፕ አቲን፡ ማርካቴሳ አዲቤና።

21 ከንቱንቱ፡ «ያቲና፡ ኔኒ ኦኔ? ኔኒ ኤላሴ?» ያጊዴ ኦቼዲና።

ዮሀንሲ፡ «አ ጊዲኬ» ያጊዴ።

ቃሲካ ከንቱንቱ፡ «ኔኒ ናቤ?» ያጊዴ ኦቼዲና።

ዮሀንሲ፡ «ጊዲኬ» ያጊ ዛሬዳ።

22 ከንቱንቱ፡ «ያቲና ኔኒ ኦኔ? ኦኒ ኦና ከቲዳዋንቶ ኦዳና ማላ፡ ኔኒ ኔና ኦና ጋይ?» ያጊዲና።

23 ዮሀንሲ ዛሬዳ፡ «ናቢያ አሳያሴ ጌዳዋዳን፡ ዋራን ባሬ ቃላ ቶቄ ኡዲዳ፡

ሳዳ አጊያ ሲቲ አላቲ!»

ጊያ ኮሻይ ታዋ»

ያጊዴ።

24 ቃሲ ፓሪሳዋቱ ከቲዳ አሳቱ 25 ዮሀንሳ፡ «ኔኒ ከሪሰቶሳ ዋይ፡ ኤላሳ ዋይ ናቢያ ጊዳና ቆዮፕ፡ ያቲና አዲሲ ፃማቃይ?» ያጊዴ ኦቼዲና።

26 ዮሀንሲ፡ «ታኒ ሃላን ፃማቃይ፤ ሺን ሂንቱንቱ ኤሬናዌ አቱ ሃዋኒ ሂንቱንቱ ጊዲዋን ዴዒ። 27 ኢ ታፕ ካላ ዬ። ታኒ አ ጫማ ቃሹዋ ቢላናዉካ ቤሲኬ» ያጊ ዛሬዳ።

28 ሃዌ ኡባይ ዮርዳኖሳ ሻፋፕ ሄፊንላ ባጋ ዮሀንሲ ፃማቂያሳ ቢታኒያን ሃኔዳ።

ያሳ ኦርጌ ዶርሳ

29 ዮሀንሱ ዋንቱላ ጋላሲ ዩሱሲ ባሬኮ ዪያዋ ቤዒዳ፡ «ዖሳ ኦርጌ ደርሳ፡ \* ኣላሚያ ኣሳ ናጋራ ቋዲሲያዌ፡ ሃዌሽ! 30 ታኒ፡ ሓጉጅ ካላ ኢቱ ያናዋ፤ ኢ ታጉ ሶላ፤ ኣዪሲ ሳጉ፡ ታ ዩሌታናጅ ካሴና ኢ ዳዒያዋ) ጋዳ ኦዳዳዌ ሃዋ። 31 ኢ ኦኔንቶ ታኒ ኤሪኬ፤ ሽን ኢሰራዔሊያ ኣሳው ኣ ቆንጨሳናው ሃላን ፃማቃዳ ያዲ» ያጌዳ።

32 ዮሀንሱ ማርካቲዳ፡ «ጌሻ ኣያናይ ሳሉዋጅ ሃራጲያዳን ዋዲሽናኔ ኣ ሶላን ኡቲሽን፡ ታኒ ቤዒዳ። 33 ታኒ ኣ ኤሪኬ፤ ሽን ሃላኒ ፃማቃና ማላ ታና ከቲዳ ዖሳይ፡ ጌሻ ኣያናይ ዋዲዳ፡ ኢቲ ኣሳ ሶላ ሽምጥሽን፡ ኔኒ ቤዒና፤ ኢካ ጌሻ ኣያናን ፃማቁ) ያጌዳ ታው ኦዳዳ። 34 ታኒ ሃዋ ቤዒዳ፤ ኢ ዖሳ ናዓ ጊዲያዋካ ማርካታይ» ያጌዳ።

**ዩሱሲ ኮይሮ ባሬና ካሊያዋንታ ደሬዳ**

35 ዋንቱላ ጋላሲ ዮሀንሱ ሽሬቲዳካ ባሬና ካሊያዋንቲፍ ላዓቲዋና ኢቲጅ ኤቁዳ፤ 36 ኢ ዩሱሲ ኣዲሽን ቤዒዳ፡ «ዖሳ ደርሳይ ሃዌሽ!» ያጌዳ።

37 ዮሀንሳ ካሊያ ላዓቲ ዮሀንሱ ጊያዋ ሲሲዳ፡ ዩሱሳ ካሌዲኖ። 38 ዩሱሲ ባሬና ካሊያዋንታ ጉዩ ሲሚ ቤዒዳ፡ «ኣያ ኮዩቲ?» ያጌ ኦቼዳ።

ኡንቲንቲ ዛሪዳ፡ «ሬቢ፡ ኔኒ ሃቃን ዳዓይ?» ያጌዲኖ። «ሬቢ» ጉሳይ «ታማሪሲያዋ» ጊያዋ።

39 ዩሱሲ ኡንቲንታ፡ «ሃ ዪዳ ቤዒቲ» ያጌዳ። ኡንቲንቲ ቢዳ፡ ኢ ዳዒያሳ ቤዒዲኖ፤ ሄ ጋላሲ ሳዓይ ታው ሳቲ ሄራ ጊዲያ ዲራው፡ ኡንቲንቲ ኣናና ፔሼዲኖ።

40 ዮሀንሱ ጌዳዋ ሲሲዳ፡ ዩሱሳ ካሌዳ ላዐ ኣሳቲዋጅ ኢቲ፡ ሲሞና ጳዲርሳ ኢሻ ኢንዲራሳ። 41 ኢንዲራሴ ኮይሮ ባሬ ኢሻ ሲሞና ዳሚዳ፡ «ኦኒ ዖሳይ ከቲዳዋና ጋኬቲዳ» ያጌዳ። ሃዋ ጉሳይ «ከሪሰቶሳ» ጊያዋ። 42 ኢንዲራሴ ሲሞና ዩሱሳኮ ኣሄዳ።

---

\* 1:29 ዖሳ ኦርጌ ደርሳ፡ ፓሲጋ (ኬሱዋ)፡ ኣዪሁዳ ኣሳቲዋ ፓይዳዋን ኒሳን ጌቲቲያ ኣገና ጊዲዳ ቶጲያ ኣሳ ፓይዳዋን ላፑኒያ ሆሰፑኒያ ኣገናቲዋ። ኣዪሁዳ ኣሳን ፓሲጋ ጌቲቶዳ፡ ዖሳይ ኢሰራዔሊያ ኣሳቲዋ ገብፃጅ ዋልቃማ ማላታን ኬሴዳ ዋዲያ ጊዲያ ዲራሳ። ዋግ 23:5-8 ያለቲ። ዖሳ ኦርጌ ደርሳ፡ ኦራሳ ጫቁዋን ከሪሰቶሳን ዪሴቶ ጋሱ፡ ኢ ሃ ኣላሚያ ኣሳ ሃይቁዋሲ ባሬና ኣሊ ኢሚዳ ሜዲና ሙራጅ ኬሲ ኣኮ ዲራሳ። 1ቆር 5:7፤ 1ጳፀ 1:18-19 ያለቲ።

ዩሱሲ ሲሞና በዒዳ፣ «ኔኒ ዮሃንሳ ናባ ሲሞና፤ ኔ ሱንላይ ከፋ ጌቲታናዎ» ያጌዳ። «ከፋ» ጊያዎ ቢሌላይ «ጳጳርሳ» ዎይ «ዛላ» ጊያዎ።

**ዩሱሲ ፒሊጶሳኔ ናቲናዔላ ጭጌዳ**

43 ዎንቴላ ጋላሲ ዩሱሲ ጋሊላ ባናው ቆፋ ቃቹዳ፤ ኢ ፒሊጶሳና ጋኬቲዳ፣ «ታና ካላ!» ያጌዳ። 44 ፒሊጶሲ፣ ኢንዲራሲኔ ጳጳርሲ ዳዔዳ በቴሳይዳ ጌቲቲያ ካታማፔ ዩዳ ኣሳ።

45 ፒሊጶሲ ናቲናዔላና ጋኬቲዳ፣ «ሙሴ ማፃፋቱዎኒኔ ናባቱዎ ማፃፋቱዎን † ኣባይ ፃፊቲዳዎዳን፣ ዮሴፎ ናባ ዩሱሲ ናዚሬቲ ካታማን ዳዒያዎና ኑኒ ጋኬቲዳ» ያጌ ኦዳዳ።

46 ናቲናዔሊ ዛሪዳ፣ «ናዚሬቲ ካታማፔ ሎፖባይ ከሳናው ዳንዳዪ?» ያጌዳ።

ፒሊጶሲ፣ «ያዳ በዓ» ያጌዳ።

47 ናቲናዔሊ ባሪኮ ዪያዎ ዩሱሲ በዒዳ፣ «ማካላይ ባይና ቱሙ ኢሰራዔሊያ ኣሳይ ሃዎ!» ያጌዳ።

48 ናቲናዔሊ ዩሱሳ፣ «ኔኒ ታና ሃቃን ኤራይ?» ያጌ ኦቹዳ።

ዩሱሲ ዛሪዳ፣ «ፒሊጶሲ ኔና ጭሳናፔ ካሴ፣ ኔኒ ባላሲያ ጌቲቲያ ሚላፔ ሂርኪና ዳዒሲን፣ ታኒ ኔና በዓዲ» ያጌዳ።

49 ናቲናዔሊ ዛሪዳ፣ «ታማሪሲያዎ፣ ኔኒ ያሳ ናባ! ኔኒ ኢሰራዔሊያ ካቲያ!» ያጌዳ።

50 ዩሱሲ፣ «ታኒ ኔና ባላሲያ ጌቲቲያ ሚላፔ ሂርኪና በዓዲ ጌዳ ዲራው ኣማናይ? ኔኒ ሃዎፔ ኣጲያዎ በዓና!» ያጌዳ።

51 ቃሲካ ዩሱሲ፣ «ታኒ ሂንቴንቱሲ ቱሙዎ ኦዳይ፤ ሳሉ ዶዬቲና፣ ያሳ ኪታንቻቱ ታ ቦላ፣ ኣሳ ናባ ቦላ፣ ፑዳ ከሲሺናኔ ዲጌ ዎጲሺና፣ ሂንቴንቱ በዓና» ያጌዳ።

## 2

**ዩሱሲ ቃና ካታማ ቡላቻሳ በዳ**

1 ሄዜንሳ ጋላሲ ጋሊላ ጋዲያን ቃና ጌቲቲያ ካታማን ቡላቻይ ቡላቹቲዳ፤ ዩሱሳ ዳያ ሄ ቡላቻን ዳዓው። 2 ዩሱሲካ ባሪና ካሊያዎንቱና ኢቲፔ ሄ ቡላቻ ጭሴቲዳ። 3 ዎዪኒያ ኡሻይ ዉሪዲጊና፣ ዩሱሳ ዳያ ኣ፣ «ኡንቴንቱሲ ዎዪኒያ ኡሻይ ዉሪዲጊዳ» ያጋ ኦቻዳ።

† 1:45 ሙሴ ማፃፋቱዎኒኔ ናባቱዎ ማፃፋቱዎን፣ ኣዪሁዳቱዎ ማፃፋ፣ ኤጫ ጫቁዎ።  
1:51 ዶሞ 28:12

4 ዬሱሲ ዛሬዳ፡ «ታ ዳዬ፡ ሃዌ ታ ኦሱዋ ጊዲያ ዲራው፡ ኔ ያያና ኮሼና። ታ ዋዲ \* ቢር ጋከቤና» ያጌዳ።

5 ዬሱሳ ዳያ ኪቴቲያዋንቱሲ፡ «ኢ ሂንቴንቱሲ ኦዲያዋ ኣያ ጊደፔኔ ኦሊቴ» ያጋ ኦዳዲ።

6 ኣዪሁዳቱ ካሴ ኦሊያ ደያዳን፡ ማቻ ዋጋው ኢቱ ኢቱ ጭቶ ፃሪሙሲያ ኦይቂያ ኡሱፑን ሹቻ ባላቱ ሄዋን ደዒኖ። 7 ዬሱሲ ኪቴቲያዋንታ፡ «ባላቱዋኒ ሃላ ኩንሊቴ» ያጌዳ፤ ጌቴቶዋዳንካ ኡንቱንቱ ባላቱዋኒ ደና ጋካናው ሃላ ኩንሊዲኖ። 8 ዬሱሲ ኡንቱንታ፡ «ሃዒ ዲቂዳ፡ ቡላቻ ካፖ ኢሚቴ» ያጌዳ፤ ኡንቱንቱ ኣው ኣፊዳ ኢሚዲኖ።

9 ቡላቻ ካፑ ዋዪኒያ ኡሻ ጊዳዳ ሃላ ጋንፂ ጃሊዳ፡ ሃቃፔ ዬዳንቶ ኤሪቤና፤ ሸን ሃላ ኩንሊዳ ኦሳንቻቱ ኤሪኖ። ቡላቻ ካፑ ማቻቶ ኣኪያዋ ጃሊዳ፡ 10 «ኦኒኔ ኣዪፊ ጊዳዳ ዋዪኒያ ኡሻ ኢማላ ኣሳ ካሴቲዳ ኡሼ፤ ያቲዳ ኣሳይ ዳሪሲ ኡሼዳዋፔ ፑዪያን፡ ቂራሪያ ኡሼ። ሸን ኔኒ ኣዪፊ ጊዳዳ ዋዪኒያ ኡሻ ሃኖ ጋካናው ናጋዳ!» ያጌዳ።

11 ዬሱሲ ባሬ ኦሊዳ ዋልቃማ ማላታቱዋፔ ሃዋ ኮይሩዋ ጋሊላ ጋዲያን ቃና ጌቴቲያ ሄራን ኦሊዳ፤ ሄዋን ባሬ ቦንቹዋ ኢ ቆንጨሲና፡ ኣ ካሊያዋንቱ ኣኒ ኣማኔዲኖ።

12 ሄዋፔ ፑዪያን፡ ዬሱሲ ባሬ ዳዪና፡ ባሬ ኢሻቱዋናኔ ባሬና ካሊያዋንቱና ኢቲፔ ቂፊሪናሆማ ጌቴቲያ ካታማ ቢዳ ኣማሬዳ ጋላሳ ታኬዲኖ።

ዮሱሲ ጌሻ ጎሊያ ጊቢያፔ ዛሊዲያዋንታ ኬሴዳ

(ማት 21:12-13፤ ማር 11:15-17፤ ሉቅ 19:45-46)

13 ኣዪሁዳቱ ቦንቹያ ፓሲጋ ባላ ጋላሳይ ማታቲና፡ ዬሱሲ ዬሩሳላሚ ቤዳ። 14 ጌሻ ጎሊያ ጊቢያን ሚዛ፡ ደርሳኔ ደጎማቱዋ ዛሊዲያ ኣሳ ዳሜዳ፤ ቃሲ ሃራቱ ባሬንቱ ኦይዲያን ኡቲዳ፡ ሚሻ ላሚያዋንታ ዳሜዳ። 15 ኢ ጎላ ጂራሬያ ደቂዳ፡ ኣሳ ኡባ ደርሳናኔ ሚያና ጌሻ ጎሊያ ጊቢያፔ ካሬው ኬሲዳ ዬዳሪሴዳ። ሚሻ ላሚያዋንቱ ኦይዲያካ ኣሊ ዬጊዳ፡ ኡንቱንቱ ሚሻ ላሊዳ። 16 ደጎሙዋ ዛሊዲያዋንታ ኢ፡ «ሃ ደጎማቱዋ ሃዋፔ ኬሲቴ፤ ታ ኣቡ ጎሊያ ጌያ ኦሳፒቴ!» ያጌዳ።

17 ዬሱሳ ካሊያዋንቱ ያሳ ማፃፋን፡ «ታኒ ኔ ጎሊው ሴሊቲያ ሴላይ ታና ታማዳን ጉዳ» ጌቴቲዳ ፃፊቴዳዋ ሃሳዬዲኖ።

\* 2:4 ታ ዋዲ፡ ሃዋ ጉሳይ ዬሱሳ ቱሙ ቦንቹ ቤዳታናው ቤሴኔ ኢ ያሳ ናዓ ጊደቂ ኤሬታናው ቤሴ ጊያዋ። 2:17 ማዝ 69:9

18 ሃዋፔ ገዬ፣ አዪሁዳ አሳ አዪሲያዋንቱ ዛሪዳ፣ «ኔው ሃዋ ኦላናው ዳንዳዪያ ማታይ ዳዒያዋ ኑና አያ ማላታ ቤሳኒ?» ያገደደ።

19 ዩሱሲ፣ «ሃ ጌሻ ጎሊያ ኮሊቲ፤ ታኒ ሄዙ ጋላሳኒ ዛሪዳ ከፃና» ያገደደ።

20 ቃሲካ አዪሁዳ አሳ አዪሲያዋንቱ፣ «ሃ ጌሻ ጎሊያ ከፃናው አይታማኔ ኡሱቸን ላይላ አኬዳ፤ ሺን ኔኒ ሄዙ ጋላሳኒ ከፃኒ?» ያገደደ።

21 ሺን ኢ ሃሳዬዳ ጌሻ ጎሊ ባሪ አሳቲላባ። 22 ሃዋ ዲራው፣ ዩሱሲ ሃይቁዋፔ ዳንዳዳዋፔ ጉዪያን፣ ዩሱሳ ካሊያዋንቱ ኢ ሃዋ ጌዳዋ ሃሳዬዲኖ። ቃሲ ኡንቲንቲ ያሳ ማፃፋይ ጌዳዋኔ ዩሱሲ ሃሳዬዳዋ አማኔዲኖ።

23 ፓሲጋ ባላ ቦንቲያ ዎዳ፣ ዩሱሲ ዩሩሳላሚን ዳዒሺን፣ ኢ አሉዳ ማላታ ቤዒዳ፣ ጮራ አሳይ አ አማኔዲኖ። 24 ሺን ዩሱሲ አሳ ኡባ ኤሪያ ዲራው፣ ሃዋንታ አማኒቤና። 25 አሳባ ኦኒኔ አው ማርካታና ማላ ኮዪቤና፤ አዪሲ ጎፔ፣ አሳ ዎዛናኒ አዬ ዳዒንቶ፣ ኢ ባሪ ሁጳው ኤሪያ ዲራሳ።

### 3

#### ዩሱሳኔ ኒቆዲሞሳ

1 ፓሪሳዋቱዋፔ ገዳዳ ካፑዋ ኒቆዲሞሳ ጌቲቲያ ኢቲ ቢታኒ ዳዒ። 2 ኒቆዲሞሲ ቃማ ዩሱሳኮ ዪዳ፣ «ታማሪሲያዎ፣ ኔኒ ኑና ታማሪሳና ማላ ያሳይ ከቲዳ ገዲያዋ ኑኒ ኤሪቶ፤ አዪሲ ጎፔ፣ ያሳይ አናና ዳዒያ አሳፔ አቲን፣ ሃ ኔኒ አሉያ ዎልቃማ ማላታቱዋ ኦላናው ዳንዳዪያ አሳይ ባዋ» ያገደደ።

3 ዩሱሲ ዛሪዳ፣ «ታኒ ኔው ቱሙዋ ኦዳይ፤ አሳይ ላዒንሉዋ ዩሌታና ቆዮፔ፣ ያሳ ካዉቲላ ቤዒናው ዳንዳዪና» ያገደደ።

4 ኒቆዲሞሲ፣ «ጨማ አሳይ ዋኒዳ ላዒንሉዋ ዩሌታናው ዳንዳዪ? ባሪ ዳይ ኡሉዋ ሲሚ ጌሊዳ፣ ላዒንሉዋ ዩሌታናው አሳይ ዳንዳዪ?» ያገደደ።

5 ዩሱሲ ዛሪዳ፣ «ታኒ ኔው ቱሙዋ ኦዳይ፤ አሳይ ሃላፔኔ ጌሻ አያናፔ ዩሌታና ቆዮፔ፣ ያሳ ካዉቲላ ጌላናው ዳንዳዪና።

6 አሳይ አሹዋን አሳፔ ዩሌቲ፤ ሺን አሳይ አያናኒ ጌሻ አያናፔ ዩሌቲ፤ 7 (ሂንቲንቲ ላዒንሉዋ ዩሌታናው ቤሴ) ጋዳ ታኒ ኦዳዳ ዲራው፣ ማላሌቶፓ። 8 ጫርኩ ባሪ ኮዬዳሳ ጫርኬ። ኔኒ አ ኮሹንቻ ሲሳሳ፤ ሺን ኢ ሃቃፔ ዪንቶ ዎይ ሃቃ ቢንቶ ኤራካ። ጌሻ አያናፔ ዩሌቲዳ ኡባይ ሃዋ ማላ» ያገደደ።

9 ኒቆዲሞሲ፣ «ሃዋ ዋኒዳ ሃናናው ዳንዳዪ?» ያገደደ ኦቼዳ።

10 ዬሱሲ ዛሬዳ፡ «ኔኒ ኢሰራዔላቱዋ ታማሪሲያዋ ገደዳ ሃዋ ኤሪኪ? 11 ታኒ ኔው ቱሙዋ ኦዳይ፤ ኑኒ ኤሪያዋ ሃሳዬቶኔ ቤዔዳዋ ማርካቲቶ፤ ሺን ኑኒ ማርካቲያዋ ሂንቲንቱ ኣኪኪታ። 12 ታኒ ሂንቲንቲሲ ሳባባ ኦዲና፡ ኣማኔናዋንታ ገደፔ፡ ሳሉዋባ ኦዲና ዋኒ ኣማናኒቱ? 13 ሳሉዋፔ ዋጂዳ ታፔ ኣቲን፡ ሳሉዋ ኬሴዳዌ ኦኒኔ ባዋ፤ ሳሉዋን ዴዒያ ኣሳ ናዒይ ታና።

14-15 «ሙሴ ዋራን ፃንቂማሉዋ ሾሻ ሱሌዳዋዳን፡ ታና ኣማኔዳ ኡባይ ሜጲና ዴዑዋ ኣካና ማላ፡ ታኒ ኣሳ ናዒይ ማሰቃሊያ ቦላ ፑዴ ዴንዳና ቤሴ።

16 «ፆሳ ናባ ኣማኒያ ኡባይ ሜጲና ዴዑዋ ኣካናፔ ኣቲን፡ ጳዬና ማላ፡ ፆሳይ ሃ ኣላሚያ ኣሳ ሎይሊ ሲቄዳ ዲራው፡ ባሬ ማዲ ኢቲ ናባ ኢሜዳ፡ 17 ኣዪሲ ጎፔ፡ ፆሳይ ባሬ ናባ ሃ ኣላሚያ ኣሳ ፐርዳናው ኪቲቤና፤ ሺን ኡንቲንታ ኣ ባጋና ኣሻናው ኪቲዳ።

18 «ኣ ናባ ኣማኒያ ኦኒኔ ፐርዴቲና፤ ሺን ናባን ኣማኔና ኦኒኔ፡ ፆሳ ናባ ኢቲዋ ኣማኒቤና ዲራው፡ ሃዒካ ፐርዴቲ ኡቲዳ። 19 ኣሳ ቦላ ዪያ ፐርዳይ ሃዋ፡ ፖዑ ሃ ኣላሚያ ዬዳ፤ ሺን ኣሳ ኪታይ ኢታ ገደዳ ዲራው፡ ፖዑዋፔ ኣሊዳ፡ ጳማ ሲቄዳ። 20 ኢታባ ኦሊያ ኦኒኔ ፖዑዋ ኢዳ፤ ኣዪሲ ጎፔ፡ ባሬ ኪታይ ቆንጨና ማላ፡ ፖዑዋኮ ሺቄና። 21 ሺን ቱሙዋ ኦሊያ ኦኒኔ ፆሳይ ኣዛዜዳዋዳን፡ ኢ ኦሊዳዋ ፖዑ ቆንጨሳና ማላ፡ ፖዑዋኮ ሺቄ» ያጌዳ።

**ዬሱሳኔ ፃማቂያ ዮሀንሳ**

22 ሄዋፔ ጉዩያን፡ ዬሱሳኔ ኣ ካሊያዋንቱ ዪሁዳ ጋዲያ ቤዲና፤ ዬሱሳኔ ሄ ጋዲያን ኡንቲንቲና ኣማራዳ ዋዲያ ኡቲዳ፡ ኣሳ ፃማቂዳ ዴዒ።

23 ቃሲ ዮሀንሲ ሳሌሜ ማታን ዴዒያ ሄናና ገያ ሳን ዋጋ ሃላይ ዴዒያ ዲራው፡ ኣሳይ ኣኮ ዪና ፃማቂ። 24 ሄዋ ሃኔዳዌ ዮሀንሲ ቃሺታናፔ ካሴና።

25 ሄዋፔ ጉዩያን፡ ዮሀንሳ ካሊያዋንቲና ኣማራዳ ኣዪሁዳቲዋ ሜቻ ዋጋባ \* ፓሉሜቲዲና። 26 ኡንቲንቲ ዮሀንሳኮ ቢዳ፡ «ታማሪሲያዋ፡ ዮርዳናሳ ሻፋፔ ሄፊንፋን ኔናና ዴዒያዌ፡ ኔኒ ኣባ ማርካቶዌ፡ ቤዓ ሃዒ ፃማቂ፤ ኣሳይ ኡባይካ ኣኮ ቤ» ያጌዲና።

27 ዮሀንሲ ዛሬዳ፡ «ፆሳይ ኢማና ጳዮፔ፡ ኣሳይ ኣይኔ ኣካናው ዳንዳዬና። 28 (ታኒ ኪሪሰቶሳ ገደኪኬ፤ ሺን ታኒ ኣፔ ሲንፋው ኪቲታዲ) ጌዳዋሲ ሂንቲ ሂንቲንቲ ሁጹው ማርካ። 29 ሚሺራ

---

3:14-15 ገይ 21:9 \* 3:25 ኣዪሁዳቲዋ ሜቻ ዋጋባ፡ ሃዋ ጉሳይ ኣዪዳቲ ባሬንቱ ጎይናና ጋላናው ኦሊያ ዲማ ዲማ ባሬንታ ሜቻባይኔ ባሬንቲ ሳኒያ ሜጨያ ዋጋቲ ዴዒያዋ ቤሴ።



ማጫወና ደዲያ ኡራይ ኢካ ሚሺራ፤ ሄ ሚሺራ ሚያታይ ኡቁዳ፤ ኢ ጊያዋ ሲሲያዌ ኣ ሃሳያን ዳሮ ናሹቲ። ሄዋ ዲራው፣ ሃዌ ታ ናሹቻይ ፖሌቲዳ። 30 ኢ ዳሪና ታ ጉፃና ቤሴ» ያጌዳ።

31 ቦላፔ ዪያዌ ኡባፔ ቦላ። ሳዓፔ ቤቲዳዌ ሳዓሳ። ኢካ ሳዓባ ሃሳዬ። ሳሉዋፔ ዪያዌ ኡባፔ ቦላ። 32 ኢ ባሬ ቤዔዳባኔ ሲሴዳባ ማርካቲ፤ ሺን ኣ ማርካቲላ ኣኪያዌ ባዋ። 33 ኣ ማርካቲላ ኣኪያ ኦኒኔ ያሳይ ቱማንቻ ጊዲያዋ ሄዋን ማርካቲ። 34 ያሳይ ከቲዳዌ ያሳ ቃላ ኦዳ፤ ኣዪሲ ጎፔ፣ ያሳይ ባሬ ጌሻ ኣያና ፓላሂሲዴ ኢሜ። 35 ያሳይ ባሬ ናዓ ሲቂዳ ኡባባ ኣ ኩሺያን ዋሌዳ። 36 ናዓ ኣማኒያ ኡራው ሜዲና ዳዑ ዳዔ፤ ሺን ናዓ ኣማኔናዋ ቦላ ያሳ ሃንቁ ዳዓናዋፔ ኣቲን፣ ኢ ዳዑዋ ቤዔና።

# 4

## ዬሱሳኔ ሳማሪያ ሚሺራቶ

1-3 ዬሱሲ ጥሃሊሳዋፔ ዳሪያ ባሬና ካሊያዋንታ ባሬኮ ሺሼኔ ፃማቁ ጊያዋ ፓሪሳዋቱ ሲሴዳዋ ዬሱሲ ኤሬዳ ዋዳ፣ ዪሁዳ ኣጊዳ፣ ጋለላ ቤዳ፤ ጊዳፔኔ፣ ዬሱሳ ካሊያዋንቲ ፃማቁዳዋፔ ኣቲን፣ ዬሱሲ ባሬ ሁጳው ኦናኔ ፃማቁቤና። 4 ጋለላ ቢዳ፣ ሳማሪያና ኣቆናዌ ኣ ኣሽናባ ጊዳዳ።

5 ሄዋ ዲራው፣ ያዪቆቢ ባሬ ናዓ ዮሴፎ ኢሚዳ ጋዲያ ማታን ዳዲያ ሲካሮ ጌቲቲያ ሳማሪያ ካታማ ቤዳ። 6 ሄ ሳዓን ያዪቆባ ሃላ ኦላይ ዳዔ፤ ዬሱሲ ሃሚታን ዳቡሪዳ፣ ሄ ሃላ ኦላ ማታን ኡቲዳ። ሄ ዋዳ ሳዓይ ኡሱፑን ሳቲያ ሄራ።

7 ሳማሪያ ሚሺራታ ሃላ ዲቃናው ዬዳዉና ዬሱሲ፣ «ታና ሃላ ኡሻሪኪ!» ያጌዳ። 8 ዬሱሳ ካሊያዋንቲ ቁማ ሻማናው ካታማ ቤዲና።

9 ሄ ሚሺራታ ዛራዳ ኣ፣ «ኔኒ ኣዪሁዳ ኣሳ ጊዳዳ፣ ሳማሪያ ማጫ ኣሳ ጊዳዳ ታና፣ ዋታ ዳዑዋ ኢሚያ ሃላ ኡሻ ጋይ?» ያጋዲ፤ ኣዪሲ ጎፔ፣ ኣዪሁዳቶኔ ሳማሪያ ኣሳው ኢቲፔቲላይ ባይና ዲራሳ።

10 ዬሱሲ ዛራዳ ኢዘ፣ «ኔኒ ያሳ ኢሞታኔ ቃሲ ኔና ጎታና ሃላ ኡሻ» ጊያዌ ኦኔንቶ ኤሪያዋ ጊዲንቶ፣ ኣ ዋሳናሳ፤ ኢካ ኔው ዳዑዋ ኢሚያ ሃላ ኢማና» ያጌዳ።

11 ሚሺራታ ዛራዳ፣ «ጎዳው፣ ኔው ዲቂያባይ ባዋ፤ ኦላይካ ጨሙዋ። ያቲና፣ ዳዑዋ ኢሚያ ሃላ ሃቃፔ ኣካኒ?» 12 ኦሲ ሃ

4:5 ደዋ 33:19፤ ኢያ 24:32      4:9 ኤዘር 4:1-5፤ ናህ 4:1-2

ሃላ ኦላ ኢሜዳ ኑ አወዋ ያዩቆባፔ ኔኒ ዳራይ? ኢ፥ አ ናናይኔ አ ማሂ ሃዋፔ ኡሹዲኖ» ያጋዱ።

13 ዬሱሲ ዛሪዳ፥ «ሃ ሃላፔ ኡሹያ ኦኒኔ ላዔንሉዋ ሳሜታናዋ።

14 ሺን ታኒ ኢሚያ ሃላ ኡሹያ ኦኒኔ ላዔንሉዋ ሳሜቴና። ታኒ ኢሚያ ሃላይ ሄ አ ጊደን ማዲና ዴዑዋሲ ፑልቴያ ፑልቴዋ ጊዳናዋ» ያጌዳ።

15 ሚሺራታ፥ «ጎዳው፥ ታኒ ሳሜቴና ማላኔ ሃላ ቲካናወካ ሃ ዬና ማላ፥ ታው ሄ ሃላ ኢማ!» ያጋዱ።

16 ዬሱሲ ኢዞ፥ «ባዴ ኔ አሲና ጃሳዴ ሃ ሰማ» ያጌዳ።

17 ሚሺራታ ዛሪዳ፥ «ታው አሲናይ ባዋ» ያጋዱ።

ዬሱሲ፥ «ታው አሲናይ ባዋ ጊያዋን ቱሙዋ ጋዳ። 18 ኔኒ ኢቼሹ አሲና ጌላዳ፤ ሃሊ ኔናና ዴዒያ ቢታኒ ኔ አሲና ጊዳና። ኔኒ ሃሊ ታው ኦዴዳዌ ቱማ» ያጌዳ።

19 ሚሺራታ ቃይ፥ «ጎዳው፥ ኔኒ ናቢያ ጊዲያዋ ታ ሃሊ ኤራዲ፤ 20 ኑ ሳማሪያ አሳ አዋቱ ሃ ዴሪያን \* ጎዩኔዲና፤ ሺን አዪሁዳቱ ሂንቴንቴ አሳይ ያሳው ጎዩናናው ቤሲያ ሳሳይ ዬሩሳላሜና ያጌታ» ያጋዱ።

21 ዬሱሲ፥ «ሃ ሚሺራቴ፥ ታና አማና፤ ሃ ዴሪያን ዋይ ዬሩሳላሜን አወዋ ያሳው ሂንቴንቴ ጎዩኔና ዋዲ ያናዋ።

22 ሂንቴንቴ ሳማሪያ አሳይ ሂንቴ ኤሪናባው ጎዩኒታ፤ ያሳይ ኑና አዪሁዳቱ ጎዩቴዳ አቶቴላ አሂያ ዲራው፥ ኑኒ ኑ ኤሪያዋ ጎዩኔቶ። 23 ሺን አወዋ ያሳው ቱሙዋፔ ጎዩኒያዋንቴ አ፥ ጌሻ አያና ዋልቃኒኔ ያሳ ያሳቴላዳን ጎዩኒያ ዋዲ ማታቴዳ፤ ኡባ ሃሊካ ጋከዳ። አዪሲ ጎፔ፥ አሳ ባሪው ጎዩናና ማላ፥ አወ ያሳይካ ሃ ኦጊያን ጎዩኒያዋንታ ኮዬ። 24 ያሳይ አያና፤ አው ጎዩኒያዋንቴካ ጌሻ አያና ዋልቃኒ ያሳ ያሳቴላዳን ጎዩናናው ቤሴ» ያጌዳ።

25 ሚሺራታ፥ «ማሲሂያ ጌቴቴያ ኦኩቶዌ ያናዋ ታኒ ኤራይ። ኢ ዪያ ዋዴ ኑሲ ኡባባ ኦዳናዋ» ያጋዱ።

26 ዬሱሲ፥ «ሃ ኔናና ሃሳዪያዌ ታኒ አ» ያጌዳ።

27 ሃዋ ኡንቴንቴ ሃሳዪሺን፥ ዬሱሳ ካሊያዋንቴ ቤዳሳፔ ሲሜዲኖ። ዬሱሲ ሚሺራቴና ሃሳዪሺን ኡንቴንቴ ቤዒዴ ዳሪሲ ማላሌቴዲኖ፤ ሺን ሚሺራቶ፥ «አያ ኮያይ?» ዋይ ዬሱሳ፥ «አናና አዪሲ ሃሳያይ?» ጊዴ ኦቾዌ ኦኒኔ ባዋ።

28 ሄዋፔ ጉዪያን፥ ሚሺራታ ባሪ ሃላ ኦቱዋ አጋ ባሻ ጉዬ ካታማ ባዴ አሳው፥ 29 «ታኒ ኦሌዳዋ ኡባ ታው ኦዴዳ ቢታኒያ

\* 4:20 ሃ ዴሪያን፥ ጊያዌ ዴሪያ ጌሪዛና ጊዲዴ ሴኬማ ጌቴቴያ ካታማ ማታን ዴዒያዋ።

በዓናው ዳንዲቲ፤ ሄዌ ከሪስቶሳ ጊዳንዳሻ?» ያጋዲ። 30 አሳይ ካታማፕ ኬሲዳ፥ ዩሱሳኮ ቤዳ።

31 ሄዌ ሃኒሺን፥ አ ካሊያዋንቱ ዩሱሳ፥ «ጉላባ ማሪኪ!» ያጊዳ ዋሴዲኖ።

32 ሺን ኢ፥ «ታው ሂንቴንቱ ኤሬና ቁማይ ታኒ ሚያዌ ዳዔ» ያጊዳ።

33 ሄዋ ዲራው፥ አ ካሊያዋንቱ ባሬንቱ ጊዳን፥ «አው ሚያባ አሄዳ አሳይ ዳዓንዳሻ?» ያጊዳ።

34 ዩሱሲ ኡንቱንቱሲ፥ «ታ ቁማይ ታና ከቲዳዋ ሸኒያ ኡዲሳኔ አ አሱዋ ፖሉሳ። 35 ሂንቴንቱ፥ ሉይዲ አገናፕ ጉዩያን፥ ካላይ ጫኬታናዋ» ገኪቲዬ? ታኒ ሂንቴንቱሲ ኦዲይ፤ ገሻ ሎይሴ ያሊቲ፤ ካላይ ጫካ ቤሴዳ። 36 ዜሪያዌኔ ጫኪያዌ ኢቲፕ ናሽታና ማላ፥ ጫኪያዌ ዲርጉዋ አኬኔ ካላ ሜዲና ዳዎ ሸሸ። 37 ሃ ጋሱዋን፥ ሉቲ ዜሬ፤ ቃሲ አቲ ጫኬ» ጊያ ሃሳያይ ቱማ። 38 ሂንቴንቱ ዲቡሪቤናዋ ጫካና ማላ፥ ታኒ ሂንቴንታ ከታዲ፤ ሃራቱ ኦሴ ዲቡራዲኖ፤ ሂንቴንቱ ሃራቱዋ ዲቡራን ጌሌዲታ» ያጊዳ።

39 ሚሺራታ፥ «ኢ ታኒ ኦሴዳ ኡባባ ኦዳዳ» ጋዴ ማርካቲዳ ዲራው፥ ሄ ካታማን ዳዒያ ሳማሪያ አሳፕ ጮራይ ዩሱሳ አማኔዳ። 40 ሳማሪያ አሳይ ዩሱሳኮ ዩዳ ዋዴ፥ ባሬንቱ ማታን ጋሚዓና ማላ፥ ዩሱሳ ዋሲና ኢ ያኒ ላዑ ጋላሳ ኡቲዳ።

41 ኢ ኦዲያ ቃላ ዲራው፥ ካሱዋፕ ጮራ አሳይ አማኔዳ፤ 42 ቃሲ ኡንቱንቱ ሚሺራቶ፥ «ኮኒ ኑ ሁጳው ኢ ጊያዋ ሲሲዴ አማኔዳዋፕ አቲን፥ ኔኒ ማርካቲዳ ዲራሳ ጊዳና፤ ኢ ቱሙ አላሚያ አሳ አሺያዋ ጊዲያዋካ ኮኒ ኤሬደ» ያጊዳ።

**ዩሱሲ አቲ ካፑዋ ናዓ ፓሌዳ**

43 ላዑ ጋላሳፕ ጉዩያን፥ ዩሱሲ ሳማሪያፕ ኬሲዳ፥ ጋሊላ ጋዲያ ቤዳ። 44 አዩሲ ጎፕ፥ ኢ ባሬ ሁጳው፥ «ናሲ ባሬ ጋዲያን ቦንቹቲና» ያጊ ዦዳዳ። 45 ዩሱሲ ጋሊላ ጋኬዳ ዋዴ፥ ጋሊላ አሳይ አ ሞኬዳ፤ ፓሲጋ ቦንቹያ ጋላሲ ኡንቱንቱ ዩራሳላማን ዳዒያ ዲራው፥ ኢ ኦሴዳ ኡባባ ቤዳዲኖ።

46 ዩሱሲ ሃላ ዋዩኒያ ኡሻ ኬሴዳ፥ ጋሊላን ዳዒያ ቃና ካታማ ቤዳ። ቁሬሪናሆማን አ ናዒይ ሳኬቲያ፥ ካቲያ ጎሌን ኦሴያ ኢቲ ካፑ ዳዒ። 47 ዩሱሲ ዩሁዳፕ ጋሊላ ዩዳዋ ሄ ካፑ ሲሲዴ፥ አኮ ዩዴ ሃይቃናው ማቲዳ ባሬ ናዓ ቢዴ ፓላና ማላ፥ ዩሱሳ ዋሴዳ።

48 ዩሱሲ ሄ ካፑዋ፥ «ጾሳይ ኦሴያ ማላታኔ ሄቾ ጊሲያባ ቤዳናኒ ዳዒዳ፥ ሂንቴንቱ አዩኔ አማኒቢታ» ያጊዳ።

49 ሄ ካፑ ዛሬዎ፡ «ሳዳው፡ ታ ናዓይ ሃይቄናን ዳዒሺን፡ ታናና ባሪኪ» ያጌዳ።

50 ዬሱሱ፡ «ባ፤ ኔ ናዓይ ፓፃ ዳዓናዋ!» ያጌዳ።

ሄ ካፑ ዬሱሱ ጌዳዋ አማኒዳ ቤዳ። 51 ኢ ባሬ ጎሌ ቢሺን፡ አ ቆማቱ አናና ኦሊያን ጋኬቲዳ አ፡ «ኔ ናዓይ ፓፃ ዳዓ» ጌዲኖ።

52 ኢ ባሬ ቆማቱዋ ባሬ ናዓው አይ ሳቲያን ኬኬዴንቶ ኦቸና ኤንቱንቱ፡ «ዚኖ ላፑ ሳቲያን ቆፀ አ አጌዳ» ያጌዲኖ። 53 ናዓ አዉ ዬሱሱ ባሬው፡ «ኔ ናዓይ ፓፃ ዳዓናዋ» ጌዳዌ ሄ ሳቲያና ጌዳዳዋ ሃሳዬዳ። ሄዋ ዲራው፡ ኢኔ አ ሶይ አሳይ ኡባይ አማኔዲኖ።

54 ሃዌ ዬሱሱ ዪሁዳፕ ጋለላ ዪዳ ኦሌዳ ላዔንሶ ማላታ።

# 5

## ዬሱሱ ጉንዳ ቢታኒያ ዳጋቲ ኡቴዳ ሃላ ማታን ፓሌዳ

1 ሄዋፕ ጉዪያን፡ ዬሱሱ አዪሁዳቱ ቦንቸያ ባላው ዬሩሳላሜ ቤዳ። 2 ዬሩሳላሜን ዶርሳ ፔንጊያ ማታን ኢብራዩስዔ ቃላን ቤቴሳይዳ ጌቴቲያ ዳጋቲ ኡቴዳ ሃላይ ዳዔ፤ ሄ ዳጋቲ ኡቴዳ ሃላ ዩዪ አዴዳ ኢቸሹ ካሻይ ዳዔ። 3 ሄዋን ጮራ ሃርጋንቻቱ፡ ቆቃቱ፡ ዋባቱኔ ሲሌዳዋንቱ ጊሴዲኖ። [ሃላይ ቃዲያዋ ናጊኖ። 4 አዪሱ ጎፕ፡ ኢቲ ኢቲ ጌዳ ጎዳ ኪታንቻይ ሄ ዳጋቲዳ ሃላኮ ጌሊዳ፡ ሃላ ቃሌ፤ ሃላይ ቃዲያዋፕ ጉዪያን፡ ኮይሮ ጌሌዳ ኡራይ ባሬና ኦይቄዳ አይ ሃርጊያፕካ ፓዔ።] \* 5 ሄዋን ሃታማኔ ሆሰፑን ላይላ ሳኬቴዳ ኢቲ ቢታኒ ዳዔ። 6 ሄ ቢታኒ ሄዋን ጊሴዳዋ ዬሱሱ ቤዒዳ፡ ዳሮ ዋዲያ ሳኬቴዳዋካ ኤሪዳ ቢታኒያ፡ «ፓፃናው ኮያይ?» ያጌዳ።

7 ሳኬቴያ ቢታኒ ዛሬዎ፡ «ሳዳው፡ ሃላይ ቃዲያ ዋዔ፡ ታና ሃላን ዬጊያ አሳይ ጳዬዳ፤ ታኒ ጌላና ሃኒያ ዋዔ፡ ሃራ ኡራይ ታፕ ካሴቲዳ ጌሊ አጌ» ያጌዳ።

8 ዬሱሱ አ፡ «ዳንዳ ኤቃ፤ ኔኒ ጊሶዋ ቶካዳ ባ» ያጌዳ።

9 ቢታኒ ኤሌካ ፓዒ አጌዳ፤ ባሬ ጊሱዋ ቶኪዳ ቤዳ።

ሄዌ ሃኔዳዌ ሳምባታ ጋላሳና። 10 ሄዋ ዲራው፡ አዪሁዳቱ ፓዔዳ ቢታኒያ፡ «ሃቸ ሳዓይ ሳምባታ፤ ኔኒ ኔ ጊሱዋ ቶካ ቢያዌ ዋጋ ጊዳና» ያጌዲኖ።

11 ሺን ቢታኒ፡ «ታና ፓሌዳዌ፡ ሳኒ ጊሱዋ ቶካዳ ባ» ያጌዳ። ጌዳ ኤንቱንቱሲ ዛሬዳ።

\* 5:4 ሃ ፓይዳ ኢቲ ቤኒ ኮይሮቲዳ ዓፌቴዳ ጌሻ ማፃፋቱዋን ባዋ። 5:10 ናህ 13:19፤ ኤርሞ 17:21

12 ኡንቱንቱ አ፡ «ኔና፡ ሩኔ ጊሱዋ ቶካዴ ባ፡ ጌዳዌ ኢ ኦኔ?» ጊዴ ኦቼዲኖ።

13 ሺን ሄዋን ጮራ አሳይ ዳዒያ ዲራውኔ፡ ዩሱሲካ ጌሜቲዳ ዲራው፡ ቢታኒ ባሬና ፓሌዳዌ ኦኔንቶ ኤሬና። 14 ዩሱሲ ጉዩፔ ሄ ቢታኒያ ጌሻ ጎሊያን ዳሚዴ፡ «ቤዓ፡ ኔኒ ሃራ ፓፃዳ፤ ሃዋፔካ ኢታባይ ኔና ጋኬና ማላ፡ ላዒንሶ ናጋራ ኦሳፓ» ያጌዳ። 15 ሄዋፔ ጉዩያን፡ ቢታኒ ቢዴ፡ ባሬና ፓሌዳዌ ዩሱሳ ጊዲያዋ አዪሁዳ አሳ ካፓቶ ኦዳዳ።

16 ዩሱሲ ሃዋ ሳምባታን ኦሌዳ ዲራው፡ ኡንቱንቱ ዩሱሳ ዩዴሳን ዋዪሱዋ ደሚዲኖ። 17 ዩሱሲ ዛሬዴ ኡንቱንቱሲ፡ «ታ አቡ ኡባ ዎዴ ኦሌ፤ ታኒካ ኦላናው ቤሴ» ያጌዳ።

18 ሄዋ ዲራው፡ ዩሱሲ ሳምባታ ጋላሳ ቦንቹና ዲራ ፃላላሳ ጊዴናን፡ ባሬና ያሳና ቃራዪዴ፡ «ያሳይ ታ አባ» ጌዳ ዲራው፡ አዪሁዳ አሳ ካፓቱ አ ዎቆናው ካሴዋፔ ሚኒሲዴ ኮዪኖ።

**ያሳ ናዓ ማታ**

19 ዩሱሲ ዛሬዴ ኡንቱንቱሲ፡ «ታኒ ሂንቱንቱሲ ቱሙዋ ኦዳይ፤ ናዓይ ባሬካ አይኔ ኦሌና። ኢ ባሬ አቡ ኦሌሺን ቤዒያዎ ፃላላ ኦሌ፤ አዉ ኦሌያዎ ናዓይካ ኦሌ። 20 አዪሲ ጎፔ፡ አዉ ባሬ ናዓ ሲቁ፤ ቃሲ ኢ ኦሌያ ኦሱዋ ኡባባ ባሬ ናዓ ቤሴ። ኡባ ሂንቱንቱ ማላሌታና ጋካናው፡ ኢ ሃዋፔ አቋያ ኦሱዋካ ባሬ ናዓ ቤሳናዎ። 21 ጋሱኔ፡ አዉ ሃይቁዳዎንታ ሃይቁዋፔ ዴንሊዴ ሸምፔዋና ዎሊያዎዳን፡ ናዓይካ ቃሲ ባሬ ኮዮዎንታ ሸምፔዋና ዎሌ። 22-23 አሳይ ኡባይ አዉዋ ቦንቹያዎዳን፡ ናዓካ ቦንቻና ማላ፡ አዉ ፒርዳ ኡባ ናዓው አሚዳዎፔ አቲን፡ ኢ ኦናኔ ፒርዴና፤ ናዓ ቦንቹና ኡራይ፡ አ ከቲዳ አዉዋካ ቦንቹና።

24 «ታኒ ሂንቱንቱሲ ቱሙዋ ኦዳይ፤ ታ ቃላ ሲሲያዎኔ ታና ከቲዳዎን አማኒያዎ ሜቋና ዴዑ ዴዔ። ሃይቁዋፔ ዴዎ ኢ ፒኔዳዋፔ አቲን፡ ፒርዴቲና። 25 ታኒ ሂንቱንቱሲ ቱሙዋ ኦዳይ፤ ሃይቁዳ አሳይ ያሳ ናዓ ኮሻ ሲሲያ ዎዲ ያናዎ፤ ሄዎኔካ ሃዓ። ሄ ኮሻ ሲሲያዎንቱ ሸምፔዋና ዴዓና። 26 አዪሲ ጎፔ፡ አዎ ዴዑዋ አሚያ ዎሊቃይ ዴዒያዎዳን፡ ዴዑዋ አሚያ ሄ ዎሊቃ ባሬ ናዓዉካ አሚዳ። 27 ያሳ አዉ ባሬ ናዓው ፒርዲያ ማታ አሚዳ፤ አዪሲ ጎፔ፡ ናዓይ አሳ ናዓ።

28 «ሃዋን ማላሌቶፒቲ፤ አዪሲ ጎፔ፡ ዲፋዎን ዴዒያዎንቱ አ ኮሻ ሲሲያ ዎዲ ዩ። 29 ሲሲዴ ኡንቱንቱ ዲፋዋፔ ጋፃ

ከሳና፤ ሎዖባ አሌዳዋንቱ ደዑዋን ደዓናው ደንዳና፤ ቃሲ ኢታባ አሌዳዋንቱ ፒርዳታናው ደንዳናዋንታ።

**ዬሱሳሲ ማርካቴዳ አሳቱዋ**

30 «ታኒ ታፔ አይኔ አላናው ደንዳዩከ፤ ያሳይ ታው ኦዳዳዋዳን ፒርዳይ። ታ ፒርዳይ ቱማ፤ አዩሲ ጎፔ፤ ታኒ ታና ከቴዳዋ ሸኒያ ፖሊያዋፔ አቲን፤ ታኒ ደሲያዋ አሊከ።

31 «ታኒ ታ ሁጵው ታባ ማርካቶፔ፤ ታ ማርካቴላይ ቱማ ጊደና። 32 ታባ ማርካቴያዌ ሃራይ ዳዔ፤ ኢ ታባ ማርካቴያዌ ቱማ ጊዲያዋ ታኒ ኤራይ።

33 «ሂንቴንቱ የሃኒሳኮ አሳ ከቲና፤ ኢ ኡንቴንቶ ቱሙዋ ማርካቴዳ። 34 ታኒ ሂዋ ሂንቴንታ አቲና ጋይ ጊያዋፔ አቲን፤ አሳ ማርካቴላይ ታው ኮሺና ጊደና። 35 የሃኒሲ ሙቃዳዳን፤ ኤጄዳኔ ፖዲሴዳ፤ ሂንቴንቱካ አማሬዳ ዋዲያ አ ፖዑዋን ናሽታናው ኮዬዲታ።

36 «ሺን ታው የሃኒሳዋፔ አጲያ ማርካቴላይ ዳዔ፤ አዩሲ ጎፔ፤ ታኒ ወርሳናው ታ አቡ ታው ኢማዳ ከታይ፤ ሃ ታኒ አሊያዌ፤ ኢ ታና ከቴዳዋ ጊዲያዋ ማርካቴ።

37 «ቃሲ ታና ከቴዳ ታ አቡ ባሬ ሁጵው ታባ ማርካቴ። ሂንቴንቱ አ ኮሻ አይኔ ሲሲቤይኪታ፤ አ ማላካ ቤዲቤይኪታ። 38 ኢ ከቴዳዋ አማኔና ዲራው፤ አ ቃላይ ሂንቴንቱ ዋዛናን ባዋ።

39 «ያሳ ማፃፋቱዋፔ ሜጲና ደዑዋ ዳሚያዋ ሂንቴው ማላቲና፤ ኡንቴንታ ቢዲታ፤ ኡንቴንቱካ ታባ ማርካቴያዋንታ። 40 ሺን ደዑዋ ዳማናው ታኮ ዩያዋ ሂንቴንቱ ኮዩኪታ።

41 «ታኒ አሳፔ ቦንቹዋ ኮዩከ። 42 ሺን ታኒ ሂንቴንቱ ዋዛናን ያሳ ሰቁ ባይናዋ ኤራይ። 43 ታኒ ታ አቡ ሱንላን ያዲ፤ ሺን ታና አኪቤይኪታ። ሺን ሃራ አሳይ ባሬ ሱንላን ዩያ ዋዳ፤ አ አኪታ። 44 ሂንቴንቱ ኢቱ ኢቱዋ ቦንቹታ፤ ሺን ኢቲ ያሳፔ ዩያ ቦንቹዋ ኮዩኪታ። ያቲና፤ ዋኒዳ አማናናው ዳንዳዩቱ?

45 «ታኒ ታ አቡ ሲንላን ሂንቴንታ ሞቲያዋ ሂንቴው ማላቶፖ፤ ሂንቴንታ ሞቲያዌ፤ ሂንቴ ሂደታ ዋሊያ ሙሳ። 46 ሂንቴንቱ ሙሳ አማኔዳባ ጊዲንቶ፤ ታናካ አማናኒታ፤ አዩሲ ጎፔ፤ ታባ ፃፌዳዌ አ። 47 ሺን ሂንቴንቱ ኢ ፃፌዳዋ አማኔናን ኢያፔ፤ ታኒ ጊያዋ ዋቲ አማናኒቱ?» ያጌዳ።

# 6

ዩሱሲ 5000 እሳ ሚዜዳ  
(ማት 14:13-21፤ ማር 6:30-44፤ ሉቅ 9:10-17)

1 ሄዋፔ ጉዩያን፣ ዩሱሲ ጋሊላ አባፔ ዋይ ዲቢያደሳ አባፔ ሄሬንላ ፒኔዳ። 2 ኢ ሃርጋንቻቱዋ ቦላ ኦሌዳ ዋልቃማ ማላታ ቤዔዳ ዲራው፣ ጮራ አሳይ ኦ ካሌዳ። 3 ዩሱሲ ዳሪያ ኬሲዳ፣ ያኒ ባሬና ካሊያዋንቱና ኢቲፔ ኡቴዳ። 4 አዩሁዳቱ ቦንቺያ ፓሲጋ ጋላሳይ ጋኬዳ። 5 ዩሱሲ ሲንሳኮ ዪሊዳ፣ ጮራ አሳይ ባሬኮ ዩያዋ ቤዔዳ ፒሊጶሳ፣ «ሃ አሳ ኡባ ሚዛናው ገዲያ ቁማ ሃቃፔ ሻማኔ?» ያጌዳ። 6 ኢ ሄዋ ፒሊጶሳ ፓጫናው ጌዳ፤ አዩሲ ጎፔ፣ ኢ ባሬ ሁጾው ኣያ ኦላና ቤሲንቶ ኦላናባ ኤሬ።

7 ፒሊጶሲ ዛሬዬ ዩሱሳ፣ «ሁጲያን ሁጲያን፣ ሃራይ ኣቶ ኢቲ ኢቲ ባርሱዋ ጋላናው፣ ላዑ ዪቱ ዲናሪያን ሻሜዳ ኡኪላይካ ገዴና» ያጌዳ።

8 ቃሲ ዩሱሳ ካሊያዋንቱፔ ኢቱ፣ ሲሞኒ ጳዒሮሳ ኢሻይ ኢንዲራሲ። 9 «ባንጋ ኡኪላ ኢቺሹኔ ላዑ ሞሊ ዳዳፍ ኢቲ ናባይ ሃዋን ዳዔ፤ ሺን ሃ አሳ ኡባው ሄዌ ዋቲ ገዳኔ?» ያጌዳ።

10 ዩሱሲ ባሬና ካሊያዋንታ፣ «አሳይ ኡታናዳን ኡዲቲ» ያጌዳ። ሄ ሳባን ዳር ማታይ ዳዔ። አሳይ ኡባይ ኡቴዳ፤ አቱማ አሳይ ኢቺሹ ሻዓ ገዲያዋ። 11 ዩሱሲ ኡኪላ ኣኬዳ፤ ያሳ ጋላቲዳ፣ ሄዋን ኡቴዳ አሳው ገሼዳ። ሞሊያካ ሄዋዳን ኦሊና አሳይ ባሬ ኮዬዳዋ ከና ሜዳ። 12 ኡንቱንቱ ኡባይ ካሌዳዋፔ ጉዩያን፣ ዩሱሲ ባሬና ካሊያዋንታ «ኢቲባይካ ጮ ባዬና ማላ፣ አቲዳ ደካ ሺሺቲ» ያጌዳ። 13 ሄዋ ዲራው፣ ኡንቱንቱ ኡባካ ሺሺዲኖ፤ አሳይ ካሊና አቲዳ ባንጋ ኡኪላ ደካ ሺሺዳ፣ ታማኔ ላዑ ዛሞቤሊያ ኩንሌዲኖ።

14 አሳይ ዩሱሲ ኦሌዳ ዋልቃማ ማላታ ቤዔዳ ዋዳ፣ «ሃዌ ቱሙዋፔ ሃ ሳባ ያና ጌዳ ናቢያ» ያጌዲኖ። 15 ኡንቱንቱ ዩዴ ባሬና ዋልቃን ኦይቂ ካቲያ ኦላናው ሃኒያዋ ዩሱሲ ኤሪዳ፣ ባሬካ ዳሪያ ቦላ ሺሬቲዳ ኬሴዳ።

ዩሱሲ አባ ቦላን ሃሜቲዳ ቤዳ  
(ማት 14:22-33፤ ማር 6:45-52)

16 ሳባይ ኦማሪሴዳ ዋዳ፣ ዩሱሳ ካሊያዋንቱ አባኮ ቤዲኖ፤ 17 ሳባይ ቃሜዳ፤ ሺን ዩሱሲ ኡንቱንቱኮ ሄ ሳቲ ጋካናው ዩቤና፤ ሄዋሲ ኡንቱንቱ ዋንገሪያን ጌሊዳ፣ አባ ፒኒ ሄሬንላ ቂሬሪናሆማ ቤዲኖ። 18 ዋልቃማ ጫርኩ ጫርኬዳ ዲራው፣ አባይ ቃዪዳ፤

19 ኢቲ ሳቲያ ኬና ኡንቱንቱ ኣባ ሻሳዋፔ ጉዩያን፣ ዩሱሲ ኣባ ቦላና ሃሚቲዴ ዩያዋ ቤዒዴ ያዩዲኖ። 20 ሺን ኢ፣ «ያዮፕቲ፣ ታናቲ!» ያጌዲ። 21 ኡንቱንቱ ዋንጊሪያን ኣ ጌሊሳናው ኮዩዲኖ፣ ዋንጊሪ ኡንቱንቱ ቢያሳ ኣባ ጋፃ ኤሌካ ጋኪ ኣጌዲ።

**ዩሱሲ ዴዑዋ ኡኪላ**

22 ዋንቲላ ጋላሲ፣ ኣባፔ ሄፊንላና ኣቲዳ ጮራ ኣሳይ ኣባ ቦላ ኢቲ ዋንጊሪያ ፃላላይ ዴዒያዋ ቤዒዲኖ፣ ዩሱሲ ባሬና ካሊያዋንቲና ዋንጊሪያን ጌሊዴ፣ ኡንቱንቲና ቤናን፣ ኡንቱንቲ ባሬካ ቤዳዋ ኣኬኬዲኖ። 23 ሺን ዪቢሪያደሳፔ ሃራ ዋንጊራቲ ዩሱሲ ያሳ ጋላቲና፣ ኣሳይ ኡኪላ ሜዳሳ ማታ ዩዲኖ። 24 ኣሳይ ዩሱሲ ዋይ ኣ ካሊያዋንቲ ሄዋን ባይናዋ ቤዒዴ፣ ዩሱሳ ኮያናው ዋንጊሪያን ጌሊዴ፣ ቁፊሪናሆማ ቤዲኖ።

25 ኣሳይ ዩሱሳ ኣባፔ ሄፊንላን ዴሜዳ ዋይ፣ «ታማሪሲያዎ፣ ሃዋ ኣዉዴ ያዲ?» ያጌዲኖ።

26 ዩሱሲ ዛሪዴ፣ «ታኒ ሂንቲንቲሲ ቱሙዋ ኦዳይ፣ ሂንቲንቲ ታና ኮዩያዋ ኡኪላ ሜዳ ዲራሳኔ ካሌዳ ዲራሳ ጊዲያዋፔ ኣቲን፣ ዋልቃማ ማላታ ቤዒዳ ዲራሳ ጊዴና። 27 ሜዲና ዴዑዋ ቁማው፣ ታኒ ኣሳ ናሳይ ሂንቲንቲሲ ኢማናዎ፣ ኦሴፔፔ ኣቲን፣ ሳሚያ ቁማው ኦላፕቲ፣ ኣዩሲ ጎፔ፣ ኣዉ ያሳይ ሄዋ ዲሺሳናው ማታፋ ኣታሚ ዋሌዳ» ያጌዲ።

28 ሄዋፔ ጉዩያን ኡንቱንቲ፣ «ኮኒ ያሳ ኦሱዋ ኦላናው ኣያ ኦላናው ቤሲ?» ያጌዴ ዩሱሳ ኦቹዲኖ።

29 ዩሱሲ ዛሪዴ፣ «ሂንቲንቲ ኦላና ማላ፣ ያሳይ ኮዩያ ኪታይ ሃዋ፣ ኢ ኪቲዳዋን ኣማኒቲ» ያጌዲ።

30 ኡንቱንቲ ዛሪዴ፣ «ኮኒ ቤዒዴ፣ ኔናን ኣማናና ማላ፣ ኣይ ዋልቃማ ማላታ ኦላን? ኣያ ኪቲታኒ? 31 ያሳ ማፃፋን፣ ለኡንቲንቲ ማና \* ማላ ሳሉዋፔ ኡኪላ ኢሜዳ) ያጌቲ ፃፊቶዋዳን፣ ኦ ኣዋቲ ሜላ ቢታን ማና ሜዲኖ» ያጌዲኖ።

32 ዩሱሲ፣ «ታኒ ሂንቲንቲሲ ቱሙዋ ኦዳይ፣ ሂንቲንቲሲ ሳሉዋፔ ቱሙ ኡኪላ ኢሚያዋ ታ ኣባፔ ኣቲን፣ ሂንቲንቲሲ ሳሉዋፔ ኡኪላ ኢሜዳዋ ሙሳ ጊዴና። 33 ኣዩሲ ጎፔ፣ ቱማ ጊዴዳ ያሳ ኡኪላይ፣ ሳሉዋፔ ዋዲያዋ ሃ ኣላሚያ ኣሳው ዴዑዋ ኢሜ» ያጌዲ።

---

\* 6:31 ማና፡ ኢስራዒሊያ ኣሳይ ጊብፂ ጋዲያፔ ኬሲ ካናኔ ቢዴ ሜላ ቢታን ሃሜቲዴ ቢያ ዋይ፣ ኡንቲንቲ ማናዳን ያሳይ ኢሜዳ ማልዒያ ቁማ። ማና ጉሳይ ኢብራዩስኒያ ቃላን «ሃዌ ኣዩ?» ጊያዋ። 6:31 ኬስ 16:4፣ 15፣ ማዝ 78:24



34 ኡንቲንቲ ዛሪዳ፡ «ጎዳው፡ ኑካ ሄ ኡከላ ኡባ ዎዳ ኢማ» ያጌዲኖ።

35 ዬሱሲ፡ «ታኒ ዳዑዎ ኡከላ፤ ታኮ ዩያ ኡራይ ኡባካ ኮሻቲና። ቃሲ ታና ኣማኒያ ኡራይ ኣይኔ ሳሜቲና። 36 ሺን ታኒ ሂንቲንቲሲ ኦዳዳዎዳን፡ ሂንቲንቲ ታና ቤዔዲታ፤ ሺን ኣማኒኪታ። 37 ታ ኣቡ ታው ኢሚያ ኡባይ ታኮ ያናዎ፤ ቃሲ ታኮ ዩያ ኦናኔ ኡባካ ታኒ ካሪ ዬዲኬ። 38 ኣዪሲ ጎፔ፡ ታኒ ታና ከቲዳዎ ሺኒያ ፖላናው ሳሉዋፔ ያዲፔ ኣቲን፡ ታ ሺኒያ ፖላናው ያቤይኬ። 39 ታና ከቲዳዎ ኮዩያዌ ሃዎ፤ ታኒ ኢ ታው ኣሜዳ ኡባቲዋካ ወርሴላ ጋላሲ ዳንላናፔ ኣቲን፡ ኣቲዋካ ባዩዛና ማላ ኮዩና። 40 ኣዪሲ ጎፔ፡ ታ ኣቡ ኮዩያዌ ሃዎ፤ ታና ናዓ ቤዒዳ፡ ኣማኒያ ኡባቲ ሜዲና ዳዑዎ ኣካናዋንታ፤ ታኒካ ሄ ኡባቲዋ ወርሴላ ጋላሲ ዳንላና» ያጌዲኖ።

41 ዬሱሲ፡ «ታኒ ሳሉዋፔ ዎዳዳ ኡከላ» ጌዳ ዲራው፡ ኣዪሁዳቲ ኣ ቦላ ዙዙሚዲኖ። 42 ኡንቲንቲ፡ «ሃዌ ኑኒ ኣ ኣዉዋኔ ኣ ኣቶ ኤሪያ ዮሴፎ ናዓ ዬሱሳ ገዴኔ? ያቲና፡ ኢ ዋጊዳ፡ «ታኒ ሳሉዋፔ ዎዳዳ» ጋናው ዳንዳዩ?» ያጌዲኖ።

43 ዬሱሲ ዛሪዳ፡ «ኢቲ ኢቲዋና ዙዙሚያዎ ኣገቲ። 44 ታና ከቲዳ ታ ኣቡ ታኮ ኣሄዳ ኣሳፔ ኣቲን፡ ታኮ ያናው ዳንዳዩያ ኣሳይ ባዎ፤ ታኒካ ወርሴላ ጋላሲ ኣ ዳንላና። 45 ናባቲ (የሳይ ኣሳ ኡባ ታማሪሳና) ያጊዳ ፃፊዲኖ፤ ኣዉ ጊያዎ ሲሲያዌኔ ኣዉዋፔ ታማሪያዌ ኦኒኔ ታኮ ዩ። 46 ያሳ ማታፔ ዬዳዋፔ ኣቲን፡ ያሳ ቤዔዳ ኣሳይ ባዎ፤ ኣ ፃላላይ ያሳ ቤዔዳ።

47 «ታኒ ሂንቲንቲሲ ቱሙዎ ኦዳይ፤ ታና ኣማኒያ ኡራው ሜዲና ዳዑ ዳዔ። 48 ታኒ ዳዑዎ ኡከላ። 49 ሂንቲንቲ ኣዎቲ ሜላ ቢታን ማና ሜዲኖ፤ ሺን ሃይቄዲኖ። 50 ኣሳይ ኣፔ ሚዳ ሃይቄና ኡከላይ ሳሉዋፔ ዩያዌ ሃዎ። 51 ሳሉዋፔ ዎዳዳ ዳዑዎ ኡከላይ ታና፤ ኦኒኔ ሃ ኡከላፔ ሞፔ፡ ሜዲናው ዳዓናዎ፤ ቃሲ ሃ ኣላሚያ ኣሳው ዳዩ ገዳና ማላ፡ ታኒ ኣማና ኡከላይ ታ ኣሹዋ» ያጌዲኖ።

52 ኣዪሁዳቲ፡ «ሃ ቢታኒ ባሪ ኣሹዋ ኑኒ ማና ማላ፡ ኑሲ ዎቲዳ ኣማናው ዳንዳዩ?» ያጊዳ ባሪንቲ ጊዲዋን ፓሉሜቲዲኖ።

53 ሄዎ ዲራው፡ ዬሱሲ ኡንቲንታ፡ «ታኒ ሂንቲንቲሲ ቱሙዎ ኦዳይ፤ ታ ኣሹዋ፡ ኣሳ ናዓ ኣሹዋ፡ ሂንቲንቲ ማና ዳዮፔ፡ ቃሲ ታ ሱላካ ኡሻና ዳዮፔ፡ ሂንቲው ዳዑ ባዎ። 54 ታ ኣሹዎ ሚያ ኡራውኔ፡ ታ ሱላ ኡሺያ ኡራው ሜዲና ዳዑ ዳዔ። ታኒ ወርሴላ ጋላሲ ኡንቲንታ ዳንላና። 55 ኣዪሲ ጎፔ፡ ታ ኣሹ ቱሙ ቁማ፤ ታ ሱላይካ ቱሙ ኡሻ። 56 ታ ኣሹዎ ሚያ ኡራይኔ ታ ሱላ ኡሺያ

ኡራይ ታናን ደዌ፤ ታኒካ አናኒ ደዌ። 57 ደዑዋ አዉ ታና ኪቲና፤ ታኒ ኣ ጋሱዋን ደዌያዎዳን፤ ታና ሚያ ኡራይካ ታ ጋሱዋን ደዌና። 58 ሳሉዋፕ ዎዴዳ ኡኪሳይ ሃዎ፤ ሂንቴንቱ አዎቱ ሚዴ ሃይቁዳ ማና ማላ ጊዴና፤ ሃ ኡኪሳ ሚያ ኡራይ ሜዲናው ደዌና» ያጌዳ። 59 ዬሱሲ ቂጌሪናሆማ ካታማን ኣዪሁዳ ዎሳ ጎሌን ታማሪሲዳ፤ ሃዎ ኦዴዳ።

**ሜዲና ደዑዋ ቃላ**

60 ዬሱሳ ካሊያዎንቱፔ ደሪያ ባጋይ ሄዎ ሲሴዳ ዎዴ፡ «ሃዎ ጌሌና ቲሚርቲያ፤ ሃዎ ኦኒ ኣካናዌ?» ያጌዳና።

61 ሺን ዬሱሲ ባሬና ካሊያዎንቱ ሄዎ ዙዙሜዳዎ ኤሪዴ፤ «ሃዎ ሂንቴንታ ቆሲ? 62 ሲሚ ታኒ፤ አሳ ናዓይ፤ ካሴ ደዌያሳ ፑዴ ኬሲሺን ቤዒንቶ ኣያ ጋኒቱ? 63 ጌሻ ኣያናይ ደዑዋ ኣሚ፤ አሳ ሚናታይ አይኔ ጎዌና። ታኒ ሂንቴንቱሲ ኦዴዳ ቃላይ ኣያናኔ ደዑዋ። 64 ሺን ሂንቴንቱ ጊዴዎን ኣማኔናዎንቱ ደዌና» ያጌዳ፤ አዪሲ ጎፔ፤ ኣማኔናዎንቱ ሃቃዎንቱንቶኔ ባሬና ኣሊ ኢማናዌ ኦኔንቶ ዬሱሲ ከይርፔ ደሚዴ ኤሬዳ። 65 ቃሲካ ዬሱሲ፤ «ታ ኣሱፔ ጊዳና ቆፕፔ ኦኒኔ ታኮ ያናው ዳንዳዬና ያጋዴ ታ ኦዴዳዎ ሄዎ ዲራሳ» ያጌዳ።

66 ሄዎ ጋሱዋን፤ ዬሱሳ ካሊያዎንቱፔ ጮራቱ ኣ ኣጊዴ፤ ጉዬ ሲሚዲና፤ ላዒንሉ ኣ ካሊቤይኪና። 67 ዬሱሲ ቃሲ ታማኔ ላዑ ባሬና ካሊያዎንታ፤ «ሂንቴካ ኣጊዴ ባናው ኮዩቱ?» ያጌዳ።

68 ሲሞኒ ጳዒርሴ ዛሪዴ፤ «ጎዳው፤ ኦኒ ኦኮ ባኔ? ኔው ሜዲና ደዑዋ ቃላይ ደዌ። 69 ኔኒ ያሳ ጌሻ ጊዲያዎ ኦኒ ኣማኔቶኔ ኤሬቶ» ያጌዳ።

70 ዬሱሲ ኡንቴንታ፤ «ታኒ ሂንቴንታ ታማኔ ላዒቱዎ ደራቤይኪታ? ቃሲ ሂንቴፔ ኢቱ ፃላሂያ» ያጌዳ። 71 ዬሱሲ ሄዎ ሲሞና ናዓ ዪሁዳ ኣስቆርታ † ጌ፤ ኣዪሲ ጎፔ፤ ዪሁዳይ ዬሱሳ ካሊያ ታማኔ ላዒቱዎፔ ኢቱዎ፤ ኢ ዬሱሳ ኣሊ ኢማናዎ።

**7**

**ዬሱሲ ዲሲያ ባላሲ ዬራሳላሜ ቤዳ**

1 ሄዎፔ ጉዬ፤ ዬሱሲ ጋሊላን ያ ሃ ዪዬዳ፤ ኣዪሁዳቱ ኣ ዎቆናው ኮዪያ ዲራው፤ ዪሁዳን ዪያና ኮዪቤና። 2 ኣዪሁዳቱ ቦንቺያ ዲሲያ ባላይ ጋኪ ኡቲዳ። 3 ሄዎ ዲራው፤ ዬሱሳ ኢሻቱ ኣ፤ «ኔና ካሊያዎንቱ ኔኒ ኦሊያዎ ቤዓና ማላ፤ ሃዎፔ ዴንዳዴ ዪሁዳ

† 6:71 ኣስቆርታ፡ ሃ ቃላ ቢሊላይ፡ «ዎሬቲያ ቢታኒያ» ዎይ «ሃይቆ ኣሊ ኢሚያ ቢታኒያ» ጊያዎ። 7:2 ዎግ 23:34፤ ዛር 16:13

ጋዲያ ባ። 4 አዩሲ ሳፔ፣ ባሬው ኤሬታናው ኮዩያ አሳይ ኦኒኔ ባሬ ኦሱዋ ገንጮና። ኔኒ ሃዋንታ ኦሊና፣ ኔባ አላሚያ ኡባይ ኤር!» ያጌዲና። 5 አዩሲ ሳፔ፣ ሃራይ አቶ አ ኢሻቱካ አ አማኒቤይኪና።

6 ዩሱሲ ኡንቱንታ፣ «ታው ኢንጃቲያ ዎዲ ጋኪቤና፤ ሺን ሂንቱንቱሲ አይ ዎዴካ ኢንጃቲ። 7 ሳባይ ሂንቱንታ ኢፃናው ዳንዳዬና፤ ሺን ታኒ ሳባ ኪታይ ኢታ ጊዲያዎ ማርካቲያ ዲራው፣ ታና ኢፃዳ። 8 ባላ ቦንቲያሳ ሂንቱንቱ ቤቲ፤ ታው ኢንጃቲያ ዎዲ ጋኪቤና ዲራው፣ ታኒ ባላ ቦንቲያሳ ባናዌ ቤራ» ያጌዳ። 9 ኢ ሃዋ ጊዳ፣ ጋሊላን አቲዳ።

**ዩሱሲ ዳሲያ ባላሳን ቤቲዳ**

10 ሺን አ ኢሻቱ ባላ ጋላሳ ቦንቲያሳ ቤዳዋፔ ጉዩያን፣ ኢካ አሳይ ቤዔናን ጌማን ያ ቤዳ። 11 አዩሁዳቱ ባላ ጋላሳ ቦንቲያሳን አ ኮዩኖኔ፣ «ኢ ሃቃን ዳዒ?» ያጊዳ፣ አ ላቢና።

12 አሳ ጊዲዋን ዳር ዙዙንሳይ ዴንዴዳ። አማሬዳ አሳይ፣ «ኢ ሎጾ አሳ» ያጌ፤ ሃራቱ ቃሲ፣ «አ፣ ኢ አሳ ባሌሌ» ያጊኖ። 13 ሺን አዩሁዳቱ ያዩዳ ዲራው፣ ኦኒኔ አባ ቆንጨያን ሃሳዬና።

14 ባላ ቦንቲያ ጋላሳ ባጋን፣ ዩሱሲ ጌሻ ጎሊያ ቤዳ፣ ታማሪሱዋ ደሚዳ። 15 አዩሁዳቱ ማላሌቲዳ፣ «ሃ ቤታኒ አይኔ ታማሪናን ሃዋ ከና ዋኒ ኤሬዳ?» ያጌዲና።

16 ሄዋ ዲራው፣ ዩሱሲ ዛሬዳ፣ «ታና ታማሪሲያዌ ታና ከቲዳ ያሳ ማታፔ ዩያዋፔ አቲን፣ ታዋ ጊዳና። 17 ያሳ ሺኒያ ኦሳናው ደሲያ ኦኒኔ ሃ ታኒ ታማሪሲያዌ ያሳ ማታፔ ዩንቶ ዎይ ቃሲ ታኒ ታፔ ሃሳያዩታንቶ ኤራና። 18 ባሬዋ ሃሳዩያ ኡራይ ባሬ ሁጺያሲ ቦንቲዋ ኮዬ፤ ሺን ባሬና ከቲዳዌ ቦንቲታና ማላ ኮዩያ ኡራይ ቱማንቻ፤ አኒ ዎርደባይ ባዋ። 19 ሙሴ ሂንቱንቱሲ ሂጊያ ኢሚቤኔ? ሺን ሂንቲፔ ኢቱኔ ሂጊያ ናጌና። ታና አዩሲ ዎጳናው ኮዩቲ?» ያጌዳ።

20 አሳይ ዛሬዳ፣ «ኔናን ፃላሂ ዳዔ፤ ኔና ዎጳናው ኦኔ ኮዬዳዌ?» ያጌዳ።

21 ዩሱሲ፣ «ታኒ ኢቲ ዎልቃማባ ኦሊና፣ ሂንቱንቱ ኡባይ ማላሌቲዳታ። 22 ሂንቱንቱ ናና ሂንቱንቱ ደካላና ማላ፣ ሙሴ ሂንቱንታ አዛዜዳ። ሺን ደካሉሳይ ሂንቱንቱ አዋቱዋና ዩዳዋፔ አቲን፣ ሙሴና ዩቤና፤ ሄዋሲ ሂንቱንቱ ሳምባታን አቲማ ናና ደካሊታ። 23 ሙሴ ሂጊ አዛዜዳ ዲራው፣ ሂንቱንቱ ሳምባታን ደካሊያዋ ጊደፔ፣ ያቲና ታኒ ኢቲ አሳው ኩሜንሳ ቦላ ፓሌዳ

ዲራው፡ ታና አደሲ ሃንቄቲቲ? 24 ቱሙ ፐርዳ ፐርዲቲፔ ኦጉን፡ አሳ ዳሙዋ ዪሊዳ ፐርዶፐቲ» ያጌዳ።

**ሃዌ ኪሪሰቶሴ?**

25 ሄዋ ዲራው፡ ዩሩሳላሜ አሳፔ ኢቱ ኢቱ፡ «ኢንቴንቴ ዋዳናው ኮዪያ ቢታኒ ሃዋ ጊዳይ? 26 ቤዒቲ፡ ቆንጨያን ኢ ሃሳዬ፤ ኢንቴንቴ አ አይይ ጊኪኖ። ሃዌ ኪሪሰቶሳ ጊዲያዋ ኑ ካፓቱ ቱሙ ኤሪኖሻ? 27 ሺን ኮኒ አ ሃቃፔ ዬዳንቶ ኤሪይቲ፤ ኪሪሰቶሴ ዪያ ዋዳ፡ ኢ ሃቃፔ ዪንቶኔ ኦኒኔ ኤሪና» ያጌዲኖ።

28 ሄዋፔ ጉዪያን፡ ዩሱሲ ጌሻ ጎሊያን ታማሪሲዳ፡ ባሬ ቃላ ቋቁ ኡዲዳ፡ «ሂንቴንቴ ታና ኤሪታ፤ ቃሲ ታኒ ሃቃፔ ዬዳንቶካ ኤሪታ። ታኒ ታ ሺኒያን ያቤይኬ፤ ሺን ታና ኪቴዳዌ ቱማንቻ፤ ሂንቴንቴ አ ኤሪኪታ። 29 ሺን ታኒ አ ኤራይ፤ አደሲ ጎፔ፡ ኢ ታና ኪቴና፡ ታኒ አ ማታፔ ያዲ» ያጌዳ።

30 ሄዋ ዲራው፡ ኢንቴንቴ አ ኦይቃናው ኮዬዲኖ፤ ሺን አ ዋዲ ቢር ጋኪቤና ዲራው፡ ኦኒኔ አ ቦላ ኩሺያ ዋሊቤና። 31 ሺን ዳር አሳይ ዩሱሳ አማኒዳ፡ «ኪሪሰቶሴ ዪያ ዋዳ፡ ሃ ቢታኒ ኦሌዳ ማላታፔ ዳሪያዋ ኦላኔዬ?» ያጌዲኖ።

**ዩሱሳ ኦይቃናው ዋታዳራቱ ኪቴቲዲኖ**

32 ፓሪሳዋቱ ዳር አሳይ ዩሱሳባ ዙዙሚያዋ ሲሴዲኖ፤ ቄሳቱዋ ካፓቲኔ ፓሪሳዋቱ አ ኦይቁ ቃሺሳናው አማራዋ ዋታዳራቱዋ ኪቴዲኖ።

33 ዩሱሲ፡ «ታኒ ሂንቴናና ላፋ ጋሚዳና፤ ሄዋፔ ጉዪያን፡ ታና ኪቴዳዋኮ ባና። 34 ሂንቴንቴ ታና ኮያና፤ ሺን ዳሚኪታ፤ አደሲ ጎፔ፡ ታኒ ዳዒያ ሳዓ ሂንቴንቴ ባናው ዳንዳዪኪታ» ያጌዳ።

35 አዪሁዳቱ ኢቱ ኢቱዋና፡ «ሃዌ ኮኒ አ ዳሜናሳ ሃቃ ባና ሃኒ? አዪሁዳቱ ዳዒያ ጊሪኬ ካታማ ቢዳ፡ ጊሪኬ አሳቱዋ ታማሪሳና ሃኒ? 36 ኢ፡ (ሂንቴ ታና ኮያና፤ ሺን ዳሚኪታ) ቃሲ፡ (ታኒ ዳዒያሳ ሂንቴንቴ ባናው ዳንዳዪኪታ) ያጌ፤ ሄዋ ጊያዌ ዋጊያዌ?» ያጌዲኖ።

**ዴዑዋ አሚያ ሃላ**

37 ሄ ባላ ጋላሳ ቦንቹያ ጋላሳፔ ዋናቲያ ወርሴላ ጋላሳኒ ዩሱሲ ዳንዲ ኤቄዳ፡ ባሬ ቃላ ቋቁ ኡዲዳ፡ «ሳሜቲዳ ኡራይ ኦኒኔ ታኮ ዪዳ ኡሾ። 38 ታናን አማኒያዋ፡ ያሳ ማፃፋይ ጊያዋዳን፡ አ ኡሉዋፔ ዴዑዋ አሚያ ሃላ ፑልቱ ጎጋናዋ» ያጌዳ። 39 ኢ

ሄዎ አ አማኔዳዎንቱ አካና ጌሻ አያናባ ሃሳዬዳ። ዬሱሲ ቢሮ ባሬ ቦንቹዋኮ ኬሲቤና \* ዲራው፣ ሄ ዎዴ ጌሻ አያናይ ኡንቱንቶ አሜቲቤና።

**አሳ ጊደን ማዴቲዳ ጳልቄሳ**

40 ሄ አሳፔ ዳሪያ ባጋይ ኢ ጊያዎ ሲሲዳ፣ «ቱሙ ሃዌ ናጌቲያ ናቢያ» ያጌዲኖ።

41 ሃራንቱ፣ «ሃዌ ኪሪሰቶሳ» ያጌዲኖ።

ሺን ሃራንቱ ቃሲ፣ «ኪሪሰቶሲ ጋሊላፔ ዬና። 42 ያሳ ማፃፋይ፣ «ኪሪሰቶሲ ዳዊቱ ዛሪያፔ፣ ዳዊቱ ዴዔዳ ቤቲሊሄሚ ካታማፔ ያና፣ ጌኔዬ?» ያጌዲኖ። 43 ዬሱሳ ጋሱዋን አሳይ ባሬ ጊዲዋን ሻኬቱዳ። 44 ሄ አሳፔ ኢቱ ኢቱ አ ኦይቃናው ኮዬዲኖ፤ ሺን ኩሺያኒኔ አ ቦቹቤይኪኖ።

45 ጌሻ ጎሊያ ናጊያዎንቱ ቄሳቱዋ ካፓቱዋኮኔ ፓሪሳዋቱዋኮ ሲሚ ዬዳ ዎዴ ኡንቱንቱ ናጊያዎንታ፣ «አዪሲ አ አሂቤይኪቱ?» ያጊዴ ኦቹዲኖ።

46 ጌሻ ጎሊያ ናጊያዎንቱ ኡንቱንቱሲ፣ «ሃ ቢታኒ ሃሳዬዳዎዳን፣ ኡባካ ኦኒኔ ሃሳዬቤና!» ያጊዴ ዛሬዲኖ።

47 ፓሪሳዋቱ ዛሪዳ፣ «ኢ ሂንቱናካ ባሌሉዋ? 48 ካፓቱዋፔ ዎይ ፓሪሳዋቱዋፔ አ አማኔዳ አሳይ ዴዒ? 49 ሺን ሂጊያ ኤሬና ሃ አሳይ ሸቄቲዳዋ» ያጌዲኖ።

50 ኡንቱንቱፔ ኢቱ ካሴና ዬሱሳኮ ቤዳ ኒቆዲሞሲ ኡንቱንታ፣

51 «ኢቲ ኡራይ ጊያባ ሲሴናን ዎይ ኢ አያ ኦሴዳንቶ ኤሬናን ዴዒዳ፣ ካሴቲዳ አ ቦላ ፒርዲያዌ ኦ ሂጊያን ዴዒ?» ያጌዳ።

52 ኡንቱንቱ ዛሪዳ አ፣ «ኔኒካ ቃሲ ጋሊላ ጋዲያ አሴ? ጋሊላ ጋዲያፔ ናቢ ቤቲናዋ ያሳ ማፃፋቱዋ ቢዳዴ ኤራ» ያጌዲኖ።

**ዎሹማዴ አይቄቲዳ ሚሺራቶ**

53 አሳይ ኡባይ አጊዳ፣ ባሬ ሶይ ባሬ ሶይ ቤዳ።

**8**

1 ሺን ዬሱሲ ዎጋራ ሚሳን ኤሬቲዳ ዴሪያኮ ቤዳ። 2 ዎንቱሳ ጋሊሲ ጉራን ጌሻ ጎሊያ ሲሜዳ፤ ኡባ አሳይ አኮ ዪና፣ ኡቲዴ ኡንቱንታ ታማሪሱዋ ደሚዳ። 3 ሙሴ ሂጊያ ታማሪሲያዎንቱኔ

\* 7:39 ዬሱሲ ቢሮ ባሬ ቦንቹዋኮ ኬሲቤና፣ የሃኒሳ ሚሺራቶቹዋ ቃላን፣ ዬሱሳው ኩሚንሳ ቦንቹ አሜቲዳዳ፣ ኢ ማሰቃሊያ ቦላን ካቄቲዳ ዎዴኔ ባሬ አሱ ኡሸቻ ባጋን ኡታናው ሃይቁዋ ዶኒዴ ዴንዴዳ ዎዲያና ጊዲያዋ ቆንጫሴ። 7:42 2ሳዎ 7:12፤ ሚክ 5:2

ፓሪሳዎቹ ዋሹሚሺን ኮይቄቲዳ ኢቲ ሚሺራቶ አኮ አሄዲኖ። ኢንቴንቴ አሳ ኡባ ሲንሳን ኢዞ ኤሲዳ ዩሱሳ። 4 «ታማሪሲያዎ፣ ሃ ሚሺራታ ዋሹማዳ ኮይቄታዲ። 5 ሂጊያ ቦላን ሙሴ ሃኒ ማላ ማጫ አሳ ሹቻን ጫዳና ማላ፣ ኑና አዛዜዳ። ያቲና ኔኒ ዋጋይ?» ያጌዲኖ።

6 ኢንቴንቴ ሄዋ ጌዳዌ ዩሱሳ ሞቲያዎ ዳሚዳ አ ፓጫናሳ፤ ሺን ዩሱሲ ሆኪዳ። ባሬ ቢራዲያን ቢታ ቦላ ፃፌዳ። 7 ኢንቴንቴ አ ኦቺዳ አጌናን ኢዲና፣ ፑዳ ዶቁ ጊዳ፣ «ሂንቴንቴ ጊዲዋን ናጋራ ኦሊቤና አሳይ ካሴቲዳ፣ ኢዞ ሹቻን ጫዳ» ያጌዳ። 8 ቃሲካ ሆኪዳ፣ ቢታ ቦላ ፃፌዳ።

9 ኢንቴንቴ ሄዋ ሲሴዳ ዎዳ፣ ካሴቲዳ ጨማቱ ኬሲና፣ ኢቲ ኢቲ ኬሲዳ ወሬዲኖ፤ አ ሲንሳን ሚሺራታ ኤቃ ዳሲሺን፣ ዩሱሲ ባሬ ፃላላ አቲዳ። 10 ኢ ፑዳ ዶቁ ጊዳ ሚሺራቶ፣ «ሚሺራቲ፣ አሳቱ ሃቃን ዳሲኖ? ኦኒኔ ኔ ቦላ ፐርዲቤኔ?» ያጌዳ።

11 ሚሺራታ፣ «ጎዳው፣ ኦኒኔ ታ ቦላ ፐርዲቤና» ያጋዲ። ዩሱሲ ኢዞ፣ «ታኒካ ኔ ቦላ ፐርዲኬ፤ ባ፤ ላዔንሳዳ ናጋራ አላፓ» ያጌዳ። \*

12 ቃሲካ ዩሱሲ አሳው፣ «ታኒ አላሚው ፖዑዋ፤ ታና ካሊያ ኦኒኔ ዳዑዋ አሚያ ፖዑዋ ዳማናፔ አቲን፣ ቋሚኒ ኡባካ ሃሚቲና» ያጌዳ ሃሳዩዳ።

13 ሄዋፔ ጉዬ ፓሪሳዎቹ፣ «ኔኒ ኔባ ማርካታሳ፤ ኔ ማርካቲላይ ቱማ ጊዳና» ያጌዲኖ።

14 ዩሱሲ ዛሪዳ፣ «ታኒ ታባ ማርካቶፔካ፣ ታ ማርካቲላይ ቱማ፤ አዩሲ ጎፔ፣ ታኒ ሃቃፔ ያዲታንቶኔ ቃሲ ሃቃ ባይታንቶ ኤራይ፤ ሺን ሂንቴንቴ ኤሪኪታ። 15 አሳይ ፐርዲያ ኦጊያን ሂንቴንቴ ፐርዲታ፤ ታኒ ኢቲ ኡራ ቦላካ ፐርዲኬ። 16 ሺን ታኒ ፐርዲያዎ ጊዳፔኔ፣ ታ ፐርዲይ ቱማ፤ አዩሲ ጎፔ፣ ታና ኪቲዳ ታ አቡ ታና ዳዔፔ አቲን፣ ታኒ ታሬካ ዳሲኬ። 17 ላዑ አሳ ማርካቲላይ ቱማ ጊዲያዌ ሂንቴንቴ ሂጊያን ፃፌቲ ኡቲዳ።

18 ታኒ ታባ ታ ሁጳው ማርካታዲ፤ ቃሲ ታና ኪቲዳ ታ አቡካ ታባ ማርካቲ» ያጌዳ።

19 ኢንቴንቴ፣ «ኔ አቡ ሃቃን ዳሲ?» ያጌዳ ዩሱሳ አቺዲኖ። ዩሱሲ ዛሪዳ፣ «ሂንቴንቴ ታናካ ዎይ ታ አባካ ኤሪኪታ፤ ታና ኤሪዳዎ ጊዲንቶ፣ ታ አባካ ኤሪኪታ» ያጌዳ።

8:5 ዎግ 20:10፤ ዛር 22:22-24 \* 8:11 ኢቲ ኢቲ ቤኒ ፃፌቲዳ ገሻ ማፃፋቱዋን ሃ ፓይዲ ባዎ። 8:17 ዛር 19:15

20 ዬሱሲ ጌሻ ጎሊያ ታማሪሲዳ፡ አሞታ ሚሻይ ኡቲያ ሳይኒያ ማታን ሄዋ ሃሳዬዳ። አ ኦኒኔ ኦይቂቤና፤ አዩሲ ጎፔ፡ አ ዎዲ ቢሮ ጋኪዲጊቤና።

አማኔናን ኢዪዳዋንቱሲ አሜቲዳ ሚኖ አኬኪሱዋ

21 ቃሲካ ዬሱሲ ኡንቱንታ፡ «ታኒ ባና ሂንቱንቱ ታና ኮያና፤ ሺን ሂንቱንቱ፡ ሂንቱንቱ ናጋራን ሃይቃኒታ። ታኒ ቢያ ሳዓካ ባናው ሂንቱንቱ ዳንዳዩኪታ» ያጌዳ።

22 አዩሁዳቱ፡ «ኢ፡ ሩታኒ ቢያሳ ሂንቱንቱ ባናው ዳንዳይኪታ» ያጌ፤ ኢ ባሪና ባሪካ ዎቆኔዬ?» ያጌዲኖ።

23 ዬሱሲ ዛሪዳ፡ «ሂንቱንቱ ጋርሳ አሳ፤ ታኒ ቦላ አሳ። ሂንቱንቱ ሃ አላሚያ አሳ፤ ታኒ ሃ አላሚያ አሳ ጊዲኬ።

24 ሂንቱንቱ፡ ሂንቱንቱ ናጋራን ሃዩቃናዋ ታኒ ሂንቱንቱሲ ኦዴዳዌ ሃዋሳ፤ ታኒ ታና † ጊዲያዋ ሂንቱንቱ አማናና ቆዮፔ፡ ሂንቱንቱ፡ ሂንቱንቱ ናጋራን ሃያኒታ» ያጌዳ።

25 ኡንቱንቱ፡ «ኔኒ ኦኔ?» ያጌዳ ኦቼዲኖ።

ዬሱሲ ዛሪዳ፡ «ታኒ ታና። 26 ታኒ ሂንቱባ ሃሳዩያባይኔ ፐርዲያባይ ዳርባይ ዴዴ። ሺን ታና ኪቲዳዌ ቱማንቻ፤ ቃሲ ታኒ ኦፔ ሲሴዳዋ አላሚያ አሳው ኦዳይ» ያጌዳ።

27 ኢ ባሪ አዉዋባ ሃሳዩያዋ ኡንቱንቱ አኬኪቤይኪኖ። 28 ሄዋ ዲራው፡ ዬሱሲ ኡንቱንታ፡ «ታና አሳ ናዓ ሂንቱንቱ ማሰቃሊያ ቦላ ፑዴ ዴንሊያ ዎዴ፡ ታኒ ታና ጊዲያዋኔ ቃሲ ታኒ ታ አቡ ታና ታማሪሴዳዋዳን ሃሳዩያዋፔ አቲን፡ ታ ሺኒያን አይኔ ኦሌናዋ ሂንቱንቱ ኤራኒታ። 29 ቃሲ ታና ኪቲዳዌ ታናና ዴዴ፤ ታኒ ኡባ ዎዴ አ ናሼቺያዋ ኦሊያ ዲራው፡ ኢ ታ ፃላላ አጊቤና» ያጌዳ።

30 ዬሱሲ ሄዋ ሃሳዩሺን ሲሴዳ ዳር አሳይ አ አማኔዲኖ።

ናጋራ አይሌቲላፔ ላዓ ኬሳ

31 ዬሱሲ ባሪና አማኔዳ አዩሁዳቱዋ፡ «ሂንቱንቱ ታኒ ታማሪሲያዋ አዛዜቶፔ፡ ቱሙ ታና ካሊያዋንታ። 32 ሂንቱንቱ ቱማቲላካ ኤራኒታ፤ ቃሲ ቱማቲላይ ሂንቱንታ አይሌቲላፔ ኬሳናዋ» ያጌዳ።

33 ኡንቱንቱ ዛሪዳ፡ «ኦኒ አብራሃዎ ዛሬ፤ ኦኒ ኦሲኔካ አይሌቲቤይኮ። ያቲና ኔኒ ዋጋዴ፡ ላይሌቲላፔ ሂንቱንቱ ኬሳኒታ» ጋይ?» ያጌዲኖ።

34 ዬሱሲ፡ «ታኒ ሂንቱንቱሲ ቱሙዋ ኦዳይ፤ ናጋራ ኦሊያ ኦኒኔ ናጋራ አይሊያ። 35 አይሊ ኡባ ዎዴ ሶዩን ዴዴና፤ ሺን ናዓይ

† 8:24 ታኒ ታና፡ አዩሁዳ አሳሲ ዎልቃማኔ ጌሻ ጊዴዳ ያሳ ሱንላይ «ያሀዌሀ» ጊዲዳ፡ ሃዋ ቢሌላይካ ታኒ ታና ጊያዋ።

ሜዲናው ጎሌን ዴዔ። 36 ናዓይ ሂንቴንታ አይሌቴላፔ ኬሶፔ፣ ሂንቴንቱ አይሌቴላፔ ቱሙ ኬሳኒታ። 37 ሂንቴንቱ አብራሃም ዛሬ ገዲያዋ ታኒ ኤሪይ፤ ሺን ታ ታማሪሲያዋ ሂንቴንቱ አኬና ዲራው፣ ታና ዎዳናው ኮዪታ። 38 ታኒ ታ አቡ ታና ቤሴዳዋ ሃሳያይ፤ ቃሲ ሂንቴንቱካ ሂንቴንቱ አዉዋፔ ሲሴዳዋ አሊታ» ያጌዳ።

39 ኡንቴንቱ ዛሬዴ፣ «ኑ አቡ አብራሃማ» ያጌዲኖ።

ዬሱሲ ኡንቴንታ፣ «ሂንቴንቱ አብራሃም ናና ገዴዴንቶ፣ ኢ አሌዳ እሱዋ ማላ አላኒታ። 40 ሺን ያሳፔ ሲሴዳ ቱሙዋ አዴዳ ታና ሂንቴንቱ ዎዳናው ኮዪታ፤ አብራሃሜ ሄዋዳን አሊቤና። 41 ሂንቴንቱ፣ ሂንቴንቱ አዉ አሌዳዋ አሊታ» ያጌዳ።

ኡንቴንቱ ዛሬዴ፣ «ኑኒ ዎሹማን ዲቃላቴላ ዬሌቴቤይኮ፤ ኑሲ ኢቲ አዉ፣ ያሳ ያላላይ ዴዔ» ያጌዲኖ።

42 ዬሱሲ ኡንቴንታ፣ «ሂንቴንቱ ያሳ ናና ቱሙ ገዴዴንቶ፣ ታና ሲቃና፤ አዪሲ ጎፔ፣ ታኒ ያሳ ማታፔ ያዴ ሃዋን ዴዓይ። ታና ኢ ከቴዳዋፔ አቲን፣ ታኒ ታ ሼኒያን ያቤይኬ። 43 ታኒ ታማሪሲያዋ ሂንቴንቱ አኬከናዌ አያሴ? ታኒ ታማሪሲያዋ ሂንቴንቱ አኬና ዲራሳ። 44 ሂንቴንቱ፣ ሂንቴንቱ አዉዋ ኢታ አያና ናና፤ ቃሲ ሂንቴንቱ፣ ሂንቴንቱ አዉ አሞቲያዋ አላናው ኮዪታ። ኢ ካሴፔ ደሚዴ፣ ሸምፑዋ ዎዲዳዋ፤ ቱማቴላይ አኒ ባይና ዲራው፣ ቱማቴላኮ ሸቂ ኤሬና። ኢ ዎርዲዋ ሃሳዪያ ዎዴ፣ ባሬፔ ሃሳዬ፤ አዪሲ ጎፔ፣ ኢ ዎርዳንቻኔ ቃሲ ዎርደካ አዉዋ። 45 ሺን ታኒ ቱሙዋ ሃሳዪያ ዲራው፣ ሂንቴንቱ ታና አማኒኪታ። 46 ሂንቴፔ ታና ናጋራ አሊሺን ቤዓዲ ጋናው ዳንዳዪያዌ እኔ? ታኒ ቱሙዋ ሃሳዪያዋ ገደፔ፣ ታና አዪሲ አማኒኪቱ? 47 ያሳ አሳ ገዴዳ ኤሪይ ያሳይ ገያዋ ሲሴ፤ ሂንቴንቱ ያሳ አሳ ገዴና ዲራው፣ ያሳይ ገያዋ ሲሴኪታ» ያጌዳ።

ዬሱሲ አብራሃምፔ ካሴናካ ዴዔ

48 አዪሁዳቱ ዛሬዴ፣ «ኑኒ ኔና፣ ሳኒ ሳማሪያ አሳ፤ ኔናን ኢታ አያናይ ዴዔ» ገዴ ባዪዜዶ?» ያጌዲኖ።

49 ዬሱሲ ኡንቴንታ፣ «ታ ቦላ ኢታ አያናይ ባዋ። ታኒ ታ አባ ቦንቻይ፤ ሺን ሂንቴንቱ ታና ካዉሺታ። 50 ታኒ ታ ሁጲያሲ ቦንቻዋ ኮዪኬ፤ ሄዋ ታው ኮዪያዌኔ ፐርዲያዌ ዴዔ። 51 ታኒ ሂንቴንቱሲ ቱሙዋ አዳይ፤ ታኒ ታማሪሲያዋ ናገያ እኒኔ ኡባካ ሃይቄና» ያጌዳ።

52 አዪሁዳቱ ዛሬዴ፣ «ኔ ቦላ ኢታ አያናይ ዴዔያዋ ኑኒ ሃዒ ኤሬዶ። አብራሃሜ ሃይቄዳ፤ ናባቱ ሃይቄዲኖ፤ ሺን ኔኒ፣ ት



ቃላ ናገያ ኦኒኔ ኡባካ ሃይቄና) ያጋ። 53 ኔኒ ሃይቄዳ ኑ አወዋ ኣብራሃሞፔ ዳራይ? ናባቱ ቃሲ ሃይቄዳኖ። ኔኒ ኔና ኦና ጋዴ ቆፓይ?» ያጌዲኖ።

54 ዩሱሲ፡ «ታኒ ታና ቦንቾፔ፡ ታ ቦንቾ ማላ፤ ሂንቴንቱ ኑ ያሳ ገያ ታ ኣቡ ታና ቦንቾ። 55 ሂንቴንቱ ኣ ኤራና ጳዮፔካ፡ ታኒ ኣ ኤራይ። ታኒ ኣ ኤሪኬ ጎፔ፡ ሂንቴንቱዋዳን ዋርዶ ገዳይ፤ ሺን ታኒ ኣ ኤራይ፤ ቃሲ ኣ ቃላካ ናጋይ። 56 ሂንቴንቱ ኣዉ ኣብራሃሜ፡ ታ ዩሳ ዋዲያ ቤዓናው ላሞቲዳ፤ ቤዒዴካ ናሹቲዳ» ያጌዳ።

57 ኣዪሁዳቱ ዛሪዴ ኣ፡ «ኔው ሃራይ ኣቶ ኣሻታው ላይላ ኩሚቤናዌ ኣብራሃማ ቤዒዲ?» ያጌዲኖ።

58 ዩሱሲ ኡንቱንታ፡ «ታኒ ሂንቴንቱሲ ቱሙዋ ኦዳይ፤ ኣብራሃሞ ዩሌታናፔካ ካሴ ታኒ ታና» ያጌዳ።

59 ሄዋ ዲራው፡ ኡንቱንቱ ዩሱሳ ጫዳናው ሹቻ ኣኩዲኖ፤ ሺን ዩሱሲ ኡንቱንቱፔ ጌሜቲዴ፡ ጌሻ ጎሊያፔ ቤዳ።

# 9

## ዩሱሲ ቆቃ ገዲዴ ዩሌቲዳ ቢታኒያ ፓሌዳ

1 ዩሱሲ ቢዴ፡ ዩሌቶዴፔ ቆቃ ገዲዴ ዴዒያ ኢቲ ቢታኒያ ቤዒዳ። 2 ዩሱሳ ካሊያዋንቱ ዩሱሳ፡ «ታማሪሲያዎ፡ ሃ ቢታኒ ቆቃ ገዲዴ ዩሌታናዳን፡ ናጋራ ኦሌዳዌ ኦኔ? ኢ ኦሌዴዬ? ዋይ ኣ ዩሌዳዋንቱ ኦሌዲኖ?» ያገዴ ኦቼዲኖ።

3 ዩሱሲ፡ «የሳ ኪታይ ኣ ቦላን ቆንጫና ማላ ቆቄዳፔ ኣቲን፡ ኢ ዋይ ኣ ዳያኔ ኣ ኣቡ ናጋራ ኦሌቤይኪኖ። 4 ኦኒ ሳዓይ ቃሜናን ዴዒሺን፡ ታና ኪቲዳዋ ኦሱዋ ኦላናው ቤሴ። ኦኒኔ ኦላናው ዳንዳዬና ቃማይ ዩ። 5 ታኒ ኣላሚያን ዴዓዴ ኣላሚው ፖዎ» ያጌዳ።

6 ዩሱሲ ሄዋ ገዴ፡ ሳዓን ጨቼዳ፤ ባሬ ጨቻኒ ጉላ ኡርቃ ሹገሲዴ፡ ሄ ኡርቃኒ ቆቃ ቢታኒያ ኣይፊያ ኦኪዴ፡ 7 «ባዴ ሳሊሆማ ገያ ዳጋቲዳ ሃላን ኔ ኣይፊያ ሜጫ» ያጌዳ። «ሳሊሆማ» ገያዌ «ኪቲቲዳዋ» ጉሳ። ሄዋ ዲራው፡ ቢታኒ ቢዴ፡ ባሬ ኣይፊያ ሜጫቲዴ፡ ዪሊዴ ሲሜዳ።

8 ቢታኒያ ሹራቱኔ ቢታኒ ካሴ ዋሲሺን ቤዒዳ ኣሳይ፡ «ሃዌ ኡቲዴ ዋሲያ ቢታኒያ ገዴኔዬ?» ያጌዲኖ።

9 ቃሲ ኣማራዳዋንቱ፡ «ሃዌ ኣቲኔ» ያጌዲኖ። ሃራንቱ ቃሲ፡ «ቱይቲ፡ ሃዌ ኣ ማላቲያዋፔ ኣቲን፡ ኣ ገዴና» ያጌዲኖ።

ሺን ቢታኒ፡ «ታኒ ኣቲ» ያጌዳ።

10 ኡንቱንቱ ቢታኒያ፡ «ያተና፡ ኔ አይፊ ዋኒ ያሌዳ?» ያጌዳ ኦቹዲና፡፡

11 ኢ ዛሪዳ፡ «ዩሱሳ ጌቲቲያ ቢታኒ ጉላ ኡርቃ ሹጊሲዳ፡ ታ አይፊያ ኦኪዳ፡ ሳሊሆማ ጌቲቲያ ዳጋቲዳ ሃላኒ ባዴ ኔ አይፊያ ማጠቃታ» ያጌዳ፡፡ ታኒ ባዴ ማጠቃታዳ ያላዲ» ያጌዳ፡፡

12 ኡንቱንቱ ኣ፡ «ኢ ሃቃን ዳዒ?» ያጌዳ ኦቹዲና፡፡

ቢታኒ፡ «ታኒ ኤሪኬ» ያጌዳ፡፡

13 ኡንቱንቱ ካሴ ቆቂዳ ያሌዳ ቢታኒያ ፓሪሳዋቱዋኮ አፊዲና፡፡ 14 ዩሱሲ ኡርቃ ሹጊሲዳ፡ ቢታኒያ አይፊያ ፓሌዳ ጋላሳይ ሳሞባታ ጋላሳ፡፡ 15 ሄዋ ዲራው፡ ቢታኒ ዋኒ ያሌዳንቶኔ ፓሪሳዋቱ ኣ ጉጂዳ ኦቹዲና፡፡ ቢታኒ ኡንቱንቱሰ፡ «ኢ ታ አይፊያን ጉላ ኡርቃ ዋሌዳ፡፡ ታ አይፊያ ማጠቃታዳ ሃዒ ያላዲ» ያጌዳ፡፡

16 ፓሪሳዋቱዋፔ ኢቱ ኢቱ፡ «ሃዋ ኦሌዳ ቢታኒ ሳሞባታ ሂጊያ ናጌና ዲራው፡ ያሳ ማታፔ ዪቤና» ያጌዲና፡፡

ሺን ሃራንቱ፡ «ናጋራንቻ ኣሳይ ሃዋ ማላ ዋልቃማ ማላታ ዋኒ ኦላናው ዳንዳዪ?» ያጌዳ ኡንቱንቱ ባሬንቱ ጊዲዋን ሻኬቲዲና፡፡

17 ሄዋ ዲራው፡ ፓሪሳዋቱ ቢታኒያ ኢቱ ካላ ጉጂዳ፡ «ኢ ኔ አይፊያ ዶዩዳ ዲራው፡ ኣባ ዋጋይ?» ያጌዲና፡፡

ቢታኒ፡ «ኢ ናቢያ» ያጌዳ፡፡

18 ኣዪሁዳቱ ሄ ያሌዳ ቢታኒያ ኣቶኔ ኣዉዋ ያሲዳ ኦቻና ጋካናው፡ ቢታኒ ቆቃ ጊዳዳዋኔ ሃዒ ኢ ያሊያዋ ኣማኒቤይኪና፡፡

19 ኣዪሁዳቱ ኣ ኣቶኔ ኣዉዋ፡ «ሂንቲንቱ፡ (ቆቃ ጊዲዳ ዩሌቲዳ) ጊያ ሂንቲንቱ ናባይ ሃዌ? ያተና፡ ሃዒ ዋኒዳ ያሌዳ?» ያጌዳ ኦቹዲና፡፡

20 ቢታኒያ ዳያኔ ኣዉ፡ «ሃዌ ኦ ናባ ጊዳዳዋኔ ቆቃ ጊዲዳ ዩሌቲዳዋ ኦኒ ኤሪቶ፡፡ 21 ሺን ሃዒ ኢ ዋኒ ያሌዳንቶ፡ ኦኒ ኤርኮ፤ ዋይ ኣ አይፊያ ኦኒ ፓሌዳንቶ፡ ኦኒ ኤርኮ፡፡ ኣ ኦቹቲ፤ ኢ ዶንዛ ኣሳ፤ ባሬባ ሃሳያናው ዳንዳዬ!» ያጌዲና፡፡ 22 ቢታኒያ ዳያኔ ኣዉ ኣዪሁዳቶ ያዩዳ ዲራው፡ ሄዋ ጌዲና፤ ኣዪሲ ሳፔ፡ ኣዪሁዳቱ ዩሱሲ ኪሪሰቶሳ ያጌዳ ማርካቲያ ኡሪይ ዳዖፔ፡ ሄ ኡራ ኣዪሁዳ ዋሳ ሳሊያፔ ኪሳናው ካሴት ቆፋ ቃቺ ዋሌዲና፡፡

23 ኣ ዳያኔ ኣዉ፡ «ኢ ዶንዛ ኣሳ፤ ኣ ኦቹቲ!» ጌዳዌ ሃዋሳ፡፡

24 ሄዋ ዲራው፡ ቆቃ ጊዲዳ ዩሌቲዳ ቢታኒያ ኡንቱንቱ ሳዒንሱዋ ያሲዳ፡ «ያሳ ጋላታ፤ ሃ ቢታኒ ናጋራንቻ ጊዲያዋ ኦኒ ኤሪቶ» ያጌዲና፡፡

25 ቢታኒ፡ «ኢ ናጋራንቻ ጊዲያዋኔ፡ ጊዳናዋ ኤሪኬ፤ ታኒ ቆቃ ጊዲያዋኔ ሃዒ ያሊያዋ ሄ ኢቲባ ኤሪይ» ያጌዳ፡፡

26 ኡንቱንቱ ዛሪዳ ቢታኒያ፡ «ኢ ኔው ኣያ ኦሌዳ? ኢ ኔ ኣይፊያ ዋቲ ፓሌዳ?» ያጌዲኖ።

27 ኢ ኡንቱንታ፡ «ታኒ ሂንቱንቱሲ ኦዲዲ፤ ሲሲቤይኪታ፡ ኣዪሲ ላዔንሱዋ ሲሳናው ኮዪቲ? ሂንቱካ ዩሱሳ ካሊያዋንታ ጊዳናው ኮዪቲ?» ያጌዲ።

28 ኡንቱንቱ ኣ ቦሪዳ፡ «ኔኒ ሄ ቢታኒያ ካሊያዋ፤ ኦኒ ሙሳ ካሊያዋንታ። 29 ያሳይ ሙሴሲ ሃሳዬዳዋ ኦኒ ኤሬቶ፤ ሺን ሃ ቢታኒያ ጊዳ፤ ኢ ሃቃ፤ ዩዳንቶኔ ኦኒ ኤርኮ» ያጌዲኖ።

30 ቢታኒ፡ «ኢ ሃቃ፤ ዩዳንቶኔ ሂንቱንቱ ኤሬናዌ ማላሊሲያዋ፤ ሺን ኢ ታ ኣይፊያ ፓሌዳ! 31 ያሳው ያዪያ ኡራይኔ ያሳይ ኮዪያዋ ኦሊያ ኡራይ ዴያ፤ ሄ ኡራባ ያሳይ ሲሲያዋ፤ ኣቲን፡ ናጋራንታዋባ ሲሴና። 32 ቆቃ ጊዲዳ ዩሌቲዳ ኣሳ ኣይፊያ ኦኒኔ ፓሊና፡ ሳዓይ ሜዴቶዴ፤ ዶሚና፡ ሲሴቲ ኤሬና። 33 ሃ ቢታኒ ያሳ፤ ዩሴናዋ ጊዲንቶ፡ ኢቲባኔ ኦሳናዉካ ዳንዳዬና» ያጌዲ።

34 ኡንቱንቱ ዛሪዳ ኣው፡ «ኔኒ ናጋራን ዩሌታዴ ዲጤዳዋ ኦና ታማሪሳናው ኮያይ?» ያጌዲኖ፤ ኣዪሁዳ ዋሳ ጎሊያ፤ ካሬ ኣ ኬሴዲኖ።

**ዋዛና ቆቃቴላ**

35 ኡንቱንቱ ቢታኒያ ካሬ ኬሴዳዋ ዩሱሲ ሲሴዳ፤ ዩሱሲ ቢታኒያ ዴሚዳ፡ «ኣሳ ናዓ ኣማናይ?» ያጌዲ።

36 ቢታኒ ዩሱሳ፡ «ጎዳው፡ ታኒ ኣ ኣማናናዳን ኢ ኦኔ? ታው ኦዳሪኪ!» ያጌዲ።

37 ዩሱሲ ቢታኒያ፡ «ኔኒ ኣ ቤዓዳ፤ ሃ ኔናና ሃሳዪያዌካ ኣ» ያጌዲ።

38 ቢታኒ ዛሪዳ፡ «ጎዳው፡ ኣማናይ» ያጌዲ ዩሱሳው ጎዪኔዳ።

39 ዩሱሲ፡ «ቆቃቴ ጻላና ማላኔ ጻሊያዋንቱ ቆቃና ማላ፡ ታኒ ፒርዳናው ሃ ሳዓ ያዲ» ያጌዲ።

40 ኣናና ዴዒያ ኣማራዳ ፓሪሳዋቱ ሄዋ ሲሲዳ፡ «ኦኒካ ቆቁዬ?» ያጌዲ ኦቹዲኖ።

41 ዩሱሲ፡ «ሂንቱንቱ ቆቃ ጊዳዳንቶ፡ ሂንቱንቱሲ ናጋራ ጊዳና፤ ሺን ሃዒ ሂንቱንቱ፡ ኦኒ ጻሌቶ» ያጌታ፤ ሂንቱንቱ ናጋራና ዴዒታ» ያጌዲ።

**10**

**ዩሱሲ ሎያ ሄንሳንቻ**

1 ዬሱሲ፡ «ታኒ ሂንቱንቱሲ ቱሙዋ ኦዳይ፤ ደርሳ ሲኩዋ ፔንጊያና ጌሌናን ሃራሳና ጌሊያ ኦኒኔ ካይሱዋኔ ፓኑዋ። 2 ሺን ፔንጊያና ጌሊያዋ ደርሳ ሄሚያ አሳ። 3 ፔንጊያ ናጊያዋ አው ፔንጊያ ዶይ፤ ደርሳቱካ አ ኮሻ ሲሳና፤ ኢ ባሬ ደርሳቱዋ ኡንቱንቱ ሱንሳን ሱንሳን ያሲዳ። ካሬ ካሌላና። 4 ኢ ባሬዋንታ ካሬ ኬሴዳዋፔ ጉዬያን፣ ኡንቱንቱፔ ሲንሳና ሃሚቱ፤ ኡንቱንቱካ አ ኮሻ ኤሪያ ዲራው፣ አ ካሊና። 5 ሃራ ኡራ ኮሻ ኡንቱንቱ ኤሬና ዲራው፣ አፔ ባቃታናፔ አቲን፣ አ ጌዲዋ ካሊኪኖ» ያጌዳ።

6 ዬሱሲ ኡንቱንቱሲ ሃ ለሚሱዋ ኦዳይ፤ ሺን ኢ ኡንቱንቱሲ አይ ኦዲንቶኔካ ኡንቱንቱ አኬኪቤይኪኖ።

7 ዬሱሲ ቃሲካ ኡንቱንቱሲ፡ «ታኒ ሂንቱንቱሲ ቱሙዋ ኦዳይ፤ ታኒ ደርሳቶ ጌሊያ ፔንጊያ። 8 ታፔ ካሴ ዬዳ ኡባይ ካዬሱዋኔ ፓኑዋ፤ ሺን ደርሳቱ ኡንቱንቱ ጊያዋ ሲሲቤዪኪኖ። 9 ፔንጊ ታና፤ ታናን ጌሊያ ኦኒኔ አታናዋ። ኢ ጌላና ኬሳና፤ ቃሲ ሎፖ ማታይ ዳሚያ ሳባካ ዳማናዋ። 10 ካዬሱ ዉዓናው፣ ዋቋናዉኔ ቋዪሳናው ዪያዋፔ አቲን፣ ሃራባው ዬና፤ ታኒ ኡንቱንቱሲ ዴዑ ዳዓና ማላኔ ኩሚዳ ፓላሃና ማላ ያዲ።

11 «ታኒ ደርሳ ሎይላ ሄሚያዋ፤ ደርሳ ሎይላ ሄሚያዋ ሄ ደርሳቱዋ ዲራው ሃይቄ። 12 ሚሻ አኪዳ ሄሚያ ኡራይ ዋሊያ ዪያዋዳ ቤዒዳ፣ ደርሳቱዋ ዬጊ ባሺዳ ባቃቱ። አዪሲ ጎፔ፣ ደርሳቱ አዋንታ ጊዲኪኖ፤ ቃሲ ኢካ ደርሳቱዋ ሄሚያዋ ጊዳና። ሄዋ ዲራው፣ ደርሳቱዋ ኦይቄኔ ላሌ። 13 ሻሉዋ አኪዳ ሄሚያዋ ባሬ ሻሎ ሄሚያ ዲራዉኔ ደርሳባይ አ ቆሬሌና ዲራው፣ ደርሳቱዋ አጊዳ ባቃቱ።

14-15 «ታኒ ደርሳ ሎይላ ሄሚያዋ፤ ታ አቡ ታና ኤሪያዋዳን፣ ታኒካ ቃሲ ታ አባ ኤራይ። ሄዋዳንካ፣ ታኒ ታ ደርሳቱዋ ኤራይ፤ ታ ደርሳቱካ ታና ኤሪያ። ቃሲ ታኒ ታ ደርሳቱዋ ዲራው፣ ሃይቃናው ኮያዲ። 16 ሃ ሲኩዋን ባይና ሃራ ደርሳቱካ ታው ዳዒኖ። ታኒ ኡንቱንታካ አሃናው ቤሴ። ቃሲ ኡንቱንቱ ታ ኮሻ ሲሳና፤ አቲ ዉዲ ዳዓና፤ ሄሚያዋካ ኢቱዋ ጊዳናዋ።

17 «ታኒ ታ ሺምፑዋ ዛራዳ አካና ማላ፣ አላዳ አሆናው ኮዪያ ዲራው፣ ታ አቡ ታና ሲቄ። 18 ታኒ ደሳዳ ታ ሺምፑዋ አላ አሚያዋፔ አቲን፣ ታፔ ኦኒኔ አኬና። ታው ታ ሺምፑዋ አላ አሚያ ማታይ ዳዔ፤ ቃሲ ዛራዳ አካናዉካ ማታይ ዳዔ። ታኒ ሃ አዛዙዋ ታ አዉዋፔ አካዲ» ያጌዳ።

19 ሄ ሃሳያ ዲራው፣ አዪሁዳቱዋ ጊዲዋን ቃሲካ ሻኩ ሜዴቱዳ። 20 ኡንቱንቱፔ ዳሪያ ባጋይ፣ «አኒ ዓላሂ ዳዔ! ኢ ጎይ! አ ሃሳያ አዪሲ ሲሲቱ?» ያጌዲኖ።

21 ሃራቱ ቃሲ፡ «ፃላሂ ኦይቄዳ አሳይ ሃዋዳን ሃሳዬና፤ ፃላሂ ቆቃ አሳ አይፊያ ፃሊሳናው ዳንዳዪዬ?» ያጌዲኖ።

**ዬሱሲ እጭቴዳ**

22 ዬሩሳሌምን ጌሻ ጎሊያ አንጂሴዳ ጋላሳ ሃሳዬሲያ ባላይ ጋኬዳ፤ ሳሳይ ሄ ዎዴ ባልጉዋ። 23 ዬሱሲ ጌሻ ጎሊያን ሶሎሞና ባራንዳን፣ ያኔ ሃኔ ሃሜቱ። 24 አዪሁዳቱ ዬሱሳ ማታን ዩዩ አጂዴ፡ «ኔኒ ኑና አዉዴ ጋካናው ሲጂሳዴ ዋላኒ? ኔኒ ከሪሰቶሳ ጊዶፔ፣ ኑሲ ጌሻዴ ኦዳ» ያጌዲኖ።

25 ዬሱሲ ኡንቱንቱሲ ዛሪዴ፡ «ታኒ ሂንቱንቱሲ ኦዳዲ፤ ሺን ታና አማኒኪታ፤ ታኒ ታ አቡ ሱንላን ኦሊያ ኪታይ ታባ ማርካቱ።

26 ሺን ሂንቱንቱ ታ ዶርሳ ጊዴና ዲራው አማኒኪታ። 27 ታ ዶርሳቱ ታ ኮሻ ሲሲና፤ ታኒ ኡንቱንታ ኤራይ፤ ኡንቱንቱካ ታና ካሊኖ። 28 ታኒ ኡንቱንቱሲ ሜጂና ዴቡዋ አማይ፤ ቃሲ ኡንቱንቱ ኡባካ ሃይቁኪኖ። ኦኒኔ ታ ኩሺያፔ ኡንቱንታ ዋሊ አካናው ዳንዳዪና። 29 ኡንቱንታ ታው አሜዳ ታ አቡ ኦፔኔ \* አጂ፤ ኦኒኔ ታ አቡ ኩሺያፔ ኡንቱንታ ዋሊ አካናው ዳንዳዪና። 30 ታኔ ታ አቡ አቱዋ» ያጌዳ።

31 አዪሁዳቱ ዬሱሳ ጫዳናው ቃሲካ ሹቻ ዴንሌዲኖ። 32 ዬሱሲ ኡንቱንታ፡ «ታኒ ኦላናው ታ አቡ ታው አሜዳ ዳር ሎፃ ኦሱዋ ሂንቱንታ ቤሳዲ፤ ሄዋንቱፔ ሃቃዋንቱ ዲራው፡ ታና ሹቻን ጫዳናው ኮዪቱ?» ያጌዳ።

33 አዪሁዳቱ ዛሪዴ፡ «ኔኒ ኔና ሎፃ ኦሱዋ ዲራው፡ ሹቻን ጫዳናው ኮዮኮ፤ ሺን ኔኒ ያሳ ቦላ ቦሪያ ቃላ ሃሳዪያ ዲራውኔ ቃሲ አሳ ጊዳዴ ኔ ሁጲያ ያሳ ኦሌዳ ዲራው፡ ጫዳናው ኮዬቶ!» ያጌዲኖ።

34 ዬሱሲ ዛሪዴ፡ «ሂንቱንቱ ሂጊያን ያሳይ፡ (ሂንቱ ያሳቱዋ) ጌዳዋ ፃፊቲቤኔ? 35 ያሳ ማፃፋቱዋ ለማናው ዳንዳዪቱና፤ ያሳይ ባሬ ቃላይ ዬዳ አሳቱ፡ (ያሳቱዋ) ጊዴ ፃሴዳዋ ጊዶፔ።

36 ታኒ፡ «ታኒ ያሳ ናዓ» ጌዳ ዲራው፡ ታ አቡ አንጂዴ፡ ሳሳ ኪቱዳ ታና፡ «ያሳ ቦላ ቦሪያ ቃላ ሃሳያ» ያጌቱ? 37 ታኒ ታ አቡ ኦሊያዋ ኦላና ጳዮፔ፡ ታና አማኖፔቱ። 38 ሺን ታኒ ኦሊያዋ ጊዶፔ፡ ሃራይ አቶ ሂንቱንቱ ታና አማናና ጳዮፔካ፡ ታ አቡ ታናን ዴዲያዋኔ ታኒካ ታ አቡን ዴዲያዋ ኤራናዲኒኔ አኬካናዳን፡ ታ ኦሱዋ አማኒቱ» ያጌዳ።

\* 10:29 ኦፔኔ፡ ኡባፔ ጉሳ። 10:33 ዋግ 24:16 10:34 ማዝ 82:6

39 ቃሲካ ኡንቱንቱ ኣ ኣይቃናው ኮዬዲኖ፤ ሺን ኢ ኡንቱንቱፔ ኬሲ ኣኪዴ ቤዳ።

40 የሃኒሲ ካሴ ፃማቂያሳ የርዳኖሳ ሻፋፔ ሄፊንሳ ዬሱሲ ፒኒዴ፣ ያኒ ዴዔዳ። 41 ዳሮ ኣሳይ ዬሱሳኮ ዪዴ፣ «የሃኒሲ ዋለቃማ ማላታ ኦሊቤና፤ ሺን ኢ ሃ ቢታኒያባ ሃሳዬዳባይ ኡባይ ቱማ» ያጌዲኖ። 42 ያኒ ዳሮ ኣሳይ ዬሱሳ ኣማኔዳ።

# 11

## አሊዓዛራ ሃይቁዋ

1 ቢታኒያ ጊያ ቁሪ ካታማን አሊዓዛራ ጊያ ኢቲ ቢታኒ ሃርጌዳ፤ ሄ ካታማይ ማይራማኔ ኢዚ ሚቻታ ማርታ ዴዔዳ ካታማ። 2 ጎዳ ጌዲያ ሺቱዋ ኦካዴ፣ ባሬ ቢናናን ኣ ጌዲያ ቁጩዳወና ሄ ማይራዋ፤ ሃርጌዳዋ ቃሲ ኢዚ ኣሻ አሊዓዛራ። 3 ሄዋ ዲራው፣ ሚቻቱ፣ «ጎዳው፣ ኔኒ ሲቂያዋ ሃርጌዳ» ጌዴ ዬሱሳው ኪቲዲኖ።

4 ዬሱሲ ሄዋ ሲሴዳ ዋዴ፣ «ታኒ ያሳ ናባይ ሃርጊያ ጋሱዋን ቦንቹታና ማላ፣ ያሳ ቦንቹዋሲ ሃ ሃርጊ አሊዓዛራ ኦይቁዳፔ ኣቲን፣ ዋዲያ ሃርጊያ ጌዴና» ያጌዳ።

5 ዬሱሲ ማርቶ፣ ኢዚ ሚቻቶኔ አሊዓዛራ ሲቂ፤ 6 አሊዓዛር ሃርጌዳዋ ዬሱሲ ሲሴዳ ዋዴ፣ ባሬ ዴዔያ ሳዓን ላዑ ጋላሳ ፔሼዳ። 7 ሄዋፔ ጉዪያን፣ ዬሱሲ ባሬና ካሊያዋንታ «ላዔንሉዋ ዪሁዳ ጋዲያ ቦይቱ» ያጌዳ።

8 ዬሱሳ ካሊያዋንቱ ዛሪዴ፣ «ታማሪሲያዋ፣ ጉላ ዋዲያፔ ካሴ ኣዪሁዳቱ ኔና ሹቻን ጫዳናው ኮዬዲኖ፤ ቃሲካ ያ ባኒ?» ያጌዲኖ።

9 ዬሱሲ፣ «ኢቲ ጋላሳን ታማኔ ላዑ ሳቲ ዴዔኔዬ? ጋላሲ ሃማቲያ ኣሳይ ቆቤቱና፤ ኣዪሲ ጎፔ፣ ኢ ሃ ሳዓ ፖዑዋ ቤዔ።

10 ሺን ቃማ ሃማቲያ ኡራይ ዴፖፔ፣ ፖዑ ኣኒ ባይና ዲራው፣ ቆቤቱ» ያጌዳ። 11 ዬሱሲ ሄዋ ጌዳዋፔ ጉዪያን፣ ቃሲካ ኡንቱንቱሲ፣ «ኮ ዳቡ አሊዓዛር ጌሚዒሼዳ፤ ሺን ጌሚዒሼዋፔ ኣ ዴንሳናው ታኒ ባይ» ያጌዳ።

12 ዬሱሳ ካሊያዋንቱ ዛሪዴ፣ «ጎዳው፣ ኢ ጌሚዒሼዳዋ ጊዳፔ፣ ኣው ሎዓናዋ» ያጌዲኖ።

13 አሊዓዛር ሃይቁዳዋ ዬሱሲ ኦዴዳ፤ ሺን አሊዓዛር ጌሚዒሼዴ ጊሴዳዋ ኦዴዳ ጌዴ፣ ኡንቱንቱ ቆፔዲኖ። 14 ሄዋ ዲራው፣ ዬሱሲ ጌሼዴ ኡንቱንታ፣ «አሊዓዛር ሃይቁዳ። 15 ሂንቱንቱ ኣማናና ማላ፣ ታኒ ሄ ሳዓን ዴዔናዋ፣ ሂንቱንቱ ዲራው ናሼታይ። ሺን ዴንዲቲ፤ ኣኮ ቦይቱ» ያጌዳ።

16 ሄዋፔ ጉዩያን፣ ማንቲያ ጌቲቲያ ቶማሲ ባሬ ለጌላቱዋ ዩሱሳ ካሊያዋንታ፣ «ዩሱሳና ሃይቃናው ኮኒካ ቃሲ ቦይቲ!» ያጌዱ።

**ዩሱሲ፣ ዴንዲዋን ዴዑዋ**

17 ዩሱሲ ጋኪያ ዎዴ፣ አለዓዛራው ሞጌቶዴፔ ኦይዲ ጋላሳ ጊዴዳዋ ዴሜዳ። 18 ቢታኒያ ካታማይ ዩሩሳላሚፔ ሄዙ ኪሎ ሚቲሪያ ከና ሃኬ። 19 ዳሮ አዪሁዳቱ ማርቶኔ ማይራሞ ኡንቲንቱ አሻይ ሃይቁዳዎ ሜንሌላናው ዩዲኖ።

20 ማርታ ዩሱሲ ዩዳዋ ሲሳዴ፣ አ ሞካናው ከሳዲ፤ ሺን ማይራማ ጎሌን አታዱ። 21 ማርታ ዩሱሳ፣ «ጎዳው፣ ኔኒ ሃዋን ዴዔዳዋ ጊዲንቶ፣ ታ አሻይ ሃይቁና። 22 ሺን ኔኒ ዎሲያዋ አይ ጊድፔኔ፣ ያሳይ ኔው ሃራይ አቶ ሃዒካ አማናዋ ታኒ ኤራይ» ያጋዱ።

23 ዩሱሲ፣ «ኔ አሻይ ሃይቁዋፔ ዴንዳና» ያጌዱ።

24 ማርታ፣ «ዎዲያ ወርሴላን \* ዴንዲዋ ጋላሲ፣ ኢ ሃይቁዋፔ ዴንዳናዋ ታኒ ኤራይ» ያጋዱ።

25 ዩሱሲ ኢዚው፣ «ታኒ ዴንዲዋን ዴዑዋ፤ ታና አማኒያ ኡራይ ሃራይ አቶ፣ ሃይቆፔካ ዴዑዋን ዴዓናዋ። 26 ቃሲ ዴዑዋን ዴዒያ ኡራይኔ ታና አማኒያ ኡራይ ኡባይ ኡባካ ሃይቁና፤ ሄዋ ኔኒ አማናይ?» ያጌዱ።

27 ማርታ ዛራዴ፣ «ጎዳው፣ ኤ ታኒ አማናይ፤ ኔኒ ያሳ ናዓ፣ ሳዓ ያናው ዴዒያ ኪሪሰቶሳ ጊዲያዋ ታኒ አማናይ» ያጋዱ።

28 ማርታ ሄዋ ጌዳዋፔ ጉዩያን፣ ባዴ ባሬ ሚቻቲው ጌማን ያሳዴ፣ «ታማሪሲያዌ ዩዴ፣ ኔና ኮዬ» ያጋዱ። 29 ማይራማ ሄዋ ሲሴዳ ዎዴ፣ ኤሌላ ዴንዳ ኤቃዴ ዩሱሳኮ ባዲ። 30 ዩሱሲ ማርታ አ ሞኬዳ ሳዓን ዴዔፔ አቲን፣ ቢሮ ቄሪ ካታማ ጋኪቤና። 31 ማይራሞ ሜንሌሊዴ፣ ጎሌን ኢዚና ዴዒያ አዪሁዳቱ፣ ኢዛ ኤሌካ ዴንዳ ኤቃዴ ካሬ ከሲያዋ ቤዒዴ፣ አለዓዛር ሞጌቲዳ ዲፋዋ ባዴ ያኒ ዩካናው ሃናው ያጊዴ፣ ኢዛ ካሊዴ ኬሴዲኖ።

32 ማይራማ ዩሱሲ ዴዒያሳ ባዴ ዩሱሳ ቤዒዳ ዎዴ፣ አ ጌዲያ ቦላን ኩንዳዲ፤ «ጎዳው፣ ኔኒ ሃዋን ዴዔዳዋ ጊዲንቶ፣ ታ አሻይ ሃይቁና ሺን!» ያጋዱ።

33 ዩሱሲ ኢዛ ዩኪያዎን ቃሲ ኢዚና ዩዳ አዪሁዳቱካ ዩኪያዋ ቤዒዴ፣ ባሬ ዎዛናን ዳሮ ሴሌቲዳ፤ ቃሲ ቶኪ ሺምፔዳ።

\* 11:24 ዎዲያ ወርሴላን፣ ያሳይ አሳ ዜሬላ ኡባ ፒርዳው ሺሺያ ዎዴ ጉሳ።

34 ኡንቱንታ፡ «ሃቃን ሞጌዲቲ?» ያጊዳ ኦቺና፡ «ጎዳው፡ ያዳ ቤዓ» ያጊዳ ዛሬዲና።

35 ዬሱሲ ኣፎጻዲ። 36 ሄዋ ዲራው፡ ኣዪሁዳቱ፡ «ኣለዓዛሪ ኢ ኣይ ከና ሲቁንቶ ቤዒቲ!» ያጊዲና።

37 ሺን ኡንቱንቱ፡ «ሃዌ ቆቃ ቢታኒያ ጻሊሴዳዎ ሃ ቢታኒ ሃይቆናዳን ኡዳናው ዳንዳዬ?» ያጊዲና።

**ዬሱሲ ኣለዓዛሪ ሃይቆዎፕ ዳንጼዳ**

38 ዬሱሲ ቃሲካ ዎዛናፕ ቃሬቲዳ፡ ኣለዓዛር ሞጌቲዳ ዲፋዎኮ ቤዳ፤ ሄ ዲፋ ጎንጎሉዎ ጊዲዳ ሹቻን ቁምዔቲ ኡቲዳ።

39 ዬሱሲ፡ «ሹቻ ዲጊቲ!» ያጊዳ ኣዛዜዳ።

ሃይቆዳ ቢታኒያ ሚቻታ ማርታ፡ «ጎዳው፡ ኢ ሃይቆዳፕ ኦይዳ ጋላሳ ጊዳዳ ዲራው፡ ሃዒ ዒንቃናዎ!» ያጋዲ።

40 ዬሱሲ ማርታ፡ «ኣማኒያዎ ጊደፕ፡ ኔኒ ያሳ ቦንቹዎ ቤዓናዎ ታኒ ኔው ኦዳቤይኪታ?» ያጊዳ። 41 ኡንቱንቱ ሹቻ ዳንጼዲና፤ ዬሱሲ ሳሉዎ ፑዳ ጻሊዳ፡ «ኣዎ፡ ታኒ ጊያዎ ኔኒ ሲሴዳ ዲራው፡ ኔና ጋላታይ። 42 ኔኒ ኡባ ዎዳ ሲሲያዎ ታኒ ኡራይ፤ ሺን ሃዎን ዩዩ ኣጲዳ ኤቁዳ ኣሳይ ኔኒ ታና ከቲዳዎ ኣማናና ማላ፡ ሃዎ ታኒ ኡንቱንቱ ዲራው ጋይ» ያጊዳ። 43 ዬሱሲ ሄዎ ጌዳዎፕ ጉዩያን፡ ባሬ ቃላ ቶቆ ኡዲዳ፡ «ኣለዓዛሪ፡ ሃ ከሳ!» ያጊዳ። 44 ሃይቆዳ ኣለዓዛሪ ኩሺኔ ጌዲ ሻሉዎን ቃሹቲ ኡቲዳ ኣ ዳሙካ ኣፊላን ካሜቲ ኡቲዳዌ ከሲና ዬሱሲ ኡንቱንታ፡ «ቢሊ ኣጊቲ! ቦ!» ያጊዳ።

**ከሪሰቶሳ ቦላ ማቄቲዲኖ**

(ማት 26:1-5፤ ማር 14:1-2፤ ሉቅ 22:1-2)

45 ሄዎ ዲራው፡ ማይራሚኮ ዬዳ ኣዪሁዳቱዎፕ ጮራቱ ዬሱሲ ኦጼዳዎ ቤዒዳ፡ ኣ ኣማኔዲና። 46 ሺን ኡንቱንቱ፡ «ኣቲ ኢቲ ፓሪሳዎቱዎኮ ቢዳ፡ ዬሱሲ ኦጼዳዎ ኡንቱንቱሲ ኦይዲና።

47 ሄዎፕ ጉዩያን፡ ቁሳቱዎ ካፓቲኔ ፓሪሳዎቱ ያዓ ሺሺዳ፡ «ሃ ቢታኒ ዳር ዎልቃማ ማላታ ኦሊያ ዲራው፡ ኣያ ኦሳኔ? 48 ኦኒ ኣ ጮዑ ጊዳ፡ ኣጎፕ፡ ኣሳይ ኡባይ ኣ ኣማናናዎ፤ ቃሲ ሮሜ ጋዲያ ኣሳቱ ዩዳ፡ ኦ ጌሻ ጎሊያኔ ኦ ኣሳ ጳዩሳና» ያጊዲና።

49 ኡንቱንቱ፡ «ሃንቲንቱ ኣይኔ ኤሪኪታ! 50 ኣሳይ ኡባይ ጳዩያዎፕ ኣሳ ኡባ ዲራው፡ ኣቲ ኣሳይ ሃይቆያዌ ሎዓ ጊዲያዎ ሂንቲንቱ ኣኩኪቲ?» ያጊዳ። 51 ኢ ሄዎ ባሬፕ ጊቤና፤ ሺን ሄ ሳይሊ ቁሳቱዎ ኡባቱዎ ካፖ ጊዲያ ዲራው፡ ዬሱሲ ኣዪሁዳ ኣሳ ዲራው ሃይቃናው ቤሲያዎ ናቢ ኦይዳ። 52 ቃሲ ዬሱሲ



አዩሁዳ አሳ ፃላላው ሃይቁና፤ ሺን ላሌቲ ዳዒያ ፆሳ ናና ኢቱዋ ኡዲ ሺሻናው ሃይቃናዋ።

53 ሄ ጋላሳፕ ደሚዳ፣ ኡንቱንቱ ኦ ዋቆናው ማቄቲዲኖ። 54 ሄዋ ዲራው፣ ዩሱሲ አዩሁዳቱ ጊዲዋን ቆንጨያን ያ ሃ ሃሚቲቤና፤ ሺን ሚላ ቢታ ጋፃን ዳዒያ ጋዲያ፣ ኤፊሬማ ጌቲቲያ ካታማ ቤዳ። ባሬና ካሊያዋንቱና ሄዋን ታኮዳ።

55 አዩሁዳቱ ፓሲጋ ቦንቹያ ጋላሳይ ማቲዳ፤ ቃሲ ዳሮ አሳይ ባሬና ጌሻናው፣ ፓሲጋ ቦንቹያ ጋላሳይ ጋካናፔ ካሴ ዲማ ዲማ ሳፔ ዩሩሳላሚ ቤዳ። 56 ኡንቱንቱ ዩሱሳ ኮዩና፤ ጌሻ ጎሊያን ኤቁዳ፣ «አያ ቆጊቱ? ፓሲጋ ቦንቹያሳ ዩሱሲ ዩኔ?» ያጌዴ ኢቱ ኢቱዋ ኦቹዲኖ። 57 ቃሲ ቄሳቱዋ ካፓቱኔ ፓሪሳዋቱ ዩሱሳ ቃቻናው፣ ኢ ዳዒያሳ ኤሪያዌ ኦኒኔ ባሬንቶ ኦዳና ማላ አዛዜዲኖ።

# 12

## ዩሱሳ ሺቱዋ ኦኬዳ ሚሺራቶ (ማት 26:6-13፤ ማር 14:3-9)

1 ፓሲጋ ቦንቹያ ጋላሳፔ ኡሱቱን ጋላሳ ካሴቲዳ፣ ዩሱሲ ኢ ሃይቁዋፔ ዳንጼዳ አሊዳዛር ዳዒያ ቢታኒያ ጌያ ካታማ ቤዳ።

2 ሄ ሳዓን ኡንቱንቱ አው ካወዋ ካጼዲኖ፤ አሊዳዛር አናና ኡቲዳ ኢቲፔ ሚያዋንቱ ጊደን ኡቲ ዳዒሺን፣ ማርታ ካወዋ ጊሻ ሚዛዲ።

3 ማይራማ ዳሮ ሻሉዋን ዛሊዔቲያ ኢቲ ፃሪሙሲያ ጊዲያ ናርዶሳ ጌቲቲያ ጌሻ ሺቱዋ አሃዳ፣ ዩሱሳ ጌዲያ ኦካዳ ባሬ ቢናናን አ ጌዲያ ቁጫዲ፤ ጎሊያ ኡባይ ሺቱዋ ሳወዋን ቶሺኩ ጌ።

4 ሺን ዩሱሳ ካሊያዋንቱፔ ኢቱ፣ ዩሱሳ አጼ ኢማናዌ፣ ዩሁዳ አሰቆርቱ፣ 5 «ሃ ሺቱ ሄዙ ፆቱ ዲናሪያኒ ዛሊዔቲና፣ አያሲ ሄዌ ሃዩሳው ኢሜቲኔ?» ያጌዳ። 6 ኢ ካዩሱዋ ጊዳዳ ዲራው፣ ሄዋ ጌዳፔ አቲን፣ ሃዩሳው ቃሬቲዳ ጊቤና፤ ኢ ሚሻ ቃርጨቲያ ኦይቁያዋ ጊዲያ ዲራው፣ ኡባ ዎዳ አፔ ባሬው አኬዳ።

7 ዩሱሲ፣ «ሃ ሺቱዋ ታኒ ሞጌቲያ ጋላሳይ ጋካናው ኢዛ አያው ሚንጅኔ? ኢዛ አጊቱ። 8 ሃዩሳቱ ኡባ ዎዳ ሃንቴናና ዳዓና፤ ሺን ታኒ ኡባ ዎዳ ሃንቴናና ዳዒኬ» ያጌዳ።

9 አዩሁዳቱዋፔ ዳሮ አሳይ ዩሱሲ ቢታኒያን ዳዒያዋ ሲሲዳ፣ ያ ቤዳ፤ ኡንቱንቱ ዩሱሳ ቤዓና ጊሻ ፃላላው ጊዳናን፣ ኢ ሃይቁዋፔ ዳንጼዳ አሊዳዛራካ ቤዓናው ቤዲኖ። 10 ሄዋ ዲራው፣ ቄሳቱዋ ካፓቱ አሊዳዛራካ ቃሲ ዎቆናው ማቄቲዲኖ። 11 አዩሲ

ጎፔ፣ አለዓዛራ ጋሱዋን ዳሮ አዪሁዳቱ ባሬና ካሌሌያዋንታ አገዳ፣ ዩሱሳ አማኒኖ።

ዩሱሲ ቦንቹዋን ዩሩሳላሜ ጌሌዳ  
(ማጥ 21:1-11፤ ማር 11:1-11፤ ሉቅ 19:28-40)

12 ዋንቴሳ ጋላሲ ፓሲጋ ቦንቹያሳ ዩዳ ዳሮ አሳይ ዩሱሲ ዩሩሳላሜ ቢያዋ ሲሴዳ። 13 ያቲዳ ዛምባ ሃይሳ ኦይቂዳ፣ \* አ ሞካናው ኬሴዲኖ። ባሬንቱ ኮሻ ጾቁ ኡዲዳ፣ «ዖሳይ ጋላቱቶ!

ዖሳ ሱንሳን ዪያ ኢሰራዔሊያ ካቲ አንጃቴዳዋ!» ያጌዲኖ።

14-15 ዖሳ ማፃፋይ፣ «ጃዮኔ ካታማው፣ ያዮፓ! ቤዓ፣ ኔ ካቲ ሃሬ ማራ ቦላ ኡቲዳ ዩ» ጊያዋዳን፣ ዩሱሲ ሃሬ ማራ ዳሚዳ፣ አ ቶጌዳ።

16 ዩሱሳ ካሊያዋንቱ ሄዋ ካሴ አኬኪቤይኪኖ፤ ሺን ዩሱሲ ቦንቹቱዳዋፔ ጉዪያን፣ ዖሳ ማፃፋይ ሄዋ ኡባ ጌዳዋኔ ቃሲ ኡንቱንቱካ ሄዋ ኡባ ዩሱሳው ኦሌዳዋ ሃሳዩዲኖ።

17 አለዓዛር ሞጌቲዳ ጎንጎሉዋፔ ዩሱሲ አ ፃሲዳ፣ ሃይቁዋፔ ዳንጤዳ ዋዳ፣ ዩሱሳና ዳዒያ ዳሮ አሳይ ዩሱሳው ማርካቲዳ። 18 ዳሮ አሳይ አ ሞካናው ኬሴዳዌ፣ ኢ ሄ ዋልቃማ ማላሊያዋ ኦሌዳ ዲራሳ። 19 ሄዋ ዲራው፣ ፓሪሳዋቱ ኢቱ አቱዋ፣ «ሂንቲንቱ አይኔ ኦሳናው ዳንዳዬናዋ ቤዒቲ! ቤዒቲ፣ ጋዳ ኡባይ አ ጌዳዋ ካሌዳ» ያጌዲኖ።

20 ፓሲጋ ቦንቹያ ጋላሲ ጎዪናናው ዩሩሳላሜ ቤዳዋንቱ ጊደን ኢቲ ኢቲ ጊሪኬ አሳቱ ዳዒኖ። 21 ኡንቱንቱ ጋሊላ ጋዲያን ቤቲሳይዳ ጌቲቲያ ካታማፔ ዩዳ ፒሊጶሳኮ ቢዳ፣ «ጎዳው፣ ኑኒ ዩሱሳ ቤዓናው ኮዬቶ» ያጌዳ ዋሴዲኖ። 22 ፒሊጶሲ ቢዳ፣ ኢንዲራሳው ኦዲና ሳዓቲካ ቢዳ፣ ዩሱሳው ኦዳዲኖ።

23 ዩሱሲ ኡንቱንቱሲ ሃዋዳን ያጌዳ፤ «ታኒ፣ አሳ ናዓይ፣ ቦንቹቲያ ሳቲ ጋኬዳ። 24 ታኒ ሂንቲንቱሲ ቱሙዋ ኦዳይ፤ ኢቲ ዛርጋ አይፋታ ቢታን ዋዳዳ ዋቃና ዳዮፔ፣ ባሬካ አታው። ሺን ሄ ዛርጋ አይፋታ ዋቆፔ፣ ዳሮ አይፊያ አይፋው። 25 ባሬ ሺምፑዋ ሰቂያ ኦኒኔ ባዪዜ፤ ቃሲ ባሬ ሺምፑዋ ሃ ሳዓን ኢጃያ ኦኒኔ ሜጂና ዳዖ አሼ። 26 ኦኒኔ ታው ኦሶፔ፣ ታና ካላናው ቤሴ፤ ቃሲ

\* 12:13 ዛምባ ሃይሳ ኦይቂዳ፣ ሃዌ አዪሁዳ አሳይ ኤሬቲዳ አሳ ሞኪያ ዎጋ። 12:13 ማዝ 118:25

ታሊ ዲዲያ ሳዓን ታው ኦሊያዌካ ዳዓናዋ። ታው ኦሊያ ኦናኔ፣ ታ ኦሎካ ኦ ለንቻናዋ።

27 «ሃሲ ታ ሼሞፑ ዳር ኡንዔቴዳ፤ ያቴና ዋሳ? ታኒ፣ ታ ኦሎ፣ ታና ሃ ሳታቴቴ ኦሻርኪ» ያሳ? ቱይቴ፣ ታኒ ሃ ሳቲያን ዬዳዌ ሃዋ ዲራሳ። 28 ታ ኦሎ፣ ኔ ሱንላ ለንቻ» ያጌዳ።

ሄ ዋዴ ሳሉዋ፤ «ታኒ ታ ሱንላ ለንቻዲ፤ ቃሲካ ጉጂዴ ለንቻና» ያጌያ ቃላይ ዬዳ።

29 ሄ ሳዓን ኤቁዳ ጮራ ኦሳይ ሄ ቃላ ሲሲዴ፣ «ሄዌ ጉጉንላ» ያጌዳ።

ሃራንቱ ቃሲ፣ «ኪታንቻይ ኦው ሃሳዬዳ» ያጌዲኖ።

30 ዬሱሲ ዛሪዴ ኡንቱንታ፣ «ሃ ቃላይ ሂንቱንቱ ዲራው ዬዳዋ፤ ኦቲን፣ ታ ዲራሳ ጌዴና። 31 ሃ ሳዓይ ፒርዴቲያ ዋዲ ሃዓ፤ ሃ ሳዓ ተ ሞዲያዌ ሃሲ ካሬ ኦሎታናዋ። 32 ቃሲ ታኒ ማስቃሊያ ሶላ ካቁቲያ ዋዴ፣ ኦሳ ኡባ ታኮ ሳቻና» ያጌዳ።

33 ኢ ሄዋ ጌዳዌ ኦይ ማላ ሃይቁዋ ኢ ሃይቃኔንቱ ኡንቱንታ ኤሪሳናሳ።

34 ዳር ኦሳይ ዛሪዴ ዬሱሳ፣ «ኑ ሂጊ ኪሪሰቶሲ ሜዲናው ዲዲያዋ ኦዴ። ያቴና፣ ኔኒ ዋጋዴ፣ ሳሳ ናዓይ ማስቃሊያ ሶላ ካቁታና» ጋይ? ሄ ኦሳ ናዓይ ኦኔ?» ያጌዲኖ።

35 ዬሱሲ፣ «ፖ- ሂንቱናና ጉላ ዋዲያ ጋሚዳናዋ። ሂንቱንቱሲ ጳሚና ማላ፣ ፖ- ዲሲሺን፣ ፖ-ዋን ሃሜቲቴ። ጳሚን ሃሜቲያ ኡራይ ሃቃ ቢንቱኔ ኤሬና። 36 ፖ-ዋ ኦሳ ጌዳና ማላ፣ ሂንቱንቱሲ ፖ- ዲሲሺን፣ ፖ-ዋ ኦሚኒቲ» ያጌዳ።

**ኦዲሁዳቱ ኦሚኒናን ኢጻዳ ሃናታ**

ዬሱሲ ሄዋ ሃሳዬዳዋ፤ ጉዲያን፣ ቢዴ ኡንቱንቱ፤ ጌሜቲዳ። 37-38 ኢ ሄዋ ከና ዋልቃማ ማላታ ኡንቱንቱ ሲንላን ኦሎ፤ ናቢያ ኢሳያሴ፣

«ሳዳው፣ ኑ ማርካቲላ ኦኒ ኦሚኔዴ?

ሳዳይ ባሬ ዋልቃ ኦና ቤሴዴ?»

ጌዳዌ ተማ ጌዳና ማላ፣ ኡንቱንቱ ኦ ኦሚኒቤይኪኖ።

39-40 ኢሳያሴ ቃሲካ፣

«ኡንቱንቱ ኦይፊ ጂሊና ማላ፣

ኡንቱንቱ ዋዛናይካ ኦኩኩና ማላ፣

---

† 12:31 ሃ ሳዓ፣ ጉሳይ ሃ ኦላሚያ ጌዲዴ ሃ ጥሃሊሳ ሚሺራቸዋን ዲዲያ ሃ ሳዓ ጌያዌ ሃ ሳዓ ሶላ ዲዲያ ኦሳኔ ኡንቱንቱ ካሃ ባሬሳ ኡዲዴ ሞዲያ ኢታ ኦና ዋልቃ ቤሴ። 12:34 ማዝ 110:4፤ ኢሳ 9:7፤ ሂዝ 37:25፤ ዳን 7:14 12:37-38 ኢሳ 53:1

ኡንቱንቱ ያሳኮ ሲሟና፥ ኢ ኡንቱንታ ፓሌና ማላ፥

ያሳይ ኡንቱንቱ ኣይፊያ ቆቂሴዳ።

ኡንቱንቱ ዋዛና ዳሚሴዳ።

ጌዳ ዲራው፥ ኡንቱንቱ ኣማናናው ዳንዳዪቤዪኪኖ።

41 ኢሳያሴ ዩሱሳ ቦንቹዋ ቤዔዳ ዲራውኔ ቃሲ ኣባ ሃሳዬዳ ዲራው፥ ቶ ሄዋ ጌዳ።

42 ሄዋ ጊዲናካ፥ ሃራይ ኣቶ ኣዪሁዳቱ ካፓቱዋፕካ ጮራቱ ዩሱሳ ኣማኔዲኖ። ሺን ፓሪሳዋቱ ባሬና ኣዪሁዳቱ ዋሳ ጎሊያፕ ኬሲኖ ጊዴ ያዬዳ ዲራው፥ ኣማኔዳ ጊዴ ማርካቲቤይኪኖ።

43 ኣዪሲ ጎፔ፥ ኡንቱንቱ ያሳ ሳባፕ ኣሊዴ፥ ኣሳ ሳባ ሲቄዲኖ።

44 ዩሱሲ ባሬ ቃላ ቆቂ ኡዲዴ ያጌዳ፤ «ታና ኣማኒያ ኦኒኔ ታና ኪቱዳዋካ ኣማኒያዋፕ ኣቲን፥ ታ ያላላ ኣማኔና። 45 ታና ቤዒያ ኦኒኔ ታና ኪቱዳዋካ ቤዔ። 46 ታና ኣማኒያ ኡባይ ቆማኒ ዴዔና ማላ፥ ታኒ ፖዑዋ ጊዳዴ ሳዓ ያዲ። 47 ታ ቃላ ሲሲዴ ኣዛዜቴና ኡራ ኦናኔ ታኒ ፐርዲኬ፤ ኣዪሲ ጎፔ፥ ታኒ ኣላሚያ ኣሻናው ዩዳዋፕ ኣቲን፥ ፐርዳናው ያቤይኬ። 48 ታና ኢዲያ ኦናኔ ቃሲ ታ ቃላ ኣኬና ኦናኔ ፐርዲያዋ ዴዔ። ታኒ ኦዴዳ ቃላይ ወርሴሳ ጋላሲ ሄ ኡራ ፐርዳና። 49 ኣዪሲ ጎፔ፥ ታኒ ሄዋ ታፔ ሃሳያቤይኬ፤ ሺን ታና ኪቱዳ ታ ኣቡ ታኒ ጋናዋኔ ሃሳያናዋ ታና ኣዛዜዳ። 50 ቃሲ ኣ ኣዛዙ ሜዲና ዴዑዋ ኣሂያዋ ታኒ ኤራይ፤ ሄዋ ዲራው፥ ታኒ ኦዲያዋ ታ ኣቡ ታና ኦዳ ጊዴ ኦዴዳዋ» ያጌዳ።

# 13

## ዩሱሲ ባሬ ካሊያዋንቱ ጌዲያ ሜጩዳ

1 ፓሲጋ ቦንቹያ ጋላሳይ ጋካናፕ ካሴቲዴ፥ ሃ ሳዓፕ ሻኬቲዴ፥ ኣወዋኮ ቢያ ዋዲ ጋኬዳዋ ዩሱሲ ኤራይ፤ ሃ ሳዓን ዴዒያ ባሬዋንታ ኡባ ዋዴ ሲቄዳ፤ ወርሴሳይ ጋካናው ኡንቱንታ ሲቄዳ።

2 ዩሱሲኔ ካሊያዋንቱ ካወዋ ሚሺን፥ ሲሞና ናዓ ዪሁዳ ኣሰቆሮቱ ዩሱሳ ኣሊ ኣማናዳን፥ ያላሂ ኣ ቆፊሲ ዋሌዳ። 3 ዩሱሲ ባሬ ኣወ ኡባባ ኣ ኩሺያን ዋሌዳዋ፥ ቃሲ ያሳ ማታፕ ኢ ዩዳዋኔ፥ ሲሚዴ ኣኮ ባናዋ ኤራዳ። 4 ዩሱሲ ሚያሳፕ ዴንዲ ኤቂዴ፥ ቦላ ባጋ ማዩዋ ቃሪ ዋሊዴ፥ ፖፃ ባሬ ያሳን ዳንጩዳ። 5 ሄዋፕ

12:39-40 ኢሳ 6:10 ቶ 12:41 ኢሳያሴ ዩሱሳ ቦንቹዋ ቤዔዳ ዲራውኔ ቃሲ ኣባ ሃሳዬዳ ዲራው፥ ዋይ ኢሳያሴ ያሳ ቦንቹዋ ቤዔዳ ዲራውኔ ቃሲ ዩሱሳ ሃሳዬዳ ዲራው፥

ጉዩያን፣ ሃላ ሜቻ ሚሻን ቲጊዳ፣ ባሬና ካሊያዋንቱ ጌዲያ ሜቻኔ ባሬ ጻሳን ዳንጩዳ ፖፃን ቁጩሳ ደሜዳ።

6 ዬሱሲ ሲሞኒ ጳዳርሳኮ ዪና ጳዳርሴ፣ «ጎዳው፣ ኔኒ ታ ጌዲያ ማጫናው ሃናዪዬ?» ያጌዳ።

7 ዬሱሲ ዛሬዳ አ፣ «ታኒ ኦሊያዋ ኔኒ ሃዒ ኤራካ፤ ሺን ጉዬፔ ኤራናሳ» ያጌዳ።

8 ጳዳርሴ፣ «ኔኒ ታ ጌዲያ ኡባካ ማጫካ!» ያጌዳ። ዬሱሲ አ፣ «ታኒ ኔ ጌዲያ ማጫና ጳዮፔ፣ ኔወኔ ታወኔ ኢቲፔቴላይ ባዋ» ያጌዳ ዛሬዳ።

9 ሲሞና ጳዳርሴ ዬሱሳ፣ «ጎዳው፣ ያቶፔ፣ ታ ጌዲያ ፃላላ ማጫፓ፤ ታ ኩሺያካ ታ ሁጲያካ ማጫ!» ያጌዳ።

10 ዬሱሲ ዛሬዳ፣ «ቦላ ማጫፔቲዲጌዳ ኡራይ ኦኒኔ ጌዲያፔ ሃራባ ማጫታናው ኮሺና፤ እው ኡባሳይካ ጌሻ፣ ቃሲ ሂንቴንቱካ ጌሻ፤ ሺን ኡባይ ጌሻ ጊዲኪታ» ያጌዳ። 11 አዪሲ ጎፔ፣ ዬሱሲ ባሬና አሉ አማና ኡራይ ኦኒንቱኔ ኤሬዳ፤ ኢ፣ «ሂንቴንቱ ኡባይ ጌሻ ጊዲኪታ» ጌዳዌ ሃዋሳ።

12 ኡንቴንቱ ጌዲያ ማጫዳዋፔ ጉዩያን፣ ዬሱሲ ባሬ ማዩዋ ማዩዳ፣ ባሬሳ ጉዬ ሲሚ ቢ ኡቲዳ ኡንቴንታ ያጌዳ፤ «ታኒ ሂንቴንቱሲ ኦሊዳዋ አኩኪቱ? 13 ሂንቴንቱ ታና፣ ታማሪሲያዎኔ ጎዳው ጌታ፤ ታኒ ሄ ሂንቴንቱ ጌያዋ ጌዲያ ዲራው፣ ሎይሌዲታ። 14 ታኒ ሂንቴንቱሲ ጎዳኔ ሂንቴንታ ታማሪሲያዋ ጌዳዳ፣ ሂንቴንቱ ጌዲያ ማጫያዋ ጌዳፔ፣ ሂንቴንቱካ ኢቱ አቲዋ ጌዲያ ማጫናው ቤሴ። 15 አዪሲ ጎፔ፣ ታኒ ሂንቴንቱሲ ኦሊዳዋዳን፣ ሂንቴንቱካ ኦላና ማላ፣ ሂንቴንቱሲ ሌሚሱዋ ጌዳዳ። 16 ታኒ ሂንቴንቱሲ ቱሙዋ ኦዳይ፤ ቆማይ ባሬ ጎዳፔ አዴና። ቃሲ ኪቴቲዳ ኡራይካ ባሬና ኪቴዳዋፔ አዴና። 17 ሂንቴንቱ ሄዋ ኤሪዳ ኦሊያዋ ጌዳፔ ኦንጃቴዳዋንታ።

18 «ታኒ ሂንቴንቶ ኡባባ ሃሳዪኬ። ታኒ ደሬዳዋንታ ኡራይ፤ ሺን ያሳ ማፃፋይ፣ (ታኒ ባርሴዳዌ ታ ኩሺያ ሳዔዳ) ጌዳዌ ቱማ ጌዳናው ቤሴ። 19 ሄዌ ሃኒያ ዋዳ ታኒ ታና \* ጊዲያዋ ሂንቴንቱ አማናና ማላ፣ ሄዌ ሃናናፔ ካሴታዳ ሂንቴንቱሲ ሃናናዋ ኦዳይ። 20 ታኒ ሂንቴንቱሲ ቱሙዋ ኦዳይ፤ ታኒ ከቲያ ኦናኔ ሞኪያ ኡራይ ታናካ ሞኬ፤ ቃሲ ታና ሞኪያ ኦኒኔ ታና ከቲዳዋ ሞኬ» ያጌዳ።

ዮሱሲ ባሬና አሉ አማናዌ ኦኒንቶ ካሴቲዳ ኦዳይ  
(ማት 26:20-25፤ ማር 14:17-21፤ ሉቅ 22:21-23)

13:18 ማዘ 41:9 \* 13:19 ታኒ ታና፣ ዮሀ 8:24 ጸሊቱ።

21 ዬሱሲ ሄዋ ሃሳዬዳዋፔ ጉዩያን፣ ባሬ ዋዛናን ዳሮ ማቶቲዳ፣ «ታኒ ሂንቴንቴሲ ቱሙዋ ኦዳይ፤ ታና ሂንቴፔ ኢቱ ኣላ ኢማናዋ» ጊዳ ቆንጨያን ኦዳዳ።

22 ኢ ኦና ሃሳዩንቶኔ፣ ካሊያዋንቴሲ ኡባካ ኤሬቴናን ኢዳና፣ ኢቱ ኢቱዋ ያሌዲኖ። 23 ዬሱሳ ካሊያዋንቴፔ ኢቱ፣ ዬሱሲ ሲቆያዋ፣ ዬሱሳ ማታን ኡቴዳ። 24 ሄዋ ዲራው፣ ሲሞና ደዲሮሴ ሄ ካሊያዋ ሲሚዲዳ፣ «ኢ ኦና ጊንቶ፣ ኣኔ ኣ ኦቻ» ያጌዳ።

25 ሄዋ ዲራው፣ ሄ ካሊያዋ ዬሱሳ ሃይላኮ ሸቂዳ፣ «ጎዳው፣ ኢ ኦኔ?» ያጌዳ።

26 ዬሱሲ ዛሬዳ፣ «ታኒ ኡኪላን ጫባ ቱሻዳ አሚያዋ ኣ» ያጌዳ። ቃሲ ኡኪላ ማንሳ ኣኪዳ፣ ጫባ ቱሸዳ፣ ሲሞና ናባ፣ ዪሁዳ ኣሰቆሮቱሲ አሚዳ። 27 ዪሁዳይ ኡኪላ ማንሳዋ ኣኮዋፔ ጉዩያን፣ ሴፃናይ ኤሌካ ዪሁዳን ጌሌዳ። ዬሱሲ ኣ፣ «ኔኒ ኦላናዋ ኤሌላ ኦላ!» ያጌዳ። 28 ሺን ሄ ሳባን ኡቴዳዋንቴፔ ኦኒኔ ዬሱሲ ሄዋ ኣ ኣዩሲ ጌዳንቶኔ ኤሪቤና። 29 ዪሁዳይ ሚሻ ቃርጨቲያ ኦይቂያ ዲራው፣ ካሊያዋንቴፔ ኢቱ ኢቱ ዬሱሲ ዪሁዳ፣ «ፓሲጋ ቦንቲያ ጋላሳው ባሬና ኮሺያዋ ባዳ ሻማ ዋይ ሂዬሳው ሚጠዋታ አማ ጌዳ» ያጌዳ ቆፔዲኖ።

30 ዪሁዳይ ኡኪላ ማንሳዋ ኣኪዳ፣ ኤሌካ ካሬ ኬሴዳ፤ ሄ ዋይ ሳባይ ቃማ።

**ኦራላ ኣዛዙዋ**

31 ዪሁዳይ ካሬ ኬሴዳዋፔ ጉዩያን፣ ዬሱሲ ያጌዳ፤ «ሃዲ ታኒ ኣሳ ናባይ ቦንቲታዲ፣ ያሳይካ ታ ባጋና ቦንቲቲዳ። 32 ያሳይ ታ ባጋና፣ ኣሳ ናባ ባጋና ቦንቲቶፔ፣ ኢ ባሬ ሁጹው ታና ኣሳ ናባ ቦንቲናዋ፤ ቃሲ ኢ ታና ኤሌካ ቦንቲናዋ። 33 ታ ናቶ፣ ታኒ ሂንቴናና ዳሮ ዋዲያ ጋሚዲኬ። ሂንቴንቴ ታና ኮያና፤ ሺን ታኒ ኣዪሁዳቱዋ፣ ስታኒ ቢያሳ ሂንቴንቴ ባናው ዳንዳዩኪታ፣ ጌዳዋዳን፣ ሂንቴዉካ ሃዲ ኦዳይ። 34 ታኒ ሂንቴንታ ኦራላ ኣዛዙዋ ኣዛዛይ፤ ኢቱ ኢቱዋ ሲቂቲ። ታኒ ሂንቴንታ ሲቆዳዋዳንካ፣ ሂንቴንቴ ኢቱ ኢቱዋ ሲቃና ቤሴ። 35 ሂንቴንቴ ኢቱ ኢቱዋና ሲቆቶፔ፣ ታና ካሊያዋንታ ጊዲያዋ ኣሳይ ኡባይ ኤራና» ያጌዳ።

ደዲሮሴ ካዳናዋ ዬሱሲ ካሲቲዳ ኦዳዳ  
(ማት 26:31-35፤ ማር 14:27-31፤ ሉቅ 22:31-34)

36 ሲሞን ደዲሮሴ ዬሱሳ፣ «ጎዳው፣ ኔኒ ሃቃ ባይ?» ያጌዳ። ዬሱሲ ዛሬዳ፣ «ታኒ ቢያሳ ኔኒ ሃዲ ታና ካላናው ዳንዳያካ፤ ሺን ጉዬፔ ካላና» ያጌዳ።

37 ጴጥሮስ፡ «ጎዳው፡ ታኒ ኔና ሃዒ ካላናው አዪሲ ዳንዳዪኪታ? ታኒ ኔ ዲራው፡ ሃይቃናውካ ገገ ኡታዲ!» ያጌዳ።  
 38 ዬሱሲ ዛሪዳ፡ «ታ ዲራው ሃይቃናው ሃዒ ቱሙ ገገ ኡታዲ? ታኒ ኔው ቱሙዋ ኦዲይ፤ ኩቱ ዋሳናፔ ካሴ፡ ኔኒ ታና ሄዙ ጌዳ ካዳናሳ» ያጌዳ።

# 14

ዬሱሲ፡ አዉዋኮ አፊያ ኦጊያ

1 ዬሱሲ ካሊያዋንታ «ሂንቴንቱ ዋዛናይ ሂርጎፕ፤ ያሳን አማኒቲ፤ ታናንካ አማኒቲ። \* 2 ታ አቡ ጎሌን ዳር ሳዓይ ዳዔ። ሄዋ ገዳኔንቶ፡ ታኒ ሂንቴንቲሲ ሄዋ ኦዲኬ፤ ታኒ ሂንቴንቲሲ ሳዓ ገገሳናው ባይ። 3 ታኒ ባይ ሳዓ ገገሴዳዋፔ ጉዬያን፡ ታኒ ዳዒያ ሳዓን ሂንቴንቲካ ዳዓና ማላ፡ ሲማ ያዳ ሂንቴንታ ታኮ አካ አፋና። 4 ቃሲ ሂንቴንቲ ታኒ ቢያ ኦጊያ ኤሪታ» ያጌዳ።

5 ቶማሲ፡ «ጎዳው፡ ኔኒ ቢያሳ ኮኒ ኤሮኮ፤ ኦጊያ ዋኒዳ ኤራናው ዳንዳዬቶ?» ያጌዳ።

6 ዬሱሲ ዛሪዳ፡ «ኦጊ፡ ቱሙኔ ዳዑ ታና፤ ታ ባገናፔ አቲን፡ ኦኒኔ ታ አቡኮ ባናው ዳንዳዬና። 7 ሂንቴንቲ ታና ኤሪያዋ ገዲንቶ፡ ታ አባካ ኤራና፤ ሃዒፔ ዶሚዳ፡ ሂንቴንቲ አ ኤሪታኔ ቃሲ አ ቤዔዲታ» ያጌዳ።

8 ፒሊጶሲ ዬሱሳ፡ «ጎዳው፡ አዉዋ ኑና ቤሳ፤ ሄዌ ኑሲ ገዳናዋ» ያጌዳ።

9 ዬሱሲ ዛሪዳ ያጌዳ፤ «ፒሊጶሳ፡ ታኒ ሃዋ ከና ዋዲያ ሂንቴናና ዳዒናካ ታና ኤሪኪ? ታና ቤዔዳ ኡራይ አዉዋካ ቤዔዳ፤ ያቲና፡ ኔኒ ዋጋዳ፡ (አዉዋ ኑና ቤሳ) ጋይ?» 10 ታኒ አዉዋ ገዲን ዳዒያዋ ቃሲ አዉካ ታ ገዲን ዳዒያዋ ኔኒ አማኒኪ? ታኒ ሂንቴንቲሲ ኦዲያ ቃላ ታኒ ታፔ ኦዲኬ፤ ሺን ታ ገዲን ዳዒያ አዉ ባሪ ኦሱዋ ኦሉ። 11 ታኒ አዉዋ ገዲን ዳዒያዋኔ ቃሲ አዉካ ታ ገዲን ዳዒያዋ ታና አማኒቲ፤ ሄዌ ጳዮፔ፡ ታ ኦሱዋባው ታና አማኒቲ።

12 «ታኒ ሂንቴንቲሲ ቱሙዋ ኦዲይ፤ ታና አማኒያ ኡራይ ታኒ ኦሊያ ኦሱዋ ኦላና። ታኒ አዉዋኮ ቢያ ዲራው፡ ሄ ኡራይ ሃዋፔ አዲያ ኦሱዋ ኦላና። 13 አዉ ናዓ ጋሱዋን፡ ታ ባገና ቦንቼታና ማላ፡ ታ ሱንሳን ሂንቴንቲ ዋሲያ ኡባባ ታኒ ሂንቴንቲሲ ፖላና። 14 ሂንቴንቲ ታ ሱንሳን ታና አያኔ ኦቾፔካ፡ ታኒ ፖላና።

---

\* 14:1 ያሳ አማኒቲ፤ ታናንካ አማኒቲ። ያሳን አማኑ ሂንቴው ዳዔ ጉሳይ፡ ታናንካ አማኑ ዳዔ ጉሳ።

ዬሱሲ አያና ጌሻ ኪታናው ኢሜዳ ሂደታ

15 «ሂንቴንቱ ታና ሰቂያዎ ጊዶፔ፣ ታ አዛዙዎ ናጋና። 16-17 ታኒ አወዋ ዋሳና፤ ሂንቴናና ሜጲናው ደዓና ማለ፣ ቱማቴላ አያና፣ ሃራ ሜንሌሌያዎ ሂንቴንቱሲ ኢ ኢማና። ሃ ሳዓይ ሄ ቱማቴላ አያና ቤዔናዋኔ ኤሬናዎ ጊዲያ ዲራው፣ አ አካናው ዳንዳዬና፤ ሺን ኢ ሂንቴናና ደዔያ ዲራውኔ ሂንቴንቱ ጊዶን ደዓና ዲራው፣ ሂንቴንቱ አ ኤሪታ።

18 «ታኒ ሂንቴንታ አወኔ አታ ባይና ዪዎ ናናዳን ሂንቴሬካ አጋባሺኬ፤ ታኒ ሲማዴ ሂንቴንቱኮ ያና። 19 ጉላ ዋዲያፔ ጉዪያን፣ አላሚ ታና ላዔንሱዋ ቤዔና፤ ሺን ሂንቴንቱ ታና ቤዓና፤ ታኒ ዴዑዋን ደዔያ ዲራው፣ ሂንቴንቱካ ቃሲ ዴዑዋን ደዓና። 20 ታኒ ታ አወዋ ጊዶን ደዔያዋኔ ሂንቴንቱ ታ ጊዶን ደዔያዋ፣ ቃሲ ታኒ ሂንቴንቱ ጊዶን ደዔያዋኔ ሂንቴንቱ ሄ ጋላሲ ኤራና።

21 «ታ አዛዙ አ ማታን ደዔያ አሳይ፣ ቃሲ ሄ አዛዙዋካ ናጊያዌ፣ ኢ ታና ሰቂያ አሳ። ታና ሰቂያ አሳ ታ አቡካ ሲቄ፤ ታኒካ አ ሲቃይ። ታኒ አው ቆንጫና» ያጌዳ።

22 ዪሁዳ አሰቆርታ ጊዴና ዪሁዳይ ዬሱሳ፣ «ጎዳው፣ ኔኒ ኔ ሁጲያ አላሚያ ቤሴናን፣ ኑና ቤሳና ጊያዋ ዋጋዴ ጋይ?» ያጌዳ።

23 ዬሱሲ፣ «ታና ሰቂያ ኦኒኔ ታ ቃላ ናጌ፤ ታ አቡ አ ሲቃናዋ፤ ቃሲ ታ አቡኔ ታኒኔ አኮ ዪዳ፣ አናና ደዓና። 24 ታና ሰቄና ኡሪይ ኦኒኔ ታ ቃላው አዛዜቴና፤ ሂንቴንቱ ሲሲያ ቃላይ ታና ኪቴዳ አወዋፔ አቲን፣ ታዎ ጊዴና።

25 «ታኒ ሂንቴናና ኢቲፔ ደዓዴ ሃዋ ሂንቴንቱሲ ኦዳዲ፤ 26 ሺን ጌሻ አያናይ፣ ሜንሌሌያዌ፣ አወ ታ ሱንላን ኪታናዌ፣ ሂንቴንታ ኡባባ ታማሪሳናዎ። ታኒ ሂንቴንቱሲ ኦዳዳ ኡባባካ ሂንቴንታ ሃሳዪሳናዎ።

27 «ታኒ ሳርቴላ ሂንቴናና ዋላይ፤ ታ ሳርቴላ ሂንቴንቱሲ ኢማይ። ታኒ አላሚ ኢሚያ ሳርቴላ ማላ ኢሚከ። ሂንቴንቱ ሂርሳፒቴኔ ያዮፒቴ። 28 ታኒ ሂንቴንቱሲ፣ «ታኒ ባይ፤ ሺን ሲማዴ ሂንቴንቱኮ ያና» ጌዳዋ ሲሴዲታ፤ ሂንቴንቱ ታና ሰቄዳዎ ጊዳንቶ፣ ታፔ አወ ዳሪያ ዲራው፣ ታኒ አወዋኮ ቢያዋን ሂንቴንቱ ናሺታኒታ። 29 ሄዌ ሃኒያ ዋዴ ሂንቴንቱ አማናና ማለ፣ ሄዌ ሃኔናን ደዒሺን፣ ሃናና ካሴታዴ ታኒ ሂንቴንቱሲ ኦዳዲ።

30 «ሃ አላሚያ ሞዲያዌ ዪያ ዲራው፣ ታኒ ሃዋፔ ሲንላን ሂንቴናና ሎይላ ሃሳዪከ። ታና ኢ አይኔ አላናው ዳንዳዬና። 31 ሺን ታኒ አወዋ ሰቂያዎ አላሚ ኤራናው ቤሴ፤ ቃሲ ታኒካ አወ ታና አዛዜዳዋዳን አሳይ። ዴንዲ ኤቂቴ፤ ሃዋፔ ቦይቴ።



# 15

ዎዪኒያ ጊያ ቱራው ቱሙ እኑ ዩሱሳ

1 «ታኒ ዎዪኒያ ጌቲቲያ ቱራው ቱሙ እኖ፤ ጎሻንቻይ ታ አባ።  
2 ታ ጊደን ዳዒያ አይፊያ አይፊና ቱራ ማራ ኡባ ኢ ካሪ፤ አይፊያ ቱራ ማራ ኡባይ ካሴዎፔ ሎይሊ አይፋናዳን፣ ሄ ማራ ዪራ ኢ ጪጊዳ ጌሻና። 3 ታኒ ሂንቴንቱሲ ሃዒ ኦዳዳ ቃላ ጋሱዋን፣ ሂንቴንቱ ጌሻ። 4 ታ ጊደን ዳዒቲ፤ ታኒካ ሂንቴንቱ ጊደን ዳዒና። ዎዪኒያ ቱራ ማራይ እኑዋና እቲፔ ዳዒናን ጳዮፔ፣ ሄ ማራይ ባሪካ አይፊያ አይፋናው ዳንዳዬናዋዳን፣ ሂንቴንቱካ ታ ጊደን ዳዒናን ጳዮፔ፣ አይፊያ አይፋናው ዳንዳዪኪታ።

5 «ታኒ ዎዪኒያ ቱራው እኖ፤ ሂንቴንቱ ሄ ቱራ ማራቱዋ። ታ ጊደን ዳዒያ ኡራይ፣ ታኒካ አ ጊደን ዳዒያ ኡራይ፣ ዳር አይፊያ አይፋና፤ አዪሲ ጎፔ፣ ታኒ ባይናን ሂንቴሪካ አይኔ አፋናው ዳንዳዪኪታ። 6 ታ ጊደን ዳዒና ኡራይ ቱራ ማራዳን፣ ካሪን ዩጊና ሜሌዳዎ ሸሺዳ ታማን ዎሊና፣ ኢ ኤፃናዋ። 7 ሂንቴንቱ ታ ጊደን ዳዒ፣ ቃሲ ታ ቃላይካ ሂንቴንቱ ጊደን ዳዒ፣ ሂንቴንቱ ኮዬዳዎ አያ ጊዲናካ ዎሲቲ፤ ሂንቴንቱ አካኒታ። 8 ሂንቴንቱ ዳር አይፊያ አይፎፔኔ ቃሲ ታና ካሊያዋንታ ጊደፔ፣ ሄዋን ታ አቡ ቦንቹታናዋ። 9 አዉ ታና ሲቁዳዎዳን፣ ታኒካ ሂንቴንታ ሲቃዲ፤ ታ ሲቁዋን ዳዒቲ። 10 ታኒ ታ አቡ አዛዙዋ ናጋዴ አ ሲቁዋን ዳዒዳዎዳን፣ ሂንቴንቱካ ታ አዛዙዋ ናጎፔ፣ ታ ሲቁዋን ዳዒኒታ።

11 «ታ ናሽቻይ ሂንቴናና ዳዒና ማላኔ፣ ሂንቴንቱ ናሽቻይ ኩሜንሳ ጊዳና ማላ፣ ታኒ ሃዎ ሂንቴንቱሲ ኦዳዲ። 12 ታ አዛዙ ሃዎ፤ ታኒ ሂንቴንታ ሲቁያዎዳን፣ ሂንቴንቱካ እቲ እቱዋና ሲቁቲቲ። 13 ባሪ ሽምፑዋ ባሪ ላጌው አሊዳ አሚያዎፔ አፏያ ሲቁ አሲኔካ ባዎ። 14 ታኒ ሂንቴንታ አዛዙዳዎ ኡባ ኦሎፔ፣ ሂንቴንቱ ታ ላጌቱዋ።

15 «አይሊ ባሪ ጎዳይ አሊያዎ ኤሬና ዲራው፣ ታኒ ሂንቴንታ ሃዎፔ ሲንሳው አይላቱዋ ጊኬ፤ ሺን ታኒ ሂንቴንታ ታ ላጌቱዋ ጋዲ። አዪሲ ጎፔ፣ ታ አዉዎፔ ሲሴዳ ኡባባ ታኒ ሂንቴንቱሲ ኦዳዲ። 16 ታኒ ሂንቴንታ ዶሪዳዎፔ እቲ፣ ሂንቴንቱ ታና ዶሪቤይኪታ። ሂንቴንቱ ቢዳ አይፊያ አይፋና ማላኔ ዳዒና ማላ፣ ታኒ ሂንቴንታ ሱንሳዲ። ቃሲ አዉካ ሂንቴንቱ ታ ሱንሳን \* ዎሲዳዎ ኡባ አማና። 17 ታኒ ሂንቴንታ አዛዚያዌ ሃዎ፤ እቲ እቱዋና ሲቁቲቲ።

\* 15:16 ታ ሱንሳን፣ ዎይ «ታና ካሊያዎንታ ጊዲያ ዲራው»

ዬሱሲ ሃ አላሚ ኢጲያዎ ኦዴዳ

18 «አላሚ ሂንቲንታ ኢዖፔ፣ ካሴቲዳ ታና ኢጲዳዎ አኩኪቱ።  
 19 ሂንቲንቱ አላሚያሳ ጊዴዴንቶ፣ አላሚ ባሬዎዳን ሂንቲንታ ሲቃና፤ ሺን ታኒ ሂንቲንታ አላሚያፔ ዶሬዳዎፔ አቲን፣ ሂንቲንቱ አላሚያሳ ጊዴኪታ፤ አላሚ ሂንቲንታ ኢጲያዎ ሃዋሳ። 20 «አይሊ ባሬ ጎዳፔ ዳሬና፣ ጋዴ ታኒ ሂንቲንቱሲ ኦዴዳዎ ሃሳዬ። አንቲንቱ ታና ዬዳርሴዳዎ ጊዶፔ፣ ሂንቲናካ ዬዳርሳና። አንቲንቱ ታ ቃላ ናጌዳዎ ጊዶፔ፣ ሂንቲንቱ ቃላካ ናጋናዋንታ። 21 ሺን አንቲንቱ ታና ኪቲዳዎ ኤሬና ዲራው፣ ሃ ኡባ ታ ጋሱዋን አንቲንቱ ሂንቲንቱ ቦላ አላናዋንታ። 22 ታኒ ያዴ አንቲንቱሲ ኦዴናዎ ጊዲንቶ፣ አንቲንቱሲ ናጋራ ጊዴና፤ ሺን ሃዲ አንቲንቱ አሊያ ናጋራ ጋሶዲያዎ ባዎ። 23-24 ታና ኢጲያዎ ታ አወዋካ ኢጲዳ። ኦኒኔ አሊቤና ኦሱዋ አንቲንቱ ጊዶን ታኒ ኦላቤናባ ጊዲንቶ፣ አንቲንቱሲ ናጋራ ጊዴናን አታናዎ፤ ሺን ሃዲ አንቲንቱ ታኒ ኦሊዳ ኦሱዋ ቤዲዳ፣ ታናካ ታ አወዋካ ኢጲዳና። 25 ሺን አንቲንቱ ሂጊያን፣ «ታና ጮ ኢጲዳና» ጌቲቲዳ ያፌቲዳዊ ፖሌታና ማላ፣ ሃዌ ሃኔዳ።

26 «ሺን አወዋፔ ዪያ ቱማቲላ አያናይ ሜንሌሊያዊ ያናዎ። ታኒ አወዋፔ ሂንቲንቱሲ አ ዬዳና፤ ቃሲ ኢ ታባ ማርካታናዎ።  
 27 ሂንቲካ ቃሲ ካሴፔ ዶሚዳ፣ ታናና ዴዲያ ዲራው፣ ታባ ማርካታና።

# 16

1 «ታኒ ሃዋ ሂንቲንቱ ቆቤቲና ማላ፣ ሂንቲንቱሲ ኦዳዲ።  
 2 አንቲንቱ ሂንቲንታ ባሬንቱ አዪሁዳ ዋሳ ጎሊያፔ ኬሲ ዬዳናዋንታ። ሂዋ ቦላ ቃሲ ሂንቲንታ ዋጂያ ኡራይ ያሳው አሊያዎ አው ማላቲያ ዋዲ ያናዎ። 3 አንቲንቱ ሂዋ ሂንቲንቱ ቦላ አሊያዎ ታናኔ አወዋ ኤሬና ዲራሳ። 4 ሺን አንቲንቱ ሂዋ ሂንቲንቱ ቦላ አሊያ ዋዲ ጋኪያ ዋዳ፣ ታኒ ሂንቲንቱሲ ኦዴዳዎ ሂንቲንቱ ሃሳያና ማላ፣ ታኒ ሂንቲንቱሲ ሃዋ ኦዳዲ።

ጌሻ አያና ኦሱዋ

«ታኒ ሂንቲናና ዴዲያ ዲራው፣ ኮይሮ ሂዋ ሂንቲንቱሲ አዳቤይኬ። 5 ሺን ሃዲ ታኒ ታና ኪቲዳዋኮ ባይ፤ ሺን ሂንቲፔ ኦኒኔ፣ «ሃቃ ባይ?» ጊዴ ታና ኦቺያዊ ባዎ። 6 ሺን ታኒ ሃዋ ኦዴዳ ዲራው፣ ሂንቲንቱ ዋዛናን ዳሮ ካዩ ዴዴ። 7 ሺን ታኒ ሂንቲንቱሲ ቱሙዋ ኦዳይ፤ ታኒ ቢያዊ ሂንቲንቱሲ ሎዳ። አዲሲ ጎፔ፣ ታኒ ባና ቆዮፔ፣ ሜንሌሊያዊ ሂንቲንቲኮ ዬና፤ ሺን ታኒ ቦፔ።

15:25 ማዝ 35:19፤ 69:4

አ ሂንቴንቴኮ ይዳና። 8 ቃሲ ሜንጮሊያዌ ዪዳ፣ ኡንቴንቴ ናጋራባ፣  
 ያሳ ዊሎቴላባኔ ፐርዳባ ሃ ሳባ አሳይ ባዪዜዳዋ ቤሳናዋ።  
 9 ናጋራባይ አሳይ ታና አማኔና ዲራሳ። 10 ዊሎቴላባይ ቃሲ  
 ታኒ አዉዋኮ ቢያ ዲራው፣ ሂንቴንቴ ታና ላዔንሱዋ ቤዒኪታ።  
 11 ያሳ ፐርዳባይ ቃሲ አላሚያ ዋዲያዌ ፐርዴቴዳ ዲራሳ።

12 «ታኒ ሂንቴንቴሲ ኦዲያባይ ዳርባይ ዴዔ፤ ሺን ሃዒ  
 ሂንቴንቴሲ ጌሌና። 13 ቱማቴላ አያናይ ዪያ ዎዴ፣ ሂንቴንታ  
 ቱማቴላ ኡባኮ ካሌላናዋ። አዪሲ ጎፔ፣ ኢ ባሬ ሲሴዳዋ ኦዳናፔ  
 አቲን፣ ባሬፔ አይኔ ኦዳና። ቃሲ ሲንላፔ ያናባ ሂንቴንቴሲ ኢ  
 ኦዳናዋ። 14 ኢ ታና ቦንቻናዋ፤ አዪሲ ጎፔ፣ ኢ ታው ዴዒያዋፔ  
 አኪዴ፣ ሂንቴንቴሲ ኦዳናዋ። 15 አዎ ዴዒያባይ ኡባይ ታዋ፤  
 ሜንጮሊያዌ ታው ዴዒያባፔ አኪዴ፣ ሂንቴንቴሲ ኦዳናዋ ታኒ  
 ጌዳዌ ሃዋሳ።

**ዬሱሳ ካሊያዋንቴ ካዩ ናሼቻው ላሚታና**

16 «ጉላ ዎዲያፔ ጉዪያን፣ ሂንቴንቴ ታና ቤዒኪታ፤ ቃሲ ጉላ  
 ዎዲያፔ ጉዪያን፣ ሂንቴንቴ ታና ቤዒና» ያጌዳ።

17 ዬሱሳ ካሊያዋንቴፔ ኢቱ ኢቱ ባሬንቴ ጊደን፣ « ለጉላ  
 ዎዲያፔ ጉዪያን፣ ሂንቴንቴ ታና ቤዒኪታ፤ ቃሲ ጉላ ዎዲያፔ  
 ጉዪያን፣ ሂንቴንቴ ታና ቤዒኪታ፤ አዪሲ ጎፔ፣ ታኒ አዉዋኮ ባይ)  
 ጊያዌ ሄዌ ዋጊያዌ?» ያጌዲኖ። 18 « ለጉላ ዎዲያፔ ጉዪያን»  
 ጊያዌ ዋጊያዌ? ኢ አዪሲ ሃሳዪንቶኔ ኑሲ ኤሬቴና» ያጌዲኖ።

19 ኡንቴንቴ ባሬና እቻናው ኮዪያዋ ዬሱሲ ኤሬዴ፣ ኡንቴንታ  
 ያጌዳ፤ «ታኒ፣ ለጉላ ዎዲያፔ ጉዪያን፣ ሂንቴንቴ ታና ቤዒኪታ፤  
 ቃሲ ጉላ ዎዲያፔ ጉዪያን፣ ሂንቴንቴ ታና ቤዒና» ጌዳዎ ሂንቴንቴ  
 ኢቱ ኢቱዋ ኦቲቴ? 20 ታኒ ሂንቴንቴሲ ቱሙዋ ኦዳይ። ሂንቴንቴ  
 ዬካናኔ ካዮታና፤ ሺን ሃ አላሚ ናሼታና። ቃሲ ሂንቴንቴ ካዮታና፤  
 ሺን ሂንቴንቴ ካዮቶዌ ናሼቻ ጊዳናዋ። 21 ኢቲ ሚሺራታ ናባ  
 ዬላና ሃኒያ ዎዴ፣ ባሬ ዬሊያ ዎዲ ጋኬዳ ዲራው፣ አይቄታው፤  
 ሺን ናባይ ዬሌቴዳዋፔ ጉዪያን፣ ናባይ ሃ ሳባን ዬሌቴዳ ናሼቻ  
 ዲራው፣ ባሬ ኦይላ ሃሳዪኩ። 22 ሄዎ ዲራው፣ ሂንቴንቴካ  
 ሂንቴንቴ ዎዛናን ካዮቲታ፤ ሺን ታኒ ላዔንሱዋ ሂንቴንታ ቤዒና፤  
 ቃሲ ሂንቴንቴ ዎዛናይ ሎይሊ ናሼታና፤ ሂንቴንቴ ናሼቻ ኦኒኔ  
 ሂንቴፔ አከና።

23 «ሄ ጋላሲ ሂንቴንቴ ታና አይኔ ዎሲኪታ። ታኒ ሂንቴንቴሲ  
 ቱሙዋ ኦዳይ፤ ሂንቴንቴ ታ ሱንሳን ዎሲያዋ ኡባ አዉ ሂንቴንቴሲ  
 አማናዋ። 24 ሃዒ ጋካናሲ ታ ሱንሳን አይኔ ዎሲቤይኪታ፤  
 ሂንቴንቴ ናሼቻይ ፖሌታና ማላ፣ ያሳ ዎሲቴ፤ ሂንቴንቴ አካና።

25 «ሃዋ ታኒ ሂንቴንቴሲ ሌሚሱዋን ኦዳዲ፤ ሺን ታኒ ሌሚሱዋን ኦዳና ዋዲ ያናዋ፤ ሺን አዉዋባ ታኒ ሂንቴንቴሲ ቆንጨያን ኦዳና። 26 ታኒ ሄ ጋላሲ፡ ሂንቴንቴ ታ ሱንፋን አዉዋ ዋሳና፤ ቃሲ ሂንቴንቴ ዲራው፡ ታኒ አዉዋ ዋሳና ጊኬ። 27 አዪሲ ጎፔ፡ አዉ ባሬ ሁጹው ሂንቴንገታ ሲቄ፤ ሂንቴንቴ ታና ሲቄያ ዲራውኔ ታኒ አዉዋ ማታፔ ዬዳዋ አማኖ ዲራው፡ ኢ ሂንቴንገታ ሲቄ። 28 ታኒ አዉዋ ማታፔ ሃ አላሚያ ያዲ፤ ቃሲ ሃ አላሚያ አጋዴ አዉዋቦ ባና» ያጌዳ።

29 ዬሱሳ ካሊያዋንቴ ዛሬዴ ዬሱሳ፡ «ቤዓ፡ ሃዲ ኔኒ ቆንጨያን ሃሳያሳ፤ ሌሚሱዋን አይኔ ሃሳያካ። 30 ኔኒ ኡባባ ኤሪያዋ ኩኒ ሃዲ ኤሬቶ፤ ቃሲ ኔና ኦኒኔ ኦቻና ማላ፡ ኔኒ ኮዬናዋ ኤሬቶ። ሄዌ ኩና ኔኒ ያሳፔ ዬዳዋ አማንሴ» ያጌዲኖ።

31 ዬሱሲ ዛሬዴ ኡንቴንገታ፡ «ሃዲ አማኒቴ? 32 ቤዒቴ፡ ሂንቴንቴ ሂንቴንቴ ጎሌ ጎሌ ላሌቲያ ዋዲኔ ታ ያላላ ዬጊ ባሺያ ዋዲ ያናዋ፤ ሃዲካ ዪዲጌዳ። ሺን አዉ ታናና ዴዒያ ዲራው፡ ታ ያላላ ጊዲኬ። 33 ሂንቴንቴ ታ ጊደን ዴዒዴ፡ ሳሮ ዴዒና ማላ፡ ታኒ ሃዋ ሂንቴንቴሲ ኦዳዲ። አላሚያን ሂንቴንቴ ዋዬታና። ሺን ሚኒቴ፤ ታኒ አላሚያ ያናዲ» ያጌዳ።

# 17

## ዬሱሳ ዋሳ

1 ዬሱሲ ሄዋ ሃሳዬዳዋፔ ጉዪያን፡ ፑዴ ሳሉዋ ያሊዴ፡ ሃዋዳን ያጌዳ፤ «ታ አቦ፡ ዋዲ ጋኬዳ፤ ኔ ናዒይ ኔና ቦንቻና ማላ፡ ኔኒካ ኔ ናዒ ቦንቻ። 2 አዪሲ ጎፔ፡ ኔኒ አው ኢሜዳ ኡባው ሜዲና ዴዑዋ ኢ አማና ማላ፡ አሳ ኡባ ቦላን አው ማታ ኢማዳ። 3 አሳይ ኔና ኢቲ ቱሙ ያሳ ጊዴዳዋ ኤራና ማላኔ፡ ቃሲ ኔኒ ኪቴዳ ዬሱሲ ኪሪሰቶሳ ኤራና ማላ፡ ሃዌ ሜዲና ዴዑዋ። 4 ኔኒ ታው ኦላናው ኢሜዳ ኦሱዋ ፖላዴ፡ ኔና ሳዒን ቦንቻዲ። 5 ሃዲካ ቃሲ አዋ፡ አላሚ ሜዴታናፔ ካሴ ኔ ማታን ታው ዴዒያ ቦንቹዋን ኔ ሲንፋን ታና ቦንቻ።

6 «አላሚያ አሳፔ ኔኒ ታው ኢሜዳዋንቶ ኔ ሱንፋ ኤሪሳዲ፤ ኡንቴንቴ ኔዋንገታ፤ ቃሲ ኔኒ ኡንቴንገታ ታው ኢማዳ። ኡንቴንቴ ኔ ቃላዉካ አዘዘቴዲኖ። 7 ሃዲ ኔኒ ታው ኢሜዳ ኡባባይ ኔፔ ዬዳዋ ኡንቴንቴ ኤሪኖ። 8 አዪሲ ጎፔ፡ ኔኒ ታው ኢሜዳ ቃላ ታኒ ኡንቴንቴሲ ኢማዳ፤ ኡንቴንቴካ ሄ ቃላ አኬዲኖ። ታኒ ኔ ማታፔ ዬዳዌ ቱማ ጊዲያዋ ኤሪዴ ኔኒ ታና ኪቴዳዋካ አማኔዲኖ።

9 «ታሲ ኡንቱንቱሲ ዋሳይ፤ አላሜው ኔና ዋሲኬ። ሺን ኔኒ ታው አሜዳ አሳው ዋሳይ፤ አዱሲ ጎፔ፣ ኡንቱንቱ ኔዋንታ።  
 10 ታው ደዒያ ኡባባይ ኔባ፤ ቃሲ ኔው ደዒያ ኡባባይካ ታባ። ታሲ ኡንቱንቱ ባገና ቦንቹታዲ። 11 ታሲ ሃዋፔ ጉዱያን፣ አላሚያን ደዒኬ፤ ኡንቱንቱ አላሚያን ደዒኖ፤ ታሲ ሃዒ ኔቦ ባይ። ጌሻ አዎ፣ ሃ ኔኒ ታው አሜዳዋንቱ ኔኒኔ ታሲ ኢቱዋ ጊዲያዋዳን፣ ኡንቱንቱ ኢቱዋ ጊዳና ማላ፣ ኡንቱንታ ኔ ሱንላን ናጋ። 12 ታሲ ኡንቱንቱና አላሚያን ደዒዴ፣ ኔኒ ታው አሜዳ ኔ ሱንላ ዋልቃን ኡንቱንታ ናጋዲ። ታሲ ኡንቱንታ ናጋዲ፤ ያሳ ማፃፋይ ጌዳዌ ፖሌታና ማላ፣ ባሻይ ቤሲያ ኡሬፔ አቲን፣ ኡንቱንቱፔ ሃራይ ኦኒኔ ባይቤና።

13 «ሃዒ ታሲ ኔቦ ባይ፤ ኡንቱንቱ ዋዛናን ታ ናሼቻይ ፖሌታና ማላ፣ ሃዋ ታሲ አላሚያን ሃሳያይ። 14 ታሲ ኡንቱንቱሲ ኔ ቃላ አማዲ፤ ታሲ አላሚያሳ ጊዳናዋዳን፣ ኡንቱንቱካ አላሚያሳ ጊዳና ዲራው፣ አላሚ ኡንቱንታ ኢፃዲ። 15 ኔኒ ዓላሂያፔ ኡንቱንታ ናገና ማላ ዋሲያዋፔ አቲን፣ አላሚያፔ ኬሳና ማላ ዋሲኬ። 16 ታሲ አላሚያሳ ጊዳናዋዳን፣ ኡንቱንቱካ አላሚያሳ ጊዲኪኖ። 17 ኔኒ ቱማቲላን ኡንቱንታ ኔዋንታ ኦላ፤ ኔ ቃላይካ ቱማቲላ። 18 ኔኒ ታና አላሚያ ኪቱዳዋዳን፣ ታኒካ ኡንቱንታ አላሚያ ኪታዲ፤ 19 ቃሲ ኡንቱንቱ ቱማቲላን ኔው ዲማታና ማላ፣ ኡንቱንቱ ዲራው፣ ታሲ ታ ሁጲያ ኔው ዲማያዲ።

20 «ታሲ ኡንቱንቱ ዓላላው ዋሲኬ፤ ሺን ኡንቱንቱ ቃላ ኦዲና፣ ታና አማኔዳዋንቱካ ዋሳይ። 21 ኡንቱንቱ ኡባይ ኢቱዋ ጊዳና ማላ፣ ታሲ ዋሳይ። አዎ፣ ኔኒ ታ ጊደን ደዒያዋዳን፣ ቃሲ ታኒካ ኔ ጊደን ደዒያዋዳን፣ ኡንቱንቱ ኑ ጊደን ደዒኖ። ቃሲ ኔኒ ታና ኪቱዳዋ አላሚ አማናና ማላ፣ ኡንቱንቱ ኢቱዋ ጊዲኖ። 22 ኔኒኔ ታሲ ኢቱዋ ጊዲያዋዳን፣ ኡንቱንቱ ኢቱዋ ጊዳና ማላ፣ ኔኒ ታና ቦንቹዳዋዳን፣ ታኒካ ኡንቱንታ ቦንቻዲ። 23 ታሲ ኡንቱንቱ ጊደን ደዒና፣ ኔኒ ታ ጊደን ደዒና፣ ቃሲ ኔኒ ታና ሲቂያዋዳን፣ ኡንቱንታካ ሲቆዋኔ ኔኒ ታና ሃ አላሚያ ኪቱዳዋ አላሚ ኤራናዳን፣ ኡንቱንቱ ኡባ ኢቱዋ ጊዲኖ።

24 «አዎ፣ ሳዒይ ሜዴታናፔ ካሴ ኔኒ ታና ሲቆዳ ዲራው፣ ታው አሜዳ ታ ቦንቹዋ ኡንቱንቱ ቤዓና ማላ፣ ኔኒ ታው አሜዳዋንቱ ታሲ ደዒያ ሳዒን ታናና ደዓና ማላ ኮያዲ።

25 «ጂሎ አዎ፣ አላሚያ አሳይ ኔና ኤሪና፤ ሺን ታሲ ኔና ኤሪይ። ቃሲ ኔኒ ታና ኪቱዳዋ ሃዋንቱ ኤሪኖ። 26 ኔኒ ታና ሲቆዳ ሲቆ ኡንቱንቱ ጊደን ደዓና ማላ፣ ቃሲ ታኒካ ኡንቱንቱ ጊደን ደዓና ማላ፣ ታሲ ኔ ሱንላ ኡንቱንታ ኤሪሳዲ፤ ሲንላዉካ ኤሪሳና» ያጌዳ።

# 18

ዩሱሲ ባሬ ሞርኬቱዋ ኩሺያን ኦይቄቲዳ

(ማጥ 26:47-56፤ ማር 14:43-50፤ ሉቅ 22:47-53)

1 ዩሱሲ ሄዋ ጊዳ፣ ያሳ ዎሴዳዋፔ ጉዲያን፣ ባሬና ካሊያዋንቱና ቄዲሮና ጊያ ዛንጋራ ፒኔዳ። ሄ ሳዓን ኣተኪልቲያ ሳዓይ ዳዔ፤ ዩሱሲኔ ዩሱሳ ካሊያዋንቱ ጌሌዲኖ። 2 ዩሱሳ ኣሌ ኢሜዳ ዩሁዳይ ሄ ሳዓ ኤሬዳ፤ ኣዩሲ ጎፔ፣ ዩሱሲ ኡባ ዎዴ ባሬና ካሊያዋንቱና ሄዋን ሸቄ። 3 ሄዋ ዲራው፣ ካሌሲያ ቄሳቱዋ ካፓቱኔ ፓሪሳዋቱ ዩሁዳና ባናዳን ኢሜዳ ሮማ ዎታዳራቱኔ ጌሻ ጎሊያ ናጊያዋንቱ ኩራዚያ፣ ያቢያኔ ቶራ ኦይቄዳ ሄ ሳዓ ቤዲኖ።

4 ዩሱሲ ባሬና ጋካናው ሃኒያ ኡባባ ኤሬዳ፣ ጋያ ኬሲዳ፣ «ኦና ኮዩቲ?» ያጌዳ

5 ኡንቱንቱ ዛሬዳ፣ «ናዚሬቲያ ዩሱሳ ኮዩቶ» ያጌዲኖ።

ዩሱሲ ዛሬዳ፣ «ታኒ ኣ» ያጌዳ።

ዩሱሳ ኣሌ ኢሜዳ ዩሁዳይካ ሄዋን ኡንቱንቱና ኤቄዳ፤

6 ዩሱሲ፣ «ታኒ ኣ» ጌዳ ዎዳ፣ ኡንቱንቱ ጉዩኮ ሸቄዳ፣ ሳዓን ኩንዳዲኖ። 7 ዩሱሲ ቃሲካ፣ «ኦና ኮዩቲ?»

ያገ ኦቲና ኡንቱንቱ፣ «ናዚሬቲያ ዩሱሳ» ያጌዲኖ።

8 ዩሱሲ ዛሬዳ፣ «ታኒ ኣ ጊዲያዋ ሂንቱንቱሲ ኦዳዳ፤ ሲሚ ሂንቱንቱ ታና ኮዩያዋ ጊዳፔ፣ ሃዋንታ ዩዲቲ» ያጌዳ። 9 ኢ፣ «ታ ኣቦ፣ ኔኒ ታው ኢሜዳዋንቱ ሃራይ ኣቶ፣ ኢቱዋካ ባዩዛቤይኬ» ጌዳዋ ፖሌታና ማላ፣ ሄዋ ጌዳ።

10 ሲሞኒ ጳዒሮሳው ማሻይ ዳዔ፤ ኢ ሄ ማሻ ሸዲኔ ቄሳቱዋ ኡባቱዋ ካፑዋ ቆማ ኡሺቻ ሃይላ ሸጪዳ፣ ቃንዒ ዩጌዳ። ሄ ቆማ ሱንላይ ማልኮሳ። 11 ዩሱሲ ጳዒሮሳ፣ «ኔ ማሻ ሸኩዋን ዛሬዳ ዎላ! ታ ኣቡ ታው ኢሜዳ ሜቱዋ ፀዓ ታኒ ኡሺኪታ?» ያጌዳ።

ዩሱሲ ቄሳቱዋ ካፑዋ ሃና ሲንላ ሸቄዳ

12 ሻላቃይ፣ ዳሮ ዎታዳራቱኔ ቃሲ ጌሻ ጎሊያ ናጊያዋንቱ ዩሱሳ ኦይቄዳ ቃቺዲኖ። 13 ኮይሮ ዩሱሳ ሃናኮ ኣፌዲኖ፤ ሃኒ ሄ ላይሌ ቄሳቱዋ ካፓቱዋ ጊዳዳ ቃያፋ ቦሉዋ። 14 «ኣሳ ኡባ ዲራው፣ ኢቲ ኣሳይ ሃይቄንቶ ሎዓ» ጊዳ ኣዩሁዳቱዋ ዘሬዳዋ ቃያፋ።

ጳዒሮሴ ዩሱሳ ካዳዳ

(ማጥ 26:69-70፤ ማር 14:66-68፤ ሉቅ 22:55-57)

15 ሲሞኒ ጳዒሮሲኔ ሃራ ኢቲ ካሊያዋ ዩሱሳ ካሊዳ ቤዲኖ። ሄ ሃራ ካሊያዋ ቄሳቱዋ ካፑ ኤሬዳ፤ ሄዌ ዩሱሳና ቄሳቱዋ ካፑዋ

ዲርሳ ጋርሳ ጌሌዳ። 16 ሺን ጳጳርሴ ካሬና ዲርሳ ፔንጊያን ኤቄዳ። ቁሳቱዋ ኡባቱዋ ካፑ ኤሪያ ሃራ ካሊያዌ ካሬ ኬሲዳ። ፔንጊያ ናጊያ ናቲው ኦዲዳ። ጳጳርሳ ዲርሳ ጋርሳ ጌሊሴዳ። 17 ፔንጊያ ናጊያ ናታ ጳጳርሳ፡ «ኔኒ ሃ ቢታኒያ ካሊያዋንቱፔ ኢቱዋ ጊዲኪዬ?» ያጋዳ።

ኢ፡ «ቴይቲ፡ ታኒ ጊዲኪ» ያጌዳ።

18 ሳዓይ ሜጊያ ዲራው፡ አይላቱኔ ጌሻ ጎሊያ ናጊያዋንቱ ታማ ኤዲዳ። ቦንቄዳዋ ዩዩ አጲ ኤቄዳ ካሺኖ፤ ጳጳርሴካ ኡንቱንቱና ኤቄዳ፡ ሄ ታማ ካሺ።

**ቁሳቱዋ ካፑ ዬሱሳ ኦፕ ኦሻ**

(ማት 26:59-66፤ ማር 14:55-64፤ ሉቅ 22:66-71)

19 ቁሳቱዋ ኡባቱዋ ካፑ፡ ዬሱሳ ካሊያዋንቱባኔ አ ቲሚርቲያባ ኦቹዳ። 20 ዬሱሴ አው ዛሪዳ፡ «ታኒ አሳ ኡባው ቆንጨያን ኦዳዲ። ታኒ አዩሁዳ ኡባይ ሺቄያ አዩሁዳ ዋሳ ጎሊኒኔ ጌሻ ጎሊያን ኡባ ዋዴ ታማሪሳዲ፤ ጌማን አዩኔ ሃሳያቤይኬ። 21 ያቲና፡ ኔኒ ታና አዩሴ ኦቻይ? ታኒ ኦዳዳዋ ሲሴዳ አሳ ኦቻ፤ ሄ አሳይ ታኒ ኦዳዳዋ ኤሬዳ» ያጌዳ።

22 ዬሱሴ ሄዋ ጌዳ ዋዴ፡ ሄዋን ኤቄዳ ዋታዳራቱዋፔ ኢቱ ዬሱሳ ባቄዳ፡ «ቁሳቱዋ ኡባቱዋ ካፑዋ ቦላ ሃዋዳን ዛራይ?» ያጌዳ።

23 ዬሱሴ ዛሪዳ፡ «ታኒ ባላባ ሃሳዬዳዋ ጊዶፔ፡ ሃዋን ዳዒያ አሳ ኡባው ኦዳ፤ ሺን ታኒ ቱሙዋ ሃሳዬዳዋ ጊዶፔ፡ ታና አዩሴ ባቃይ?» ያጌዳ።

24 ሄዋ ዲራው፡ ሃኒ፡ ቃሺቲ ኡቴዳ ዬሱሳ፡ ቁሳቱዋ ኡባቱዋ ካፑዋ፡ ቃያፋኮ ዬዳዳ።

**ጳጳርሴ ዬሱሳ ላዒንሉዋ ካዳዳ**

(ማት 26:71-75፤ ማር 14:69-72፤ ሉቅ 22:58-62)

25 ጳጳርሴ ሄዋን ኤቄዳ፡ ታማ ካሺ፤ ሃራንቱ አ፡ «ኔኒ ሃ ቢታኒያ ካሊያዋንቱፔ ኢቱዋ ጊዲኪዬ?» ያጌዳ።

ጳጳርሴ፡ «ቴይቲ፤ ታኒ ጊዲኪ» ያጊዴ ካዳዳ።

26 ቁሳቱዋ ኡባቱዋ ካፑዋ ቆማቱዋፔ ኢቱዋ፡ ጳጳርሴ ሃይላ ቃንጭዳ ቢታኒያ ዳቡ ጳጳርሳ፡ «ታኒ ኔና አናና ዳር አታኪልቲያ ጊዶን ቤዓቤይኪታዬ?» ያጊዴ ኦቹዳ።

27 ጳጳርሴ ቃሲካ ካዳዳ፤ ኤሌካ ኩቱ ዋሲ አጌዳ።

ዬሱሲ ጲላዖሳ ሲንላ ሸቄዳ  
(ማጥ 27:1-2፤ 11-14፤ ማር 15:1-5፤ ሉቅ 23:1-5)

28 ኡንቴንቴ ዬሱሳ ቃያፋ ጎሌፔ ሮሜ አሳ አዪሲያዋ ኦሶ ጎሊያ አፊዲኖ። ሳዓይ ዋንታ ጉራ፤ አዪሁዳቱ ፓሲጋ ሲንቴያ ጋላሳ ቁማ ማናው። ባሬንቴ ሁጲያሲ ቱኔና ማላ። ሮሜ አሳ አዪሲያዋ ኦሶ ጎሊያ ጌሊቤይኪኖ። 29 ሄዋ ዲራው። ጲላዖሲ ኡንቴንቴኮ ካሬ ኬሲዳ። «ሃ ቢታኒያ ሂንቴንቴ አያኒ ሞቲቴ?» ያጌዳ።

30 ኡንቴንቴ። «ኢ ኢታባ ኦሊቤናዋ ጊዲንቶ። ኑኒ አ ኔኮ አሆኮ» ያጌዲኖ።

31 ጲላዖሲ ዛሬዳ ኡንቴንቴሲ። «ሂንቴንቴ አ አፊዳ። ሂንቴንቴ ሂጊ ጊያዋዳን። አ ቦላ ፒርዲቴ» ያጌዳ።

አዪሁዳቱ። «አናኔ ዎጲያ ማታይ ኑሲ ባዋ» ያጌዲኖ። 32 ሃዌ ሃኔዳዌ ዬሱሲ አይ ማላ ሃይቁዋ ሃይቃኔንቶ ኤሪሳናው ሃሳዬዳዌ ፖሌታናሳ።

33 ጲላዖሲ ባሬ ኦሱዋ ጎሌ ላዔሉዋ ጌሊዳ። ዬሱሳ ጄሲዳ። «ኔኒ አዪሁዳ ካቴ?» ያጊዳ አ ኦቼዳ።

34 ዬሱሲ ጲላዖሳ። «ሃ ኦቫ ኔኒ ኔፔ ኦቻዪዬ ዎይ ሃራ አሳይ ኔው ታባ ኦዳዳ?» ያጌዳ።

35 ጲላዖሲ ዛሬዳ። «ታና አዪሁዳ አሳ ጋይ? ኔ ዛሬቴኔ ቄሳቱዋ ካፓቱ ኔና ታው አሊ አሚዲኖ፤ ኔኒ አያ ኦሳዲ?» ያጌዳ።

36 ዬሱሲ። «ታ ካዉቴላይ ሃ አላሚያና ጊዳና። ታ ካዉቴላይ ሃ አላሚያና ጊዳዳንቶ። ታና አዪሁዳቶ አሊ አሚናዳን። ታው ኦሊያዋንቴ ታው ኦሌታና፤ ሺን ታ ካዉቴላይ ሃ አላሚያና ጊዳና» ያጌዳ።

37 ሄዋ ዲራው። ጲላዖሲ ዬሱሳ። «ያቲና። ኔኒ ካቴዬ?» ያጊዳ ኦቼዳ።

ዬሱሲ ዛሬዳ። «ኔኒ ታና ካቴያ ጋዳ። ታኒ ቱማ ማርካታና ዲራው ዬሌታዲ፤ ቃሲ ሄዋ ዲራው። ሃ አላሚያ ያዲ። ቱሙዋ ባጋ ጊዳዳ ኦኒኔ ታኒ ጊያዋ ሲሴዳ» ያጌዳ።

38 ጲላዖሲ። «ቱሙ አዬ?» ያጌዳ።

ጲላዖሲ ሄዋ ጌዳዋፔ ጉዪያን። አዪሁዳቱዋኮ ካሬ ኬሲዳ። «ታኒ አኒ አይ ባላኔ ዳማቤይኬ። 39 ሺን ፓሲጋ ሲንቴያ ጋላሲ። አቲ አሳ ታኒ ሂንቴንቴሲ ቃሹዋፔ ቢሊያ ደያይ ዳዔ፤ ታኒ ሂንቴንቴሲ አዪሁዳቱ ካቴያ ቢሊያዋ ኮዪቴ?» ያጌዳ።

40 ኡንቴንቴ ዛሬዳ። ባሬንቴ ኮቫ ቶቄ ኡዲዳ። «ባርባና ቢላፔ አቲን። አ ጊዳና!» ያጌዲኖ። ሺን ባርባኒ ፓኦዋ።



# 19

## ዎታዳራቱ ዩሱሳ ቦላ ቂሊጩዲኖ

(ማጥ 27:27-32፤ ማር 15:15-21)

1 ሃዋፔ ጉዩያን፣ ጲላዎሲ ዩሱሳ ኦይቂዳ፣ ሊሱዋን ሾጩዳ።

2 ዎታዳራቱ አጉንጎፔ አኪሊሊያ ገቢሲዳ፣ አ ሁጲያን ዎሌዲኖ፤ ቃሲ ዘዎ ማዩዋካ አ ማዩዜዲኖ። 3 አኮ ሸቂዳ፣ «አዩሁዳ ካቲው፣ ሸምጥዋ ጋሚዳ!» ያገዳ አ ሻዩያ ባቂዲኖ።

4 ጲላዎሲ ቃሲካ ካሬ ኬሲዳ አዩሁዳቱዋ፣ «ቤዒቲ፣ ታኒ አኒ አይ ባላኔ ዳማቤናዋ ሂንቲንቲ ኤራና ማላ፣ አ ሂንቲንቲኮ ካሬ ኬሳና» ያገዳ። 5 ሃዋፔ ጉዩያን፣ ዩሱሲ አጉንጎ አኪሊሊያ ባሬ ሁጲያን ዎሊዳ፣ ዘዎ ማዩዋ ማዩዳ፣ ካሬ ኬሴዳ፤ ጲላዎሲ አዩሁዳቱዋ፣ «ቢታኒያ ሃዋ ቤዒቲ» ያገዳ።

6 ቄሳቱዋ ካፓቱኔ ዎታዳራቱ አ ቤዔዳ ዎዳ፣ ባሬንቲ ኮሻ ቋቁ ኡዲዳ፣ «ማሰቃሊያ ቦላ ሚሲማሪያን ቋሻዳ አ ሱላ! ሱላ!» ያገዳዲኖ።

ጲላዎሲ ኡንቲንታ፣ «ሂንቲንቲ አ አፊዳ፣ ማሰቃሊያ ቦላ ሚሲማሪያን ቋሻዳ ሱሊቲ፤ አዩሲ ጎፔ፣ ታኒ አይ ባላኔ ዳማቤይኬ» ያገዳ።

7 አዩሁዳቱ ዛሬዳ፣ «ኑሲ ሂጊ ዳዔ፤ ኑ ሂጊ ጊያዎዳን፣ ኢ ሃይቃናው ቤሴ፤ አዩሲ ጎፔ፣ ኢ ባሬና ያሳ ናዓ ኦሌዳ» ያገዳዲኖ።

8 ጲላዎሲ ሃዋ ሲሴዳ ዎዳ፣ ካሴዋፔ ሎይሊ ያዩዳ። 9 ቃሲካ ጲላዎሲ ባሬ ኦሱዋ ጎሌ ሲሚ ጌሊዳ ዩሱሳ፣ «ኔኒ ሃቃፔ ያዲ?» ያገዳ ኦቹዳ፤ ሽን ዩሱሲ አው አይኔ ዛሬቤና። 10 ሃዋ ዲራው፣ ጲላዎሲ አ፣ «ታው ኦዲከ? ኔና ቢላናው ዎይ ማሰቃሊያ ቦላ ሚሲማሪያን ቋሻዳ ካቃናው ታው ማታይ ዳዲያዋ ኤሪሰዬ?» ያገዳ።

11 ዩሱሲ፣ «የሳይ ኔው ቦላፔ ማታ ኢሚቤናባ ጊዲንቶ፣ ኔው ታ ቦላ ማታይ ዳዔና ሽን። ሃዋ ዲራው፣ ታና ኔው አሊ ኢሜዳዌ አዲያ ናጋራ ኦሌዳ» ያገዳ።

## ዩሱሳ ሃይቆ ፐርዳዲኖ

(ማጥ 27:15-31፤ ማር 15:6-20፤ ሉቅ 23:13-25)

12 ጲላዎሲ ሃዋ ሲሴዳ ዎዳ፣ ዩሱሳ ቢላናው ኦጊያ ኮዬዳ፤ ሽን አዩሁዳቱ ባሬንቲ ኮሻ ቋቁ ኡዲዳ፣ «ኔኒ አ ቢሊያዋ ጊዶፔ፣ ካቲያ ቄሳሬ ዳቦ ጊዳካ! ባሬና ካቲያ ጊያ ኦኒኔ ቄሳሬ ዋርኬ!» ያገዳዲኖ።

13 ጲላዎሲ ሄዋ ሲሲዳ፣ ዩሱሳ ካሬ ከሴዳ። ያቲዳ ሹቻ ባሱዋ ጊያ ሳዓን ፒርዳ ኦይዲያን ኡቲዳ፤ ኢብራዩስፆ ቃላን ሄ ሳዓይ ጋይታ ጊያዋ። 14 ሄ ጋላሳይ ፓሲጋ ቦንቹያ ጋላሳው ጊሲያ ጋላሳ፤ ሳዓይ ኡሱቸን ሳቲያ ሄራ ጊዳናዋ። ጲላዎሲ ኣዩሁዳቱዋ፣ «ሂንቴንቱ ካቲያ ሃዋ ቤዒቲ!» ያጌዳ።

15 ኣዩሁዳቱ ባሬንቱ ኮሻ ቶቁ ኡዲዳ፣ «ዲጋ! ዲጋ! ማስቃሊያ ቦላ ሚሲማሪያን ቋሻዴ ሱላ!» ያጌዲኖ።

ጲላዎሲ ዛሬዳ፣ «ሂንቴንቱ ካቲያ ታኒ ማስቃሊያ ቦላ ሚሲማሪያን ቋሻዴ ሱሊያዋ ኮዩቲ?» ያጌዴ ኦቹዳ።

ቁሳቱዋ ካፓቱ፣ «ቁሳሬፔ ሃራ ካቲ ኵሲ ባዋ!» ያጌዲኖ።

16 ሄዋፔ ጉዩያን፣ ኡንቱንቱ ማስቃሊያ ቦላ ሚሲማሪያን ቋሻዴ፣ ዩሱሳ ካቃና ማላ፣ ጲላዎሲ ኡንቱንቱሲ ኣሏ ኢሜዳ።

**ዩሱሳ ሱሌዲኖ**  
(ማት 27:32-44፤ ማር 15:21-32፤ ሉቅ 23:26-43)

ኡንቱንቱ ዩሱሳ ኦይቂዳ፣ ኣፌዲኖ። 17 ዩሱሲ ባሬ ማስቃሊያ ቶኪዳ፣ ጉጊያሳ ጌቲያሳ ቤዳ። «ጉጊያሳ» \* ጊያዌ ኢብራዩስፆ ቃላን «ጎልጎላ» ጊያዋ። 18 ኡንቱንቱ ሄ ሳዓን ማስቃሊያ ቦላ ሚሲማሪያን ቋሻዴ፣ ዩሱሳ ካቂዲኖ፤ ቃሲ ኣናና ሃራ ላዑ ኣሳቱ፣ ኢቱዋ ያ ባጋና ቃሲ ኢቱዋ ሃ ባጋና ዩሱሳ ጊዲዋን ዋሕዳ፣ ማስቃሊያ ቦላ ሚሲማሪያን ቋሻዴ ካቂዲኖ። 19 ጲላዎሲ ፃፋቲያ ፃፊዳ፣ ማስቃሊያ ቦላ ዋሕዳ። ኢ ፃፊዳዌ፣ «ኣዩሁዳቱ ካቲያ፣ ናዚሬቲያ ዩሱሳ» ያጌ። 20 ዩሱሲ ማስቃሊያ ቦላ ሚሲማሪያን ቋሻዴ ሱሌቲዳ ሳዓይ ካታማ ማታን ዴዒያ ዲራው፣ ዳር ኣዩሁዳቱ ሄ ፃፋቲያ ናባቤዲኖ። ፃፋቲ ኢብራዩስፆ ቃላን፣ ርማይስፆ ቃላኒኔ ጌሪኬ ቃላን ፃፊቲዳ። 21 ሄዋ ዲራው፣ ኣዩሁዳ ቁሳቱዋ ካፓቱ ጲላዎሳ፣ « ሃ ቢታኒ ባሬና ኣዩሁዳ ካቲያ ያጌዳ) ጋዴ ፃፋፔ ኣቲን፣ ሳዩሁዳ ካቲያ) ጋዴ ፃፎፓ» ያጌዲኖ።

22 ጲላዎሲ፣ «ታኒ ፃፊዳዋ ፃፋ ዲጋዲ» ያጌዴ ዛሬዳ።

23 ዋታዳራቱ ማስቃሊያ ቦላ ሚሲማሪያን ቋሻዴ፣ ዩሱሳ ካቂዳዋፔ ጉዩያን፣ ኣ ማዩዋ ኣኪዳ፣ ኦይዲ ከሲ ሻኬዲኖ፤ ኢቲ ኢቲ ዋታዳራ ኢቲ ሻኩ ጋኬዳ። ኣ ኣዲሳ ማዩዋካ ኣኬዲኖ፤ ኣዲሳ ማዩ ሃሽያፔ ደሚዳ፣ ዲጌ ጋካናው ዩዲ ማዩቲያዋፔ ኣቲን፣ ቃንፃቲዴ ሲኬቲቤና። 24 ዋታዳራቱ ኢቱ ኢቱዋ፣ «ኣና ጋካኔንቶ፣ ሳማ ዋይ ኤፃ ዩጋናፔ ኣቲን፣ ማዩዋ ፔቶኮ» ያጌዲኖ። ሄዌ

\* 19:17 «ጉጊያሳ» ሄዋን ኣሳ ጉጊያ ማላቲ ሜዴቲዳ ዋጋ ሹቻይ ዴዒያ ዲራው፣ «ጉጊያሳ ጌቲቲዳ»።

ሃኔዳዌ ያሳ ማፃፋይ፡ «ታ ማዩዋ ሻኪ አኬዲኖ፤ ታ አዲሳ ማዩዋን ሳማ ዩጌዲኖ» ጊያዌ ፖሌታናሳ፡ ሄዋ ዲራው፡ ዋታዳራቱ ሄዋ ኦሌዲኖ፡፡

25 ሺን ዩሱሳ ማስቃሊያ ማታን አ ዳያ፡ አ አቲ ሚቻታ፡ ቃሊዮጳ ማቻታ ማይራማኔ ማግዳላ ጌቲቲያ ካታማፔ ዩዳ ማይራማ ኤቁዲኖ፡፡ 26 ዩሱሲ ባሬ ዳያኔ ኢ ሰቂያ ካሊያዌ ሄዋን ኤቁዳዋንታ ቤዒዳ፡ ባሬ ዳዮ፡ «ሃ ሚሺራቲ፡ ኔ ናዓ ሃዋ ቤዓ!» ያጌዳ፡፡

27 ሄዋፔ ጉዩያን፡ ሄ ካሊያዋ «ኔ ዳዮ ሃኖ ቤዓ!» ያጌዳ፡፡ ሄ ካሊያዌ ኢዞ ሄ ሳቲያፔ ዶሚዳ፡ ባሬ ሶይ አፊዳ፡፡

**ዩሱሳ ሃይቁዋ**

(ማት 27:45-56፤ ማር 15:33-41፤ ሉቅ 23:44-49)

28 ሄዋፔ ጉዩያን፡ ዩሱሲ ኡባባይ ሃዒ ፖሌቲዳዋ ኤሬዳ፡ ያሳ ማፃፋይ ጌዳዌ ፖሌታና ማላ፡ «ታና ሳሜ» ያጌዳ፡፡

29 ሄ ሳዓን አቲ ፀጋ ኩሜዳ ጫላ ዋዩኒያ ኤሳይ ዳዔ፡፡ አንቲንቲ ኢሰፖንጂያ ሄ ዋዩኒያ ኤሳን ዩጌዳ፡ ሂሶጲያ ጌቲቲያ ሚላ ዪራን ዋሊዳ፡ ዩሱሳ ዶናኮ ሺሺዲኖ፡፡ 30 ዩሱሲ ዋዩኒያ ኤሳ ጋንዪ ቤዔዳዋፔ ጉዩያን፡ «ፖሌቲዳ» ያጌዳ፡፡

**ዩሱሳ ሚዩያ ቶራን ጫዳዲኖ**

ቃሲ ሄዋፔ ጉዩያን፡ ባሬ ሁጲያ ቶቺዳ፡ ባሬ ሸምፑዋ ኢሜዳ፡፡

31 ሄ ጋላሳይ አዩሁዳቱዋሲ ጊጌቲያ ጋላሳ † ጊዲያ ዲራዉኔ ቃሲ ሄ ሳምባታይ ዳሮ ቦንቾ ጊዲያ ዲራው፡ ሳምባታን አሳቱዋ አጋይ ማስቃሊያ ቦላ ፔሽና ማላ፡ ሱሌቲዳ አሳቱዋ ሱዩሊያ ሜንሴዳ፡ ‡ ማስቃሊያፔ ዋላና ማላ፡ አዩሁዳቱ ጲላዖሳ ዋሱዲኖ፡፡ 32 ሄዋ ዲራው፡ ዋታዳራቱ ዩዳ፡ ዩሱሳና ሱሌቲዳ ኮይሮ ቢታኒያ ሱዩሊያ ሜንሴዲኖ፤ ቃሲ አናና ሱሌቲዳ ሳዔሶ ቢታኒያ ሱዩሊያካ ሜንሴዲኖ፡፡ 33 ሺን ዩሱሳኮ ዩዳ ዋዳ ኢ ሃይቁዲጌዳዋ ቤዒዳ፡ አ ሱዩሊያ ሜንሴቤይኪኖ፡፡ 34 ጊደፔኔ፡ ዋታዳራቱዋፔ አቲ አ ሚዩያ ቶራን ጫዳዳ፡ ኤሌካ ሱላይኔ ሃላይ ጎጊ አጌዳ፡፡ 35 ሂንቲንቲ አማናና ማላ፡ ሃዋ ቤዔዳዌ ማርካቲዳ፤

---

19:24 ማዝ 22:18 19:28 ማዝ 69:21፤ 22:15 † 19:31 አዩሁዳቱዋሲ ጊጌቲያ ጋላሳ፡ ፓሲጋይ ሳሚንታፔ አቲ ጋላሳ አዉዴኔ ጊዳና ዳንዳዬ፤ ሺን የሃሊሳ ሚሺራቹ ታማሪሲያዋዳን፡ ፓሲጋ ዋዲ ሃናናው ቤሲያዌ፡ ላይላ ላይላን ዩሱሲ ማስቃሊያን ካቂቲ ሃይቁዳ ሳምባታና ጊዳና ኮሺ፡፡ ‡ 19:31 ሱሌቲዳ አሳቱዋ ሱዩሊያ ሜንሴዳ፡ ሃ ዋጋይ ሮሜ ካዉቲላ ዋጋዳን፡ ማስቃሊያን ሱሌቲዳ አሳቲ ኤሌካ ሃይቃና ማላ ኡዲያ ኦጊያ ጉሳ፡፡

ኢ ማርካቲያዌካ ቱሙዋ፤ ቃሲ ባሬ ሃሳያይ ቱማ ጊዲያዋ ኢ ኤሬዳ። 36 ሄዌ ሃኒዳዌ ያሳ ማፃፋይ፡ «ኣ ማቄላቱዋፔ ኢቱኔ ማዕና» ጌዳዌ ፖሌታናሳ። 37 ቃሲካ ያሳ ማፃፋይ ሃራይ፡ «ኣሳይ ባሬ ጫዳዳዋ ቤዓና» ያጌ።

**ዬሱሲ ሞጌቲዳ**  
(ማት 27:57-61፤ ማር 15:42-47፤ ሉቅ 23:50-56)

38 ሄዋፔ ጉዪያን፡ ኣርማቲያሳ ጌቲቲያ ካታማፔ ዬዳ ዮሴፎ ዬሱሳ ኣኃ ኣኪዳ ኣፋናው ጲላያሳ ዋሴዳ፤ ዮሴፎ ኣዪሁዳቶ ያዬዳ ዲራው፡ ኣሳይ ኤሬናን ዬሱሳ ካሊያዋ።

ዮሴፎ ዋሲና ጲላያሲ፡ «ኣፋ» ያጌዳ። ሄዋ ዲራው፡ ዮሴፎ ቢዳ፡ ዬሱሳ ኣኃ ኣሬዳ። 39 ቃሲ ኒቆዲሞሲ ሄዋፔ ካሴ ዬሱሳኮ ቃማ ዬዳዌ፡ ካዋራናኔ ጎዳሬ ኡፋና ዋላከቲዳ ኦይታማኔ ኢቼሹ ኪሎ ገራማ ጊዲያዋ ከና ሺቱዋ ኦይቄ ኣኪዳ፡ ዮሴፎና ዬዳ። 40 ሄ ላዑ ኣሳቱ ዬሱሳ ኣኃ ኣኪዳ፡ ኣዪሁዳቱ ኣኃ ፃዲያ ዋጋዳን፡ ሺቱዋና ጋሴዳ፡ ሞጉዋ ኣፊላን ፃዲዳ። 41 ዬሱሲ ማሰቃሊያ ቦላ ሚሲማሪያን ጲሹቲዳ ሱሌቲዳ ሳዓን ዳር ኣቲኪልቲያ ሳዓይ ዴዔ፤ ሄ ኣቲኪልቲያ ሳዓ ገደን ሹቻ ዋጪ ከሴዳ ቢር ኦኒኔ ሞጌቲቤና ኦራሳ ዲፋ ዴዔ። 42 ሄ ዲፋ ማጋን ዴዒያ ዲራውኔ ቃሲ ኣዪሁዳቱ ሳሞባታው ገጌቲያ ጋላሳ ጊዲያ ዲራው፡ ዬሱሳ ያኒ ዋሌዲኖ።

# 20

**ዬሱሲ ሃይቁዋፔ ዴንዳዳ**  
(ማት 28:1-8፤ ማር 16:1-8፤ ሉቅ 24:1-12)

1 ዋጋ ጋላሲ ጉራን፡ ቢር ዳቢዳቢያዋን፡ ማግዳላ ጌቲቲያ ካታማፔ ዬዳ ማይራማ ዬሱሲ ሞጌቲዳ ዲፋዋኮ ባዴ ሹቻይ ሄ ጎንጎሉዋ ደናፔ ዴንዳኪቼዳዋ ቤዓዴ። 2 ሲሞኒ ጳዕርሳኮኔ ዬሱሲ ሲቂያ ዮኮ ካሊያዋኮ፡ ኢዛ ዋፃዴ ባዴ፡ «ዲፋዋፔ ጎዳ ኣፊዲጌዲኖ፤ ሃቃን ኣ ዋሌዲኖንተኔ ኮኒ ኤርኮ» ያጋዴ።

3 ሄዋ ዲራው፡ ጳዕርሲኔ ዮኮ ካሊያዌ ኣጌዳ፡ ዲፋዋኮ ቤዲኖ። 4 ላዑካ ኢቲፔ ዋፃዲኖ፤ ሺን ዮኮ ካሊያዌ ጳዕርሳፔ ኣጲ ካሴቲዳ፡ ሄ ዲፋዋኮ ጋኬዳ። 5 ሄ ካሊያዌ ሆኪዳ፡ ሞጉዋ ኣፊላ ቤዔዳ፤ ሺን ገደ ጌሊቤና። 6 ሲሞኒ ጳዕርሴ ኣ ካሊ ዪዳ፡ ዲፋዋ ገደ ጌሌዳ። ያቲዳ ሞጉዋ ኣፊላይ ሄዋን

---

19:36 ኬስ 12:46፤ ፓይ 9:12፤ ማከ 34:20      19:37 ዛክ 12:10፤ ሳፅ 1:7

ዳዒያዎ በዔዳ፤ 7 ቃሲ ዩሱሳ ሁጲያን ፃፀቲ ኡቲዳ አፊላይ ሄ ፃፀቲዳዋዳንካ ዳማ ኢቲ ሳዓን ዳዒያዎ በዔዳ፤ ሄ አፊላይ ዳማ ዳዔፔ አቲን፣ ሞጉዎ አፊላና ኢቲፔ ዳዔና። 8 ሄ ዎዴ፣ ካሲቲዳ ጎንጎሉዋኮ ጋኬዳ ዮኮ ካሊያዌ ጌሊ በዒዳ አማኔዳ። 9 ዩሱሲ ሃይቁዋፔ ዳንዳናው በሲያዎ ኦዲያ ያሳ ማፃፋ ኡንቲንቲ ቢር ኣኬኪቤይኪኖ። 10 ሄዋፔ ጉዩያን፣ ካሊያዋንቲ ባሬንቲ ጎሌ ሲሚዳ በዲኖ።

**ዩሱሲ ማግዳላ ማይራማው በቲዳ**  
(ማት 28:9-10፤ ማር 16:9-11)

11 ሺን ማይራማ ሄ ዳፉዎ ደናን ኤቃዳ ዩካዳ ሆካዳ ዳፉዎ ጊዶ ፃላዲ። 12 ቦላ ማዩዋ ማዩዳ ላዐ ኪታንቻቲ ዩሱሳ አጋይ ጊሴዳ ሳዓን ኢቲ ሁጲሳና ኢቲ ጌዲሳና ኡቲዳዋንታ በዓዲ። 13 ኡንቲንቲ ኢዞ፣ «ሚሺራቲ፣ ኣዩሲ ዩካይ?» ያጊዳ ኦቼዲኖ። ኢዞ፣ «አሳቲ ታ ጎዳ አፊዲጌዲኖ፤ ኡንቲንቲ ሃቃን ዎሌዲኖንቶኔ ታኒ ኤሪኬ» ያጋዲ።

14 ሄዋ ጌዳዋፔ ጉዩያን፣ ጉዩ ሲማ ፃላዳ፣ ዩሱሲ ኤቁዳዎ በዓዲ። ሺን ኢ ዩሱሳ ጊዳዳዎ ኣከካቤይኩ። 15 ዩሱሲ ኢዞ፣ «ሚሺራቲ፣ ኣዩሲ ዩካይ? ኣና ኮያይ?» ያጊዳ ኦቼዳ።

ማይራማ አቲኪልቲያ ናጊያዎ ጋዴ፣ «ጎዳው፣ ኔኒ ኣኬዳዎ ጊዶፔ፣ ኣ ሃቃን ዎላዲንቶ፣ ታው ኦዳሪኪ፤ ታኒ ኣ ኣካና» ያጋዲ።

16 ዩሱሲ ኢዞ፣ «ማይራማ» ያጊዳ። ኣ ኣኮ ሲማዳ፣ ኢብራዩሰፃ ቃላን «ራቡኒ» ያጋዲ፤ ሄዎ ቢሌላይ «ታማሪሲያዎ» ጊያዎ።

17 ዩሱሲ ኢዞ፣ «ታኒ ቢር ታ ኣዉዋኮ ባቤና ዲራው፣ ታና ቦቾፓ፤ ሺን ታ ኢሻቲዋኮ ባዴ፣ (ታኒ ታ ኣዉዋኮኔ ሂንቲንቲ ኣዉዋኮ፣ ታ ያሳኮኔ ሂንቲንቲ ያሳኮ፣ ፑዴ ባይ ጌዳ) ጋዴ ኡንቲንቲሲ ኦዳ» ያጊዳ።

18 ማግዳላ ጌቲቲያ ካታማፔ ዩዳ ማይራማ ጎዳ በዔዳዋኔ ኢዚው ኢ ሄዎ ኦዳዳዎ ባዴ ካሊያዋንቲሲ ኦዳዲ።

**ዩሱሲ ባሬ ካሊያዋንቶ በቲዳ**  
(ማት 28:16-20፤ ማር 16:14-18፤ ሉቅ 24:36-49)

19 ሄ ዎጋ ጋላሲ ኦማርሲ፣ ካሊያዋንቲ ኣዩሁዳቲው ያዩዳ ዲራው፣ ፔንጊያ ጎርዲዳ፣ ሺቁ ኡቲ ዳዒሺን፣ ዩሱሲ ዩዳ፣ ኡንቲንቲ ጊዳዋን ኤቁዳ፣ «ሳርቲላይ ሂንቲንቲሲ ጊዳ» ያጊዳ።

20 ሄዎ ጌዳዋፔ ጉዩያን፣ ባሬ ኩሺያኔ ባሬ ሚዩያ ኡንቲንታ በሴዳ፤ ካሊያዋንቲ ጎዳ በዔዳ ዎዴ ሎይሊ ናሽቲዲኖ።

21 ዩሱሲ ላዒንሉዎ ኡንቲንቲሲ፣ «ሳርቲላይ ሂንቲንቲሲ ጊዳ፤ ታ

አቡ ታና ከቴዎዎዳን፣ ታኒካ ሂንቴንታ ከታይ» ያጌዳ። 22 ሄዋ ጌዳዋፔ ጉዩያን፣ ኡንቴንቴ ቦላ ኡፉ ጌዳ ሸምፔዳ፤ ቃሲ፣ «ጌሻ አያና አኪቴ። 23 ሂንቴንቴ አቶ ጌዳ አሳ ናጋራይ አቶ ጌቴታናዎ፤ ሂንቴንቴ አቶ ጌናዋንቴ ናጋራይ አቶ ጌቴቴና» ያጌዳ።

**ዩሱሳኔ ቶማሳ**

24 ሺን ታማኔ ላዑ ካሊያዋንቴፔ አቱ፣ ማንቲያ ጌያ ቶማሲ፣ ዩሱሲ ዩዳ ዎዴ ኡንቴንቴና ባዎ። 25 ሄዋ ዲራው፣ ዮኮ ካሊያዋንቴ ቶማሳው፣ «ኑኒ ጎዳ ቤዔደ!» ያጌዲኖ።

ሺን ቶማሲ ኡንቴንቴሲ፣ «ሚሲማሪያን ኢ ጫዴቴዳ አ ኩሺያን ዴዒያ ማላ ቤዔናኒኔ ሄ ማላ ታ ቢራዲያን ቦቼናን፣ ቃሲ ታ ኩሺያ አ ሚዩያን ዩዳ ቤዔናን ታኒ አማኒኬ» ያጌዳ።

26 ሳሚንታፔ ጉዩያን፣ ዩሱሳ ካሊያዋንቴ ቃሲካ ጎሌን ሸቂ ኡቴዲኖ፤ ቶማሲካ ኡንቴንቴና ዴዔ። ፔንጊ ቃሸቲ ኡቲ ዴዒሺን፣ ዩሱሲ ዩዴ፣ ኡንቴንቴ ጌዳዋን ኤቂዴ፣ «ሳርቴላይ ሂንቴንቴሲ ጌዳ» ያጌዳ። 27 ሄዋፔ ጉዩያን፣ ዩሱሲ ቶማሳ፣ «ኔ ኩሺያ ሃ አሃዴ፣ ታ ኩሺያ ቤዓ፣ ቃሲ ኔ ኩሺያ ሃ አሃዴ፣ ታ ሚዩያን ዩዳ ቤዓ፣ ኔኒ አማኒያዎ ጌዳፔ አቲን፣ አማኔናዎ ጌደፓ!» ያጌዳ።

28 ቶማሲ ዛሪዴ፣ «ታ ጎደው፣ ታ ያሳው!» ያጌዳ።

29 ዩሱሲ፣ «ኔኒ ታና ቤዔዳ ዲራው አማናዳ፤ ቤዔናን አማኔዳዋንቴ አንጃቴዳዋንታ» ያጌዳ።

**ሃ ማፃፋ ቆፋ**

30 ዩሱሲ ሃ ማፃፋን ፃፊቲቤና ሃራ ዳር ማላታቱዋ ባሬና ካሊያዋንቴ ሲንላን ኦሌዳ። 31 ሺን ዩሱሲ፣ ኢ ከሪሰቶሳ፣ ያሳ ናዓ ጌዲያዎ ሂንቴንቴ አማናና ማላኔ፣ ቃሲ አ አማኒዴ አ ሱንላን ዴዑዋ ሂንቴንቴ ዴማና ማላ፣ ሃዌ ፃፊቴዳ።

# 21

**ዩሱሲ ላፑ ካሊያዋንቶ ቤቴዳ**

1 ሄዋፔ ጉዩያን፣ ዩሱሲ ዪቢሪያደሳ ጌቴቲያ አባ ጋፃን ባሬ ካሊያዋንቴሲ ሳዔንሉዋ ቤቴዳ። ኢ ኡንቴንቴሲ ሃዋዳን ቤቴዳ።

2 ሲሞኒ ጳዕርሲኔ ማንቲያ ጌቴቲያ ቶማሲ፣ ቃና ጋሊላፔ ዩዳ ናቲናዔሊ፣ ዛቢዲዮሳ ናናይኔ \* ዩሱሳ ካሊያዋንቴፔ ሃራ ላዓቱ ኢቲፔ ዴዒኖ።

3 ሲሞኒ ጳዕርሲኔ ኡንቴንቴሲ፣ «ታኒ ሞሊያ ኦይቃናው ባይ» ያጌዳ።

\* 21:2 ዛቢዲዮሳ ናና፣ ኢሻቱዋ ጌዴዳ ያዩቆባኔ የሃኒሳ።

አንቱንቱ፡ «ኮኒካ ኔናና ባና» ያጊዳ፡ ኬሲዳ ዋንጊሪያ ጊዶ ጌሌዲኖ፤ ሺን አንቱንቱ ሄ ጋላሲ ቃማ ሞሊያ አይኔ ኦይቁቤይኪኖ።

4 ዋንቲያ ዎዴ አዎይ ኬሳናፕ ካሴ፡ ዩሱሲ አባ ጋዎን ኤቁዳ፤ ሺን አ ካሊያዋንቱ ዩሱሳ ጊዳዳዎ ኤሪቤይኪኖ። 5 ዩሱሲ አንቱንታ፡ «ናቶ፡ ሞሊያ ኦይቁቤይኪቱዬ?» ያጊዳ።

አንቱንቱ ዛሪዳ፡ «አይኔ ኦይቁቤይኮ» ያጊዳኖ።

6 ኢ ዛሪዳ፡ «ሂንቲንቱ ዳባ ዋንጊሪያፕ ኡሹቻ ባጋኮ ዩጊቲ፤ አማራዳዎ ሂንቲንቱ ኦይቃና» ያጊዳ። ሄዎ ዲራው፡ ዳባ ኡሹቻ ባጋኮ ዩጊና፡ ሞሊ ዲራዳ ዲራው፡ ጎቺ ኬሳናዌ አንቱንታ ዎኔዳ።

7 ዩሱሲ ሰቁያ አ ካሊያዌ ጳዲሮሳ፡ «ሃዌ ጎዳቲኔ!» ያጊዳ። ሰሞኒ ጳዲሮሴ ጎዳ ኢ ጊዳዳዎ ሲሴዳ ዎዴ፡ ካሎ ዳዒያ ዲራው፡ ባሪ ማዩዎ ማዩዳ፡ አባ ጊዶ ጉፒ ጌሌዳ። 8 ሺን ዮኮ ካሊያዋንቱ ሞሊ ኩሚ ኡቲዳ ዳባ ጎቺዳ፡ ዋንጊሪያን አባፕ ጋዎ ኬሴዲኖ፤ አንቱንቱ አባፕ ላዑ ዌቱ ዋቆ ኬና ሃኪዳ ዳዒናፕ አቲን፡ ሎይሉ ሃኪዳ ዳዒኪኖ። 9 አንቱንቱ አባፕ ጋዎ ኬሴዳ ዎዴ፡ ዲፀጎላ ቦንቁዋን ሞሊ ዳዒያዎኔ ኡኪላ ቤዔዲኖ።

10 ዩሱሲ አንቱንታ፡ «ሃዒ ሂንቲንቱ ኦይቁዳ ሞሊያፕ አማራዳዎ ሃሚቲ» ያጊዳ።

11 ሰሞኒ ጳዲሮሴ ዋንጊሪያን ጌሊዳ፡ ዌታኔ ኢሸታማኔ ሄዙ ዎጋ ሞሊቱ ኩሚ ኡቲዳ ዳባ ጎቺዳ፡ አባፕ ጋዎ ኬሴዳ፤ ሞሊ ሄዎ ኬና ዳሮ ጊዲናካ ዳባይ ዳኬቲቤና።

12 ዩሱሲ አንቱንታ፡ «ሃ ዪዳ፡ ቃንዒያ ቃንዒቲ» ያጊዳ። ዩሱሳ ካሊያዋንቱፕ አቱኔ፡ «ኔኒ ኦኔ?» ጊዳ አ አቻናው ፃሊቤና፤ አዪሲ ጎፔ፡ ጎዳ ኢ ጊዳዳዎ አንቱንቱ ኤሪዲኖ።

13 ዩሱሲ ዪዳ፡ ኡኪላ አኪዳ፡ አንቱንቱሲ አሜዳ፤ ሞሊያካ ሄዎዳን አሜዳ።

14 ዩሱሲ ሃይቁዋፕ ዳንዳዳዋፕ ጉዪያን፡ ባሪ ካሊያዋንቱሲ ቤቲሺን ሃዌ ሄዜንሉዎ።

**ዩሱሳኔ ጳዲሮሳ**

15 አንቱንቱ ቁማ ሚዳዋፕ ጉዪያን፡ ዩሱሲ ሰሞኒ ጳዲሮሳ፡ «ዮሀንሳ ናዒ ሰሞና፡ ታና ሃዋንቱፕ አላዴ ሲቃይ?» † ያጊዳ።

ሰሞኒ ጳዲሮሴ፡ «ኤ ጎዳው፡ ታኒ ኔና ደሲያዎ ኔኒ ኤራሳ» ያጊዳ።

ዩሱሲ አ፡ «ታ ዶርሳ ማራቱዎ ሄማ» ያጊዳ።

† 21:15 « ... ታና ሃዋንቱፕ አላዴ ሲቃይ?» ሃዎ ጉሳይ፡ «ታና ሃ ዩዋቱዎ ሲቁያዋፕ አላዴ ሲቃይ?» ጉሳ።

16 ዬሱሲ ቃሲካ፡ «ዮሃንሳ ናዓ ሲሞና፡ ታና ሲቃይ?» ያጌዳ። ሲሞኒ ጳዊሮሴ፡ «ኤ ጎዳው፡ ታኒ ኔና ደሲያዋ ኔኒ ኤራሳ» ያጌዳ።

ዬሱሲ፡ «ታ ደርሳቱዋ ህማ» ያጌዳ።

17 ዬሱሲ ሄዜንሉዋ፡ «ዮሃንሳ ናዓ ሲሞና፡ ታና ደሳይ?» ያጌዳ።

ዬሱሲ ሄዜንሉዋ ሲሞኒ ጳዊሮሳ፡ «ታና ደሳይ?» ያጌዳ ኦቹዳ ዲራው፡ ጳዊሮሴ ኣዛኒዳ፡ «ጎዳው፡ ኔኒ ኡባባ ኤራሳ፤ ታኒ ኔና ደሲያዋ ኔኒ ኤራሳ» ያጌዳ።

ዬሱሲ፡ «ታ ደርሳቱዋ ህማ። 18 ታኒ ኔው ቱሙዋ ኦዳይ፤ ኔኒ ዋዳላቲሳን ዴዒያ ዋዴ፡ ኔ ፃሳን ሳቂያ ኔሬካ ዳንጫዴ፡ ኔኒ ኮዬዳሳ ባሳ። ሺን ጨሚዳዋፔ ጉዩያን፡ ኔ ኩሺያ ሚጫ ቤሳሳ። ኔና ሃራ ኡራይ ዳንጨሳናዋ፤ ኔኒ ደሴናሳካ ኣፌ» ያጌዳ። 19 ዬሱሲ ህዋ ጳዊሮሴ ኣይ ማላ ሃይቁዋ ሃይቁዴ፡ ያሳ ቦንቲሳኔንቶኔ ኤሪሳናው ጌዳ፤ ቃሲ ህዋ ጌዳዋፔ ጉዩያን፡ ዬሱሲ ጳዊሮሳ፡ «ታና ካላ» ያጌዳ።

**ዬሱሳኔ ዮኮ ካሊያዋ**

20 ጳዊሮሴ ጉዬ ሲሚዴ፡ ዬሱሲ ሲቂያ ካሊያዌ ባሬፔ ጉዬና ዪያዋ ቤዔዳ፤ ህ ካሊያዌ ካዉዋ ሚያ ሳዓን ዬሱሳኮ ሺቂዴ ኣ፡ «ጎዳው፡ ኔና ኣሲ ኢማናዌ ኦኔ?» ያጌዳዋ። 21 ጳዊሮሴ ህ ካሊያዋ ቤዔዴ ዬሱሳ፡ «ጎዳው፡ ሃ ቢታኒ ቃሲ ዋናኔ?» ያጌዳ።

22 ዬሱሲ ኣ፡ «ታኒ ያና ጋካናው ኢ ዴዓና ማላ ታኒ ኮዮፔ፡ ህዌ ኔና ኣያ ሚቲ? ኔኒ ታና ካላ» ያጌዳ።

23 ህዋ ዲራው፡ ህ ካሊያዌ ሃይቁና ጊያ ሃሳያይ ኣሻቱዋ ኡባኮ ጋኬዳ፤ ሺን ዬሱሲ፡ «ታኒ ያና ጋካናው፡ ኢ ዴዓና ማላ፡ ታኒ ኮዮፔ፡ ኔና ኣያ ሚቲ?» ጌዳዋፔ ኣቲን፡ «ሃይቁና» ጊቤና።

24 ህ ዬዉዋባ ማርካቲዳዌኔ ቃሲ ህዋ ያፌዳዌ ህ ካሊያዋ ኣ ማርካቲሳይ ቱማ ጊዲያዋ ኦኒ ኤራቶ።

25 ዬሱሲ ኦሉዳ ሃራ ዳርባይካ ዴዔ፤ ኡባባይ ሁጲያን ሁጲያን ያፌቲንቶ፡ ያፌቲያ ማፃፋቶ ሃ ሙሌ ኣላሚ ጊዳናዋ ታው ማላቲና።



**Ooratha Caaquwaa**  
**New Testament in Dawro (ET:dwr:Dawro)**

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 21 Feb 2024 from source  
files dated 29 Jan 2022

585b63ca-b8e6-55c8-bfef-10bdc95ad69c